


ANG IKAPITONG SELYO

 Salamat, igsoon. Samtang nagapabilin kita sa pagtindog, mag-ampo kita.

² Dios nga Makagagahum-sa-tanan, ang Tag-iya sa Kinabuhi, ug ang Maghahatag sa tanan nga maayong, espirituhanong mga gasa, mapasalamaton gyud kami karon alang niining makahibulongan, talagsaong, panahon sa pagpakig-fellowship diha sa Imong Presensya; nagahatag kini og dakung marka sa among mga kinabuhi, Ginoo, usa ka higayon nga dili gayud namo malimtan, bisan unsa pa kadugay kami magpabilin dinhi. Ug nagaampo kami, Dios, nga sa pagtapus niining gabhiona . . . Namatikdan namo ang Kasulatan, sa pagtapus sa adlaw sa fiesta, mitindog si Jesus diha sa ilang taliwala ug misinggit, “Kung adunay tawong giuhaw, umari siya Kanako!” Ug ginaampo ko, Langitnong Amahan, nga mabalik kana pag-usab karong gabhiona, nga madungog namo ang Tingog sa among Ginoo nga nagapanawag kanamo, ug ginatawag kami ngadto sa pag-alagad Kaniya, nga mas haduol pa nga pagkinabuhi. Nabati namo nga nadungog na namo ang Iyang Tingog, sa pag-abli sa niining mga Selyo, ginapamulong nga kini mao ang kaulahiyan adlaw, ug ang panahon haduol na. Itugot kining mga panalangin nga gikahangyo namo, Amahan, sa Ngalan ni Jesus Cristo, ug alang sa Iyang kahimayaan. Amen.

Makapanglingkod na.

³ Gusto kong idugang kini, nga, sa tanang panerbisyo nga nagkaaduna ako sa akong kinabuhi, nagtoo ko nga kining semanaha mao ang pinakamahimayaong panahon sa tibuok kong kinabuhi diha sa mga panerbisyo. Bisan unsa pa ako nang . . . Nakakita na ako og dagkung mga milagro nga nangahimo, siyempre, kanhi, ug panerbisyo sa mga pagpang-ayo, apan kini labaw pa niana. Kini ang usa sa maanindot nga mga kahigayonan, pinakamahinungdanon sa akong kinabuhi, ang maania dinhi karon. Ug makita nga ang gamay'ng tabernakulo ingon na niini ang hitsura; dili lamang kana, nalahi pud ang hitsura sa sulod!

⁴ Ug, karon, gipangutana ko si Billy; nadugay siya, sa pag-abot ug pagkuha kanako. Miingon siya nga aduna og bag-o na pud nga pundok ang nabautismohan. Nga, moabot na kini og sobra sa usa ka gatus, niining semanaha, mga tawo nga nabautismohan sa Ngalan sa atong Ginoong Jesus Cristo. Busa, kita—mapasalamaton gayud. Ug panalanginan kamo sa Dios!

⁵ Ug, karon, kung kamo wala pa'y kaugalingong simbahan nga ginatambongan, ginadapit namo kamo dinhi, sa pag-anhi ug sa pagpakig-fellowship kanamo. Timan-i nga ang iglesia bukas

gyud kaninyo. Dili kami denominasyon, ug naglaum ako ug nagasalig nga dili gyud kini mamahimong denominasyon. Usa ka pagpakig-fellowship lamang kon diin ang mga lalaken-an ug mga kababayan-an, ug mga batang lalaki ug mga babaye, nagkatigum palibot sa lamesa sa Dios, ug magka-fellowship palibot sa Pulong, ug aduna kita og panaghiusa sa tanang butang.

⁶ Karon, ug aduna kita og usa ka maayo kaayong pastor, usa ka tinuod gyud nga tawo sa Dios, ug mapasalamaton kaayo ako niana. Kung mahinumdoman ninyo, aduna'y panan-awon, usa ka tuig na ang milabay, nga kining Pagkaon kono gitipigan diha sa usa ka dapit. Ug husto gyud kana. Ug kita . . .

⁷ Aduna na kita og mao nga dapit karon, nga igo gyud, alang sa mga pagtuon sa Sunday School, para sa tanang edad, ug mapasalamaton kaayo kita alang niining oportunidad. Adunay pipila nga nanag-ingon, kaniadto, nga kung aduna lang unta og mga pagtuon sa Sunday school kon diin mahimong ipadala nila ang ilang mga anak. Karon, kamo, aduna na sila karon. Busa, karon, anhi lang mo ug ubani kami kung wala kamo'y iglesiang ginatambongan.

⁸ Siyempre, kung aduna na mo'y maayong iglesia kon diin didto kamo nagatambong, ug ginawali ang Ebanghelyo, ug uban pa, aba, kana—kana'y usa pa ka pundok namo, nakita n'yo, sa kung diin man. Apan kung wala pa kamo og ginatambongan, ug kamo . . .

⁹ Nasabtan ko nga ang uban, mibalhin dinhi gikan pa sa ubang mga bahin sa nasud, aron himoon kini nga ila nang simbahan. Ug ginaabiabi gyud kamo namo dinhi alang sa Pulong sa Ginoo. Ug akong mahinumduman, siguro, niadtong pagbiya ko, gisultihan ko kamo nga—nga ang mga panerbisyo, kung ako'y pabut-on, dinhi ra gyud sa tabernakulo.

¹⁰ Wala ako masayod kung unsa gyud ang giandam sa Ginoo alang kanako sa umalabot. Gitugyan ko kini sa Iyang kamot, dili tungod sa pipila ka tootoo o unsa mang butang. Nagahulat lang ako, sa adlaw-adlaw, alang Kaniya sa pagpanguna kanako ngadto sa lugar kon diin ako labaw pa nga makapangalagad alang Kaniya. Ug sa diha nga Siya human na kanako, nan nagasalig ako nga dawaton Niya ako Pagpauli ko, nga may kalinaw.

¹¹ Ug, karon, mapasalamaton gyud ako sa kooperasyon sa mga tawo sa tabernakulo. Sama sa ginasulti ni Billy kanako niining semanaha, nga, siguro, ang matag panimalay nga narepresentar dinhi sa palibot niining tabernakulo aduna sila'y mga kauban. Nag-abli sila, giablihan n'yo ang inyong mga panimalay ug mga balay, ug nagpasulod og mga dumuloong nga walay lugar nga maestaran. Karon, kana maoy tinuod nga mga Cristohanong buhat. Ug may mga panimalay nga gipaestaran og tawo ang

matag gagmay'ng suok nga aduna sila, aron lang mahatagan ang mga tawo og lugar aron kapuy-an.

¹² Ang hinungdan, nga nagkalisud kaayo ta, tungod niining, okasyon nga ginapahigayon karon, paugnat-sa-kosog, mora og basketball o unsa man, ug—ug aduna na'y mga reserbasyon sa mga hotel. Dayon aduna pa'y usa ka dakung grupo nga gikan sa . . .

¹³ Siguro, ang nakarepresentar dinhi niining gamay'ng iglesia, mga, anaa sa baynte-otso o traynta ka mga estado ang girepresentar mismo dinhi sa iglesia, labut pa ang duha ka mga nasud sa gawas, busa, sa niining gamay'ng rebaybal. Busa, naga-ukopar kana og medyo daku nga lugar, mismo. Daw sa . . .

¹⁴ Nangutana ko karong adlawa, sa pipila ka mga tawo. Ingon ko, “Nasabtan ko nga wala kaayo og mga taga-Jeffersonville, sa panagtigum.”

¹⁵ Adunay usa nga nagsulti, miingon, “Dili man gud mi kasulod.” Bueno, kana, mao gyud kana. Kana diay ang hinungdan. May mga pulis, ug uban pa, nga gusto untang motambong sa pagpanagtigum, apan miingon, sa ilang pagpakig-istoryahanay, miingon, nga mianhi man kono sila ug dili lang sila makasulod, nga puno na kono daan wala pa ang oras nga puede na unta silang mosulod. Busa mahimong nagkaaduna sila og higayon, tingali, pagkahuman niadto, ug wala lang sila mibalik. Busa karon ang mga tawo nagapangabot gikan pa sa ubang mga lugar, mao nga mapasalamaton kaayo kita.

¹⁶ Karon, wala pa ko mahibalo. Ang sunod nga butang nga mosunod niini, mao ang Pito ka mga Trumpeta, usa ka dugang pa nga mensahe. Apan, sa Mga Selyo, halos tanan gilakip na. Napadayag ang mga kapanahonan sa iglesia, ug gihan-ay nato ang mga niini una, nga mao ang pinaka—nga mao'y pinaka-importante, apan ang . . . sa nianang panahona. Karon, ang pag-abli sa Mga Selyo ginapakita usab kung asa padulong ang Iglesia, ug sa unsang paagi magatapos Kini. Ug karon, siguro, ang Langitnong Amahan mapanalanginon gyud kanato, sa pagtugot nga makita nato kung unsa gyud kining nadawat nato.

¹⁷ Ug isulti ko kini, sa pagtan-aw ko niining dugay na mga lista nga akong giwali, daghang mga tuig na ang milabay, sa pagsugod ko ug ginasulti kaniadto kung unsay sa hunahuna ko'y husto, ug gipadayon pa. Layo ra diay kayo kadto. Ug niadtong panahona, kanang upat ka mga Selyo, gihisgotan ko kana sa mga baynte ra ka minutos nga wali, ang tibuok niini. Ang upat ka mga mangangabayo, sa Pinadayag, ako ra silang giusa tanan ug miingon, “Usa ka kabayo nga puti,” ingon ko, “mahimo nga sa—sa—sa nahaunang kapanahonan kana. Ug ang sunod nga kabayo migawas niadtong ting-gutom,” ug padayon kadto nga ingon niana. Apan, aba, sa dihang naablihan na gyud ang Pulong, gatos ka mga milya Kini ang gilay-on gikan niana.

¹⁸ Busa, angay ra gyud nga magbantay kita ug maghulat. Ug tingali kini na ang panahon aron buhaton kini. Mahimong daghang mga butang ang nasulti ko, nga wala nauyonan sa ubang mga tawo. Apan nagatoo ko, pagmoabot na ang dakung panghinapos nga panahon, ug tagbuon na nato ang atong Ginoo, makita ninyo nga husto Kini. Oo, sir. Kini—Kini—Kini husto gayud.

¹⁹ Karon, kamong mga gikan pa gawas sa lungsod, gikan sa nagkalainlaing mga lugar, gikan pa sa nagkalainlaing mga estado ug mga nasud, ginapasalamatan ko gayud ang inyong pagkasinsero aron biyahe-on ang ingon ka halayo, ug magbakasyon mismo. Ug ang uban kanila wala gani lugar nga mapuy-an! Ako—nahibalo ko, tungod kay natabangan ko ang pipila kanila nga makakuha og lugar nga kapuy-an. Bisan wala na’y kuwarta nga ipangkaon, o unsa pa man, ug busa...ug bisan niana mianhi, sa gihapon, nagpaabot sa kung unsa man nga mahitabo, aron matubag kini. Ug tungod nianang daku nga pagtoo, nga dili igsapayan kung kinahanglan nilang moadto bisan nga walay pagkaon, o bisan walay lugar nga mapuy-an, gusto gihapon nilang makatambong og madungog nga kining, mga butang nagakahitabo, bisan pa man. Kana ang tinuod nga kaisog, kabalo mo. Ug ingon niana gyud ang tanan usa-ka-gatos-ka porsyento!

²⁰ Nahimamat ko ang akong bayaw didto sa likod, nga mao ang—ang...naghimo og pagplastar sa mga hollow-block sa iglesia, ug uban pa. Ug gisulti ko kaniya kung unsa ko ka mapasalamaton sa iyang gihimo. Dili ako usa—usa ka panday sa bato, o may nahibal—an man lang bahin niini. Apan nahibalo ko kung unsa ang kwadrado nga kanto, ug kung naplastar ba gyud kini sa husto.

²¹ Ug miingon siya, “Sultihan ko ikaw.” Miingon siya, “Wala pa gayu’y ingon nianang panahon, halos, nga nakakita ko og ingon nianang panagduyog sa mga tawo, sa dihang silang tanan nagtinabangay.”

²² Si Igsoong Wood, si Igsoong Roberson, ug ang tanan nanglihok subay sa kung unsay ilang matabang, ang tanan mismo. Ug ang igsoong lalaki nga—nga nagplastar sa akustika, ang...Buot kong pasabot ang mga gamit-pangpakusog og tingog ug ang tanan na, sulod sa iglesia. Ingon nila, “Ang tanan gaandar na gyud og husto.” Pag aduna sila’y kinahanglan, aduna sila’y tawo nga anaa mismo dinha nga mobuhat niini. Busa kini...Nagauban gyud ang Dios sa tibuok niining programa. Mapasalamaton kaayo kita tungod niini.

²³ Daghan usab og mga dagkung nag-amot sulod sa iglesia, aron nga mapahigayon kini, sama sa atong Igsoong Dauch ug Igsoong-babayeng Dauch nga nagalingkod dinhi, ug daghang uban pa nga nag-amot og dagku alang sa niining katuyoan.

Ug sa tan-aw ko, mismo sa pagkakaron, wala gyud sila nakulangan bisan gamay ug ang tanan niini nabayran na. Busa mapasalamaton gyud kita tungod niana.

24 Hinumdomi, inyo kining simbahan, tungod kay alagad man kamo ni Cristo. Ug mao kana ang katuyoan nga gitukod kini dinhi, usa ka abli nga pultahan aron sa paghimo og mga alagad, ug alang usab sa mga alagad nga mga alagad na daan ni Cristo, aron makasimba ug malipay ang ilang mga kaugalingon palibot sa pagpakig-fellowship kang Jesus Cristo. Ug gusto namo nga mahibaloan ninyo nga ginaabi-abi gyud ang tanan.

25 Ug karon sa dihang madungog ninyo ako usahay, ilalum sa panahon sa pagdihog, nga medyo ginakawras ang tabil sa organisasyon, ako—dili kana nagapasabut nga batok ako sa inyong pastor, o batok ako sa kang kinsa man nga igsoong lalaki, igsoong babaye, o iglesia. Tungod kay, bisan pa man, ang Dios aduna og mga tawo sa matag organisasyon. Apan wala Siya nagadawat og organisasyon; Mga indibidwal sa organisasyon ang Iyang ginadawat. Ug ang . . .Kini wala magkinahanglan og organisasyon.

26 Busa, sa dihang ang mga tawo nagapos na og ayo sa organisasyon, nan wala na sila'y makita og uban pa gawas sa kung unsa ra ang ginasulti sa iglesia, nakita n'yo. Ug nagapasabot kana og pagpakighimulag sa uban, ug usa kini ka sistema nga wala nakapahimuut sa Dios, ug usa kini ka kalibutanong butang nga wala gayud ordenahi sa Dios.

27 Busa, karon, wala ko nagapahinungod sa kang kinsa man nga indibidwal. Bisan pa Katoliko, Judio, o unsa man, o—o Methodist, Baptist, Presbyterian, unsa man nga organisasyon, dili man mga organisasyon, ug—ug dili man mga denominasyon, ug tanan na, aduna ang Dios og Iyang mga anak nga anaa pa dinha. Kita n'yo? Ug daghang mga higayon nga nagatoo ko nga anaa sila dinha tungod sa usa ka katuyoan, aron maghatag og Kahayag, nga ginapagawas kadtong mga gipili-nang-daan gikan sa tanang dapit. Ug—ug nianang dakung adlaw, makita nato nianang higayona, ang Iglesia ni Ginoong Jesus Cristo nga ginatawag na ngadto sa—sa dakung panahon sa panagtigum diha sa panganod, ug pagasakgawon kita aron sa pagpakigtambo Kaniya. Ug ako—nagapaabot gyud ako alang nianang taknaa.

Karon, adunay daghan pa nga mahimong isulti!

28 Ug niining gabhiona, ang katapusan, panghinapos nga gabii, sama sa naandan na, ang tanan . . .Diha sa panerbisyo sa pagpang-ayo, makita ko, tungod sa mga kahinam alang sa dagkung mga butang nga mahimong mahitabo sa maong panerbisyo sa pagpang-ayo, nagapahimo kini kanila og tensiyonado, nerbiyoso. Ug dayon nakita ko, ang mao rang butang niining gabhiona, nga ang tanan napailalum sa kahinam

nga makita kung unsaon... Ug sa matag gabii, ingon niana mismo, tungod sa pag-abli sa niining mga Selyo.

²⁹ Karon gusto kong klarohon gayud kini. Sa matag higayon, sa matag higayon nga nagaabot kining mga Selyo sa lawak ko; ang tanang butang nga gitooan ko mahitungod Niini, ug nabasa sa ubang mga tawo, sukwahi gayud sa kung unsay miabot kanako didto sa lawak.

³⁰ Ug ang akong hunahuna, niining orasa... Ang rason nga gipahigayon ko ang maong panerbisyo sa pagpang-ayo kaganinang buntag, tungod kay ang akong tawhanong hunahuna nahimong halayo na gyud sa kaugalingon kong pamaagi sa pagpanghunahuna. Nagpabilin ra gyud ko sulod sa usa—sa usa ka lawak nga napalibotan og mga kurtina, ug abli ang suga. Kini ang ikawalong adlaw. Ug wala pa gani ko kasakay sa akong sakyanan, aron—aron moadto sa kung asang lugar.

³¹ Kinahanglan ko untang ubanan ang pipila ka mga kaigsoonan, didto sa mga bangko, aron mopirma sa pipila ka mga tseke ug ingon-anang mga butang, bahin sa kwarta ug mga butang nga gihulam alang niining iglesia. Apan ako—apan diretso akong nagapauli, ug nagabalik dayon sa pagtuon.

³² Ug ang makahibulongan nga butang, wala ni usa ka tawo ang nagpakigsulti og unsa man. O, kasagaran man gud, manuktok sila, ug manghangyo, ug magbiyo-biyo. Wala gyu'y ingon-ana. Talagsaon kaayo.

³³ Didto na ako nagakaon sa balay, nila Igsoong Wood. Kasagaran kanang lugara kanunay'ng puno og mga sakyanan. Ug kasagaran aduna'y walo o napulo ka lahi-lahi nga mga tawo ang nagaabot og magpuyo kanila pag ingon niining panahona, ug wala'y ni usa ang miabot.

³⁴ Ug dayon, kaganinang buntag, dili ko gayud makalimtan kaganinang buntag, ang grasya sa atong Manluluwas sa Iyang kapoy, hago na nga alagad. Sa dihang, gitubag ko ang pangutana sa usa ka makalooloy nga tawo, ug, kutob sa akong hunahuna, nagdahum ko nga husto ang gibuhat ko. Ug, sa kalit lang, ingon nga mora og aduna ko'y—aduna ko'y butang nga gihikaw gikan sa usa ka bata, grabeng pagka-konsensiya nako, nga wala ko mahibalo kung unsa kadto. Ug nahunahuna ko, tingali tungod sa pagpaningkamot ko nga mapahigayon na dayon ang panerbisyo sa pagpang-ayo, tingali tungod may usa ka grabeng masakiton nga tawo, nga nagkinahanglan nang iampo dayon. Ug gipangutana ko ang mga mananambong. Pila lang ka minuto, napadayag kadto. Ug adunay miingon, "Dili ba nimo basahon ang imong—basahon ang imong teksto?" o mga ingon-ana. Ug niadtong higayona, gipudyot ko ang usa ka gamay'ng papel ug gibasa kini pag-usab, gitan-aw kung unsa ang nasulat niadto. Gitan-aw sa mga Libro, ug lahi gyud kaayo kadto, ang pangutana nga akong ginatubag. Kita n'yo?

³⁵ Gusto kong ipasa kini kaninyo. Pagmoabot na ang Supernatural, mao na kana ang hunahuna ni Cristo. Mamahimo kang halayo na kaayo sa imong kaugalingon nga panghunahuna, hangtud, nga sa kaugalingon mong hunahuna, ako...Kini, inyong...Dili ko...Ayaw ninyo akong ipasulay nga isaysay kana, tungod kay dili ko mahimo. Kita n'yo? Dili ko mahimo kana. Walay bisan si kinsa man ang makahimo niana.

³⁶ Giunsa man pagtindog niadtong tawhana, nga mao si Elias, didto sa ibabaw sa bukid, ilalum sa Presensiya sa Dios, ug gipakanaug ang Kalayo gikan sa langit, ug nagpaulan mismo pagkahuman sa Kalayo? Ug dayon gisaradohan ang mga kalangitan, ug wala miulan sulod sa tulo ka tuig ug unom ka bulan, ug mibalik pagkahuman niadto ug gitawag ang ulan, niadto mismong adlaw! Ug ilalum niadtong pagpangdihog, giunsa nga...Ug gikuha ang upat ka gatus ka mga pari ug gipangpatay sila; ug dayon mikalagiw ngadto sa kamingawan, nga nagatuaw alang sa iyang kinabuhi, tungod lang sa hulga sa usa ka babaye. Kita n'yo? Si Jezebel, nanumpa siya nga iyang pagapatyon si Elias. Sa dihang, atua mismo si Ahab ug silang tanan, aron masaksihan ang Presensiya sa Dios ug ang dagkung milagro nga nangahitabo. Kita n'yo, siya... Mibiya na ang Espiritu kaniya. Sa iyang natural nga paagi sa pagpanghunahuna, wala siya mahibalo kung unsaon sa paghunahuna, kita n'yo. Dili na siya makahunahuna alang sa iyang kaugalingon.

³⁷ Ug, hinumdomi, gipatulog siya sa Anghel, ug gipapahulay siya. Gipabangon siya, gihatagan siya og pipila ka tinapay; dayon gipatulog siya pag-usab, ug gipapahulay siya; ug gipabangon siya, ug gihatagan siya og pipila ka mga tinapay pag-usab. Ug wala na kita mahibalo kung unsay nahitabo sa maong tawo, sa sulod sa kwarenta ka mga adlaw. Dayon gipagawas siya diha sa usa ka langub, sa kung asa man, ug gitawag siya sa Dios.

³⁸ Ayaw sulaying isaysay kanang Supernatural. Dili mo mahimo kana. Kita n'yo? Ang bugtong butang nga angay buhaton, padayon ka lang. Ug paningkamotan kong iklaro ang kaugalingon ko kutob sa akong mahimo, apan sugod karon akong...Siguro dili ko na sulayan kini pag-usab. Toohan mo lang gyud, o dili. Ug akong...Makita ninyo, pagkataudtaud, kon ngano.

Karon, naningkamot ako nga magmatinud-anon. Nasayod ang Dios niana.

³⁹ Ug kanang pangutana kaganinang buntag. Gisulayan kong tubagon kadto sa pagkamatinud-anon gayud nga nahibaloan ko kung unsaon. Gibasa ko man lang gud ang unang bahin sa bersekulo, ug kung kadto lang...mamahimong dili husto. Apan ang Balaang Espiritu, nasabtan nga ako'y...ang hunahuna

ko...Kita n'yo, tan-awa, kining ulahing duha o tulo ka mga adlaw, kung unsay nangahitabo. Kita n'yo, ako—ang gisulti ko pito ka gatus...“pito ka libo,” pito ka gatus. Kaganinang buntag, gisulayan ko, ug nakita kadto sa mga tawo, kita n'yo, ug nagpakita kana nga nagabantay kamo. Karon, aduna pa'y usa, nga unta ang akong isulti “ang salampati,” ug ang gisulti ko karnero; apan namatikdan ko kadto dayon. Ug dayon, ania, ang usa nga wala ko namatikdan, gibalikan kini sa Balaang Espiritu ug gipahusto kini kanako.

⁴⁰ Mao kana ang dobleng pagpamatuod nga husto kining mga butanga. Sila mga...Ang Dios nagabantay, aron masigurado nga Kini husto. Husto kana. Gusto kay Niya nga husto. Gusto Niyang mahibaloan ninyo nga Kini mismo ang Kamatuoran.

⁴¹ Siya mao ang Usa nga nagapadala Niini, tungod kay siguradong dili kini...Kini alang kanako sama ra sa, usa ka leksyon, maingon man pud kaninyo. Ug busa kami... Mapasalamaton gayud ako alang sa—sa—sa kahibalo, ang mahibaloan karon gikan sa Ginoo, kung unsa na nga takna ang atong ginapuy-an; kita n'yo, ania kita mismo katapusang panahon, sa dili pa ang pagbiya sa Iglesia. Karon lamang...

⁴² Kaganina pa kita nagpakigsulti, busa ato nang pangayoon usab ang Iyang mga pagpanalangin sa Pulong.

⁴³ Among Langitnong Amahan, ania karon ang dakung gabii, usa ka mahimayaong takna sa dihang usa ka dakung butang ang nahitabo. Anaa na kini palibot sa mga tawo. Ug Amahan, nagaampo ako nga karong gabhiona mapadayag kini, sa wala gayud og pagduhaduha, ngadto sa mga kasingkasing ug hunahuna sa mga tawo, nga mahibaloan nila nga ang Dios anaa pa sa gihapon sa Trono, ug nga ginahigugma Niya sa gihapon ang Iyang katawhan.

⁴⁴ Ug mao kini ang oras, takna nga gipangandoy sa kalibutan nga makita, nga nagapaduol na karon, tungod kay nagatuaw na kini alang sa pagtubos. Makita namo ang mga elemento nga andam nang dalhon kini pabalik. Makita namo ang mga elemento nga andam nang dalhon ang Iglesia padulong ngadto sa Presensya ni Cristo. Makita namo ang—ang Pangasaw-onon nga nagakaporma na, nagasul-ob og bisting pangkasal, nangandam na. Makita namo ang mga kahayag nga nagapangidlap. Nahibalo kami nga ania na kami sa katapusan.

⁴⁵ Karon, Langitnong Amahan, samtang magapadayon kini karon paingon sa pagwali, o paingon sa pagpanudlo mahitungod niining daku, gamhanang hitabo nga nahitabo didto sa Himaya, mga duha ka libo ka tuig na ang milabay, ug gihatag kaniadto ngadto sa halangdong minahal nga apostol, si Juan. Ug karong gabhiona magahisgot kami bahin Niini. Itugot ang Balaang Espiritu nga moanhi karon diha sa Iyang gamhanang Gahum sa pagpadayag, nga Iyang ipadayag kanamo ang butang nga gusto

Niyang mahibaloan namo, sama sa Iyang gibuhath sa pipila na ka ulahing mga gabii. Ginatugyan namo ang among kaugalingon nganha Kanimo, uban sa Pulong, sa Ngalan ni Jesus. Amen.

⁴⁶ Karon, kung gusto ninyong ablihan, tingali, sa inyong mga Biblia. Ug usa ra kini ka mubong bersekulo, usa ra ka bersekulo sa Kasulatan. Apan, kini mao ang katapusang bersekulo, makita kini sa . . . ang katapusang Selyo, diay.

Karon, sa miaging gabii gihisgotan nato ang bahin sa Ikaunom nga Selyo.

⁴⁷ Sa unang Selyo, ang anticristo gipaila pa lang. Nagpadayon ang iyang panahon, ug nakita nato kung giunsa niya paggula.

⁴⁸ Kung unsa nga ang mapintas nga Mananap naipaila, sa Gahum sa Dios nga migula dungan sa anticristong gahum, aron pakigbatokan kini! Dili ko motoo nga magkaaduna pa og pangutana sa hunahuna ni bisan kinsa bahin niini.

⁴⁹ Dayon makita nato, nga sa wala madugay human niana, kanang kapanahonan sa iglesia, kanang mga Mananap wala na.

⁵⁰ Pagkahuman niana, nahibaloan nato, gibag-o nato, ang tibuok hulagway, wala na'y mga Mananap nga minggula. Kita n'yo? Apan, kini nagapaduol na, nagapaingon na, ngadto sa panahon sa Kasakitan, human nga mibiya na ang Iglesia.

⁵¹ Hingpit kaayo ang pagkatakdo niini sa mga kapanahonan sa iglesia! Wala gyud ko'y makita ni usa ka tipik, ni usa ka butang nga dili hingpit nga mitakdo, bisan sa mga kapanahonan ug sa tanang butang, ug sa mga panahon. Hunahunaa kana. Kana nagapakita, nga ang Dios ang nagbuhath niana. Ang tawhanong panghunahuna dili makatugkad niana. Ug karon nahibaloan na nato kana, usab, atong . . .

⁵² Gitugotan kita sa Ginoo nga ipakita diha sa Kasulatan, sa Balaang Kasulatan, kung unsa ang giingon ni Jesus nga mahitabo. Ug sa unsang paagi nga nakita nato kini? Ug ania, miabot lang ug gipadayag, ug gihatud kini nga tukma gayud. Ang Iyang wali dinha, sa pagtubag Niya niadto, eksakto Niyang gipahayag ngadto sa punto, ang unom sa mga Selyo, apan gilaktawan Niya ang Ikapito. Kita n'yo?

⁵³ Dayon sa dihang giablihan ang mga Selyo, ang Dios, himatikdi dinhi, gilaktawan Niya ang pagpadayag bisan man lang og unsa nga simbolo sa Maong Ikapito. Kita n'yo? Usa kini ka hingpit nga sekreto para sa Dios. Matikdi. Karon magabasa kita sa Biblia, diha sa—sa Ikapitong Selyo. Makita kana sa Pinadayag, ang ika-8 nga kapitulo.

Ug sa paghubad niya sa ikapitong selyo, adunay kahilum sa langit sa may tunga sa takna.

⁵⁴ Ug mao lang kana nga aduna kita niini. Karon mamatikdan nato.

55 Ug paningkamotan ko nga dili kamo mapadugay, tungod kay daghan sa inyo ang magbiyahe, pa, niining gabhiona, manguli. Ug nahunahunaan ko pud, nga ipahigayon na ang panerbisyo sa pagpang-ayo kaganinang buntag, para puede na mong makalakaw sa buntag, dili na magkinahanglan nga magpahulat pa. Ug karon kita . . .

56 Ug ako, pud, nagkinahanglan nga mobiyahe paingon sa—sa Tucson, Arizona, kon diin ako nagapuyo. Ug mao na kini ang akong pinuy-anan karon. Ug dayon ako—gusto kong mobalik dinhi, kung itugot sa Ginoo, sa mga . . .Gusto pud sa pamilya ko nga mobalik sulod sa pipila ka adlaw pag-abot sa Hunyo. Ug, karon, tingali mahimamat ko kamong tanan dinhi, sa usa ka panagtigum nianang panahona.

57 Ang sunod kong gikatakda nga panerbisyo mao ang Albuquerque, New Mexico. Siguro sa ikanuebe, ikanapulo, ug sa ika-onse. Didto ako sa Huwebes ug Biyernes Santo. Busa, ako ra ang mamumulong sa maong tibuok nga buluhaton, ug aduna pa ako unta og uban pang adtoonon pero dili ko na mahimo kini hangtud nianang panahona, busa didto ko sa Huwebes sa gabii ug Biyernes sa gabii, sa Albuquerque, New Mexico.

58 Ug dayon—ug dayon ang—ang sunod, mahibal-an na lang, paghaduol na, kalagmitan. Wala pa kami mahibalo kung sigurado. Mahimong didto na kini sa buutan kong mga higala, ang—ang grupo sa *The Midnight Cry*, didto sa . . .didto sa Southern Pines, North Carolina.

59 Ug nakakonekta sila sa telepono karon didto, kon diin, nagpadala na sila og mga telegrama, mensahe, ug tanan na, ug ginapaadto ako, para sa usa na usab ka grupo, didto sa Little Rock; sa mga tawong Jesus' Name nga gipahigayonan ko og mga panagtigum, didto sa Cow Palace sa miaging tinginit. Ipahigayon kono nila ang ilang konbensiyon didto sa Little Rock, Arkansas. Ug sila, sukad pa niadtong miaging tuig, dugay nang mihangyo og bisan usa ra kono ka gabii. O, gusto gani nga ako na sa tibuok niini, apan okey ra sa ila bisan og usa ra ka gabii. Ug busa gisulti ko kanila, nga wala pa ko mahibalo kung unsay buhaton, ang sulti ko lang nga mahimo na nilang ipahibalo kini, “kalagmitan.” Dayon ila lang ipahibalo kini usab pagkahuman niana.

60 Gitawag na ba niya? Uh-huh. Sige. Unsa’y gisulti? [Usa ka igsoong lalaki ang miingon, “Hot Springs.”—Ed.] Hot Springs, ba? Nasayop diay ko. [“Sa ikabaynte-kuwatro.”] Ikabaynte-kuwatro sa . . .[“Mayo.”] Mayo? [Adunay miingon, “Sa ikabaynte-kuwatro hangtud ikabaynte-oo tsa Hunyo.”] Sa ikabaynte-kuwatro hangtud ikabaynte-otso sa Hunyo. Karon naipahibalo na kini, “Malagmit,” kana maoy, “kung kini mao ang kabubut-on sa Ginoo.” Kita n’yo? Ako . . .

⁶¹ Ania ang hinungdan nga gusto kong buhaton kining mga butanga. Mahibaloan ninyo kini sa dili madugay, karon, kita n'yo. Pag moadto ako sa usa ka lugar, gusto kong itunob ang akong mga tiil didto, nga nasayod nga gisulti sa Dios, "Pag-adto didto." Dayon kon motungha man ang kaaway sa kung asa man, makaingon ako, "Ako mianhi sa Ngalan ni Ginoong Jesus. Humawa ka!" Kita n'yo? Kita n'yo? Kita n'yo? Ug ikaw—sigurado ka, sa imong ginatindogan, kita n'yo. Sa dihang ipadala ka Niya sa kung asa man, atimanon ka Niya. Kita n'yo? Apan kung miadto ka, nga nagapamasin lamang, kung ingon-ana ambot lang; mahimong wala Siya dinha. Busa ako—gusto kong siguradohon gayud kutob sa mahimo ko. Daghan nang mga higayon nga duna ko'y giadtoan nga wala Niya gisulti nga adtoan ko, apan ako—gusto kong mamahimong ingon ka sigurado gayud kung mahimo. Ang Ginoo magapanalangin kaninyong tanan karon.

⁶² Karon, karon mamatikdan nato, kini ingon nga usa ra ka bersekulo, aduna lang kita'y buhaton og medyo—medyo gamay ra sa dili pa niini. Inyong mamatikdan, gilaktawan nato ang ika-7 nga kapitulo. Ang ika-6 nga kapitulo natapos sa Ikaunom, sa Ikaunom nga Selyo. Apan, sa tali sa Ikaunom nga Selyo ug sa Ikapitong Selyo, adunay butang nga nahitabo. Kita n'yo? Ug unsa—daw sa unsa ka maanindot nga napahiluna kana sa hustong lugar niini, tali sa, ika-6 ug ika-7 nga kapitulo. Karon inyong mamatikdan diha sa ika-7 nga kapitulo, mamatikdan nato, sa tali sa Ikaunom ug Ikapito, adunay usa ka lak-ang. Usa ka lak-ang, tali, sa ika-6 ug ika-7 nga kapitulo sa Basahon sa Pinadayag, ug kini maoy tali sa Ikaunom ug Ikapitong Selyo nga kining lak-ang gipahiluna. Karon gusto natong mamatikdan kini. Importante kaayo kini nga mamatikdan nato kining diyutay'ng panahon.

⁶³ Karon hinumdumi, human sa ika-4 nga kapitulo sa Pinadayag, ang Iglesia wala na. Human nga nangabayo ang—ang upat ka mga mangangabayo, ang Iglesia wala na. Kita n'yo? Ang tanang butang nga nahitabo sa Iglesia, nahitabo hangtud sa ika-4 nga kapitulo sa Basahon sa Pinadayag. Ang tanang butang nga nahitabo sa kalihokan sa anticristo, nagpadayon hangtud sa ika-4 nga kapitulo. Ug ang Ikaupat nga Selyo sa Pinadayag, parehong sa anticristo ug kang Cristo, natapos. Ug ang anticristo miabot sa iyang katapusan, uban sa iyang kasundalohan; ug si Cristo miabot uban sa Iyang kasundalohan.

⁶⁴ Usa kini ka dugay na gubat nga nagsugod pa kaniadto, sa wala pa ang panahon. Ug dayon sila kaniadto. . . Si Satanas ug ang iyang mga manulonda gipalagpot, ug dayon miabot sila sa yuta. Ug ang gubat nagsugod na usab, tungod kay giguba man ni Eva ang balabag nga maoy nagpanalipod kaniya kaniadto, luyo sa Pulong sa Dios. Ug sukad mismong niadtong taknaa, gidaug ni Satanas ang pagpakiggubat batok sa Pulong sa Dios, tungod kay

ang usa sa Iyang mga sakop, ang pinakahuyang, gipaubos man niya ang panagang. Ug eksaktong sa ingon nianang paagi niya gidaug ang pagpakiggubat sa matag higayon, tungod kay usa sa Iyang mga sakop gipaubos man ang panagang nga Pulong.

⁶⁵ Ug napahigayon kini sa niining katapusang kapanahonan sa iglesia, pinaagi sa usa ka sistemang organisasyon. Nga, ang matuod, tinuod, balaang iglesia sa buhi nga Dios, tungod sa bakakon nga mangangabayo, dili na modawat sa Pulong, ug gipasimang ang iglesia gikan sa Pulong paingon sa dogma.

⁶⁶ Karon, pila man ang nakahibalo nga natukod sa dogma ang iglesiang Romano Katoliko? [Nagaingon ang kongregasyon, “Amen.”—Ed.] Ginaangkon ba nila kini? Sa bug-os mismo. Sigurado. Sa pagkatinuod, ginaangkon nila kini. Dili lamang kana. Ang Katoliko, siguradong, dili kini makapasakit sa ilang mga pagbati bisa’g gamay, tungod kay nahibalo man sila niana. Aduna sila’y bag-o nga gidugang, dinhi dili pa lang dugay, nga si Maria nabanhaw kono kaniadto. Mahinumduman ninyo kini, dinhi pipila ka tuig pa lang ang milabay, mga napulo pa lang ka tuig. Pila man ang nakahinumdum niana? [“Amen.”] Sa mantalaan, dinha. Sigurado. Kita n’yo? Ang tanan gayud, duna pa’y bag-ong “dogma.” Kita n’yo, ang tanan-tanan niini dogma, dili Pulong. Kita n’yo?

⁶⁷ Usa ka pari, diha sa usa ka pagpakighinabi bag-ohay lang, miingon siya, “Mr. Branham,” miingon siya, “Ang Dios anaa sa Iyang iglesia.”

Miingon ko, “Ang Dios anaa sa Iyang Pulong.”

Miingon siya, “Dili man kita angay makiglalis.”

⁶⁸ Miingon ko, “Wala ako nagapakiglalis. Nagahimo lamang ako og pamahayag. Ang Dios anaa sa Iyang Pulong. Husto kana. ‘Ang si bisan kinsa nga magatangtang sa unsang mang butang gikan Niini, o magadugang og unsa man ngadto Niini,’ maoy giingon sa Pulong.”

⁶⁹ Miingon siya, “Bueno, ang Dios naghatag man. . . Gihatagan man ni Cristo ang Iyang Iglesia og gahum, ug giingnan sila: nga kung unsa man ang pagabugkuson nila sa yuta, pagabugkuson didto sa Langit; ug kung unsa. . .”

Miingon ko, “Eksaktong Kamatuoran kana.”

⁷⁰ Miingon siya, “Aduna kami, og. . .basi niining prinsipyo, aduna kami og kagahum nga magpasaylo og sala.”

⁷¹ Ug miingon ko, “Kung pagabuhaton ninyo kana sa paagi kung giunsa pagkahatag niini sa Iglesia, ug sa paagi nga gibuhat nila kini, dawaton ko kini. Kung ginabuhat ninyo, adunay tubig dinhi, aron ikaw ‘mabautismohan sa Ngalan ni Jesus Cristo alang sa kapasayloan sa inyong mga sala,’ kita n’yo, dili tungod kay gisulti sa usa ka tawo nga ang inyong sala gipasaylo na.” Kita n’yo? Kita n’yo? Husto kana.

72 Tan-awa si Pedro nga may mga yawi, sa Adlaw sa Pentecostes. Hinumdumi, anaa kaniya ang mga yawi nga ginahisgotan nila. Ug ang—nanag-ingon ang mga tawo, “Mga kalalaken-an ug mga igsoon, unsa may among buhaton aron mamaluwas?”

73 Miingon si Pedro, “Maghinulsol, ang tagsatagsa kaninyo, managpabautismo sa Ngalan ni Jesus Cristo” (alang sa unsa?) “alang sa pagpasaylo sa mga sala, ug dayon madawat ninyo ang gasa nga Espiritu Santo. Kay ang saad alang kaninyo, ug sa inyong mga anak, sa tanan nga atua sa halayo, bisan sa matag-usa nga pagatawgon sa Ginoo nga atong Dios.” Husto kana. Mao na mismo kana hangtud sa kahangturan. Tapos na. Mao kana ang nagtapos niini.

74 Karon, apan, nakita ninyo, misulod ang anticristo, sama sa pagkahulagway nato niini ug pagkapakita niini. Daw sa unsa nga kapadayagan! Grabe, grabe gayud! Ug ang hunahunaon nga, sa tanan niining nangaging mga katuigan, nakita nato ang pagpanglihok niini. Ug ania kining hingpit, direktang, MAO KINI ANG GINAINGON SA GINOO.

75 Karon, ug mamatikdan nato kining lak-ang karon, tali sa, sa ika-6 ug sa ika-7 nga kapitulo. Karon, ang ika-7 nga kapitulo sa Pinadayag, ania ang usa—usa . . . usa ka panghitabo nga ginapadayag. Dili mahimo nga nakasulat kini dinhi nga walay rason. Dili kini nga ginabutang lang, sa taliwala niini, nga walay rason. Kita n’yo? Ania kini dinhi tungod sa usa ka katuyoan, ug kini usa ka kapadayagan nga nagapadayag sa usa ka butang. Himatikdi kung unsa ka mysteryoso ug daw sa unsa ka tukma kaayo kini sa matematikong paagi diha sa Kasulatan! Kita n’yo? Husto gyud.

76 Nagatoo ba kamo sa matematika sa Dios? [Nagaingon ang kongregasyon, “Amen.”—Ed.] Kung dili kamo motoo, siguradong mawala gyud kamo diha sa . . . Siguradong mawala gyud kamo diha sa Pulong, pag magsugod ka magpasulod og upat o unom, o—o unsa man, gawas sa matematikong mga pulong diha sa kahan-ayan. Siguradong magkaaduna ka og imong eksinang, usa ka baka nga nagsabsab og sagbut ibabaw sa usa ka punoan, sa kung asa man. Siguradong mosimang gyud ka. Tungod kay, ang Dios dili . . . Ang Iyang tibuok Pulong bug-os nga nagalihok sa—sa—sa matematika. Oo, sir. Hingpit, sa hingpit gayud! Wala na’y uban pang literatura nga gisulat sama Niini, sama Niini, pagkahingpit gayud diha sa mate—matematika.

77 Karon, ang—ang ika-8 nga kapitulo ginapadayag lamang ang panghitabo sa—ang panghitabo sa Ikapitong Selyo, kon diin wala na’y uban ang gipadayag, karon, wala gayud. Wala gyu’y gipadayag diha sa Ikapitong Selyo . . . karon, wala kana’y kalabotan sa ika-7 nga kapitulo sa—sa Pinadayag. Kining pagpadayag, sa Ikapitong Selyo, hingpit gayud nga hilum. Ug

kung aduna lamang ako og oras . . . Pagasulayan ko ang pipila ka dapit, aron ipakita kaninyo.

⁷⁸ Gikan pa sa sinugdanan, gikan sa Genesis, kining Ikapitong kapi . . . o kining Ikapitong Selyo maoy—maoy—maoy gihisgotan na. Gikan sa pinakasinugdanan, sa Genesis, kining Ikapitong Sel . . .

⁷⁹ Nagsige og padayon kining mga Selyo. Wala ba ninyo mahinumduman, kaganinang buntag, sa paghisgot nato niining mga butanga? Ug bantayi, niining gabhiona, sa paghisgot nato niini. Ug makita ninyo, sa dihang miabot kini ngadto sa Ikapitong Selyo, naputol kini. [Ginapapiti ni Igsoong Branham ang iyang tudlo sa makausa—Ed.] Oo.

⁸⁰ Si Jesus Cristo, sa paghisgot, Niya mismo, nagsulti Siya bahin sa katapusang panahon. Ug sa dihang nakaabot Siya . . . Gisulti Niya tanan ang unom ka mga Selyo. Ug sa dihang nakaabot Siya sa Ikapito, mihunong Siya. Tan-awa, kita n'yo. Usa kini ka dakung butang.

⁸¹ Karon, karon, pagahisgotan nato dinhi karon ang mahitungod niining ika-7 nga kapitulo, sa makadiyut lamang, aron—aron medyo makonekta nato og diyutay kini dinhi, tali sa Ikaunom ug Ikapitong Selyo. Tungod kay, kana lamang ang bugtong materyal nga aduna kita aron magpadayon, mismo karon, mao ang Ikaunom . . . tali sa Ikaunom ug Ikapitong Selyo, nga mao ang pagtawag pagawas sa Israel.

⁸² Karon, aduna ko og daghang buutan nga mga higala nga Jehovah Witness nga naglingkod dinhi, nga tanan . . . o mga dugay na. Tingali ang uban kanila mga Jehovah Witness pa sa gihapon. Apan kanunay nilang ginaaplikar, ang gihimo ni Mr. Russell, nga kining usa ka gatus ug kuwarentay-kuwatro ka libo, mga supernatural nga Pangasaw-onon kono ni Cristo. Kita n'yo? Sila . . . Dili kana mao.

⁸³ Wala man lang kini kahilambigitan sa kapanahonan sa iglesia, wala gayud. Bug-os silang mga Israel. Karon, magbasa kita sa pipila ka mga minuto. Karon, kining lak-ang, tali sa Ikaunom . . . ang mga Selyo, maoy pagtawag ug pagpangselyo sa usa ka gatus ug kuwarentay-kuwatro ka libo ka mga Judio, nga gitawag sa panahon sa Kasakitan, human nga gisakgaw ang Iglesia. Kita n'yo? Wala gyud kini kahilambigitan sa kapanahonan sa iglesia, man lang. Oh, maoy mga gitawag, ug hingpit kini mismong nagakatakdo sa Kasulatan. Ang ulahing tulo ug tunga ka mga semana ni Daniel, nga gikatagana sa “katawhan” ni Daniel, kita n'yo, dili sa mga Gentil. Sa “katawhan” mismo ni Daniel, ug si Daniel usa ka Judio!

⁸⁴ Karon matikdi, ang Israel, ginatoohan lamang sa Israel ang iyang mga propeta, ug, human nga sila gipamatud-an.

⁸⁵ Ug dili gayud makita sa tibuok kapanahonan sa iglesia, sukad pa sa nahaunang apostolikanhong Iglesia, nga ang

Protestanteng iglesia nagkaaduna sukad og usa ka propeta. Sultihi ko kon kinsa man kadto, ug ipakita kini sa ako. Wala sukad! Nagkaaduna sila, niadtong nahaunang apostolikanhong kapanahonan, sa usa ka gitawag nga Agabus, nga usa ka gipanghimatud-an nga manalagna. Apan sa... Sa dihang misulod ang mga Gentil, ngadto sa panulondon sa Dios, ug miadto si Pablo ngadto sa mga Gentil. Human ni Pedro, sama sa gibasa nato kagabii, nadawat niya gikan sa Ginoo, nga, “Magakuha Siya og usa—usa ka katawhan gikan sa mga Gentil, alang sa Iyang Ngalan, Iyang Pangasaw-onon,” dayon wala na sila nagkaaduna pa, bisan diha sa mga pahina sa kasaysayan, og usa ka Gentil nga manalagna. Karon baliki n’yo mismo sa tibuok kasaysayan ug hibaloa. Ngano man? Eksaktong, mamahimo man gyud kini nga supak sa Pulong. Eksakto.

⁸⁶ Sa dihang migula ang nahauna, usa kadto ka leon, mga manalagna *kadto*: Pulong.

Ang sunod nga migula, paghago, pagsakripisyo.

Ang sunod nga miabot, mao ang pagkamaalam na sa—sa tawo.

⁸⁷ Apan gisaaran kita, nga sa katapusang adlaw, igabalik ngadto sa Iglesia pag-usab, ang kaayohan alang sa pagpanulid sa kadtong mga nahisalaag, ang mga wala nakita, ang mga wala natiwas, mga gibiyaan nga wala napadayag. Tungod nga, gitagna na kini dinhi nga ang Mensahe sa ikapitong manulonda ang maoy magatapos sa mga misterio sa Dios. Ug, dayon, gihisgotan nato ang tibuok Niining tanan. Nakita nato nga hingpit Kini nga nagakatakdo sa Kasulatan. Kana mao ang rason.

⁸⁸ Karon, mahulagway ba ninyo, pagmoabot na kini nga tawo sa maong eksena? Pagmoabot siya, timan-i, mamahimo kining ubos kaayo ug ingon—anang mga butang, hangtud nga ang mga iglesia masipyat niini sa hilabihan ka halayo. Ug mahunahuna kaha ninyo, ang mga iglesia, nga napailalum pa sa tradisyon sa mga repormador, nga magadawat og usa ka propeta gikan sa Dios, nga mamahimong estrikto kaayong batok sa ilang mga pagtulon-an ug mga organisasyon?

⁸⁹ Karon, aduna lamang og usa ka tawo nga makahimo niana, usa ka Espiritu nga dugay nang miabot sa yuta, sa akong nahibaloan. Mahimong hain man sa... Siguradong si Elias kini, sa iyang panahon. At gitagna na kini kaniadto nga kini mamahimong, wala na’y uban pa kondili ang Espiritu ni Cristo.

⁹⁰ Sa dihang miabot si Cristo kaniadto, Siya mao ang kahupnganan. Siya ang Propeta. Siya mao ang—ang Dios sa mga propeta. Kita n’yo? Kita n’yo?

⁹¹ Si Cristo, tan-awa kung giunsa nila Siya gikasilagan. Apan miabot lamang Siya sa eksaktong paagi nga giingon sa Pulong nga moabot Siya. Apan ingon nga Siya usa ka

Propeta, gipasipalaan nila Siya ingon nga ang ilang kaugalingon napahilayo gikan sa Gingharian sa Dios, tungod sa pagtawag sa Espiritu sa Dios, nga nagapang-ila kaniadto ug uban pa, “usa ka mahugaw nga espiritu.” Miingon, “Siya usa ka—usa siya ka manghihimalad, o usa ka yawa,” mao kana.

⁹² Ang manghihimalad usa ka yawa, kita n’yo, espiritu sa yawa. Sigurado. Nahibalo ba kamo niana? [Nagaingon ang kongregasyon, “Amen.”—Ed.] Walay duhaduha. Ang pagpanghimalad usa ka pagsundogsundog sa propeta, nga usa ka bug-os nga pagpasipala sa atubangan sa Dios.

⁹³ Karon himatikdi. Gipanawag, nga hingpit nagakatakdo sa mga Kasulatan, sa katapusang tulo ug tunga ka tuig ni Daniel.

⁹⁴ Matikdi, ang mga magtotoo sa Israel—silang mga magtotoo gisultihan gayud, diha sa Daang Tugon, nga toohan lamang ang ilang mga propeta human nga ang maong propeta gipanghimatud-an. “Kung adunay usa sa taliwala kaninyo, kinsa usa ka espirituhanon o usa ka propeta, Ako nga Ginoo Mis- . . . imong Dios maoy magpaila sa Akong Kaugalingon diha kaniya, ug mosulti ngadto kaniya diha sa mga panan-awon, pinaagi sa mga damgo, makahubad og mga damgo.” Ang si kinsa man nga adunay damgo, mahimong hubaron kini sa propeta. Ug kung—kung aduna siya’y panan-awon, igapamulong niya kini. “Igapaila Ko ang Akong Kaugalingon diha kaniya pinaagi sa mga panan-awon ug mga damgo, sa pagpaila sa Akong Kaugalingon. Ug kung unsa ma’y iyang ginasulti nagakatuman, kung ingon-niana magpapatalinghug kamo nianang propeta, tungod kay Ako nagauban kaniya. Kung dili kana nagakahitabo, nan ayaw siya’g kahadloki.” Oo. Husto kana. “Pahilayo kaniya, pasagdi siya, kita n’yo.” Karon nga . . .

⁹⁵ Karon, kanunay’ng ginatoohan kana sa Israel. Ug wala n’yo ba kana nakita? Tungod kay ngano man?

Karon gusto kong makuha ninyo og ayo kini nga pagtulonan, niining gabhiona, karon.

⁹⁶ Ngano man? Tungod kay, sugo kana gikan sa Dios, sa ila. Dili ko igsapayan kung unsa pa ka daghan nga gagmay’ng-basahon ang dalhon sa mga Gentil didto ug ipakaylap. Dili ko igsapayan kung bisan pila ka kahigayon ka moadto sa Israel nga dala ang Biblia ilalum sa imong bukton, nga nagapamatuod *niini*, *niana*, ug ang *uban pa*; dili gyud sila modawat og bisan unsa gawas sa usa ka propeta. Eksakto gyud kana. Tungod kay, ang propeta mao lamang makadawat sa Balaanong Pulong ug makapahiluna Niini sa hustong puwesto Niini, ug mamahimong ingon nga usa ka gipanghimatud-an nga propeta. Nan toohan nila kini. Husto kana.

⁹⁷ Sa dihang nakigsulti ako kaniadto sa usa ka Judio dinhi sa Benton Harbor niadtong si John Rhyn, ingon nga usa ka buta nga tawo sa tibuok niyang kinabuhi, halos, ang nakadawat sa iyang

igtatan-aw. Gidala nila ako didto, niadtong balay ni David. Ug migawas kining rabbi nga adunay hataas nga balbas. Miingon siya, “Pinaagi ba sa unsang pagbulot-an nga nahatag mo ang panan-aw ni John Rhyn?”

Ingon ako, “Sa Ngalan ni Jesus Cristo, ang Anak sa Dios.”

⁹⁸ Miingon siya, “Halayong mahitabo nga magkaaduna og usa ka Anak ang Dios!” Kita n’yo? Ug miingon siya, “Dili ninyo mahimong putol-putolon ang Dios sa tulo ka buok ug ihatag Siya ngadto sa usa ka Judio. Maghimo og tulo ka Dios gikan Kaniya; usa kamo ka pundok sa mga pagano!”

⁹⁹ Ingon ko, “Wala ko man Siya giputol sa tulo ka buok.” Miingon ko, “Rabbi, dili ba nga usa ka talagsaong butang alang kanimo nga toohan nga ang usa sa inyong mga manalagna nagsulti og . . . usa ka butang nga sayup?”

Miingon siya, “Ang among mga manalagna wala gyud magsulti og unsa mang butang nga sayup.”

Ingon ko, “Kinsa man kining gihisgotan sa Isaias 9:6?”

Miingon siya, “Ang Mesias.”

¹⁰⁰ Ingon ko, “Kung ingon niana, ang Mesias mamahimong usa ka Tawong-Manalagna. Husto ba kana?”

Miingon, “Oo, sir. Husto kana.”

¹⁰¹ Ingon ko, “Ipakita mo kanako kon diin nga wala kini natuman ni Jesus.” Miingon siya . . . ingon ko, “Unsa ma’y mamahimong relasyon sa maong Tawong-Mesias ngadto sa Dios?”

Miingon siya, “Siya mao ang Dios.”

Ingon ko, “Husto kana. Karon nakuha mo eksakto sa Pulong.”

¹⁰² Busa tabangan ako nga, kadtong Judio sa pagtindog niya didto ug midagayday ang mga luha sa iyang aping, nga nagaingon, “Maminaw ko kanimo usa ka higayon sa sunod.”

Ingon ko, “Rabbi, nagatoo ka ba niana?”

¹⁰³ Ug miingon siya, “Tan-awa,” miingon siya, “Ang Dios makahimo niining mga bato sa pagpatindog og mga anak alang kang Abraham.” Kabalo ko nga sa Bag-ong Tugon siya nagakutlo.

Miingon ko, “Husto, Rabbi! Karon unsa ma’y ingon mo bahin niini?”

¹⁰⁴ Miingon siya, “Kung iwali ko kana, mapaingon lang ko sa ubos didto,” kabalo mo ang ila man gud bilding napahimutang didto sa mga bungtod, “mapaingon gyud ko didto sa dalan, nagapakilimos na sa akong tinapay.”

¹⁰⁵ Ingon ko, “Palabihon ko pa nga maatua didto nga nagapakilimos sa akong tinapay.” Mas nakatutok pa man gud sa

gihapon ang mga Judio sa salapi, kabalo na mo. Kita n'yo? Kita n'yo? "Palabihon ko pa nga . . ." Ug ang iyang ngalan nakasulat pa gihapon sa bulawan, sa . . . Ingon ko, "Palabihon ko pa nga maatua didto, nga nagakaon lang og biskwit ug nagainom og tubig gikan sa sapa, ug nahibalo nga ako may panagkauyon sa Dios, ug matinud-anon; kay sa maania ako ug bisan nakasulat pa ang akong ngalan diha nianang bilding, diha sa bulawan nga mga letra nga sama niana, ug nasayod nga napahalayo sa Dios. Nasayod ako niana." Ayaw na niyang maminaw pa kanako, busa nga misulod na siya.

¹⁰⁶ Apan mao gyud kana. Dili ninyo maputol-putol ang Dios sa duha o tulo ka bahin, dayon tawgon og "Amahan, Anak, ug Espiritu Santo," ug himoon nga tulo ka Dios ug ihatag kini ngadto sa Judio. Ang pinakasugo Niya mao ang, "Dili ka magbaton ug laing mga dios sa atubangan Ko. Ako ang Ginoo nga imong Dios." Unsa ang giingon ni Jesus? Miingon si Jesus, "Patalinghugi, Oh Israel, Ako ang Ginoo nga inyong Dios, ang usa ra nga Dios." Dili tulo; dili mo gayud maihatag kana ngadto sa ila. Dili. Walay propeta nga sukad nagsulti mahitungod sa tulo ka Dios. Wala. Bisan asa. Wala mo'y madungog og ingon niana. Wala, sir. Paganhon kana ug dili sa Cristianismo kana nagsumikad. Oo, sir.

¹⁰⁷ Matikdi. Apan magaabot kini nga mga propeta. Dili lamang kana . . . Ang—ang maong mga propeta, karon, diha sa Pinadayag 11. Nabasa nato ang pipila niini. Ug gusto kong basahon ninyo kini samtang nagtuon kamo, sa mga teyp ug uban pa. Bug-os gyud sila nga gipanghimatud-an nga mga propeta, pinaagi sa ilhanan nga iya sa mga propeta. Kung ingon-ana patalinghugan kini sa Israel.

¹⁰⁸ Karon, sa inyo, nga akong mga higalang Saksi ni Jehovah, sabta karon nga kining, usa ka gatus ug kuwarentay-kuwatro ka libo, walay kalambigitan sa Pangasaw-onon. Wala ni usa ka gamay'ng Kasulatan ang makasuporta niana. Wala, sir. Dili sila ang Pangasaw-onon. Mga Judio man sila. Sila ang mga pinili nga gitawag pagawas sa sulod sa panahon sa katapusang tulo ug tunga nga tuig sa kapitoan ka semana ni Daniel. Karon kana'y . . .

¹⁰⁹ Ako—kanunay kong ginakutlo kana. Dili lamang kaninyo'ng tanan nga ania dinhi, kondili, kita n'yo, sa mga tawo, didto sa mga lugar nga padulngan niining mga teyp, nakita n'yo. Ug nasabtan ninyo kana. Madungog ninyo ako nga balik-balik ko kana ginakutlo. Tungod kini nianang maong katuyoan.

¹¹⁰ Matikdi. Karon tan-awa kung giunsa nga sila kinahanglan, mabutahan, nakita ba ninyo kung giunsa nga kinahanglan sila . . . ? Si Jesus, o, kinahanglan nga butahan sa Dios ang mga Judio, aron dili nila maila si Jesus. Kay kung nailhan lamang nila, kung nailhan lamang nila nga kadto ang . . . Kung nakita

lang unta nila ang ilhanan nga gihimo Niya, kung anaa lamang sila sa husto nga kondisyon, sama nga sila kaniadto napailalum pa sa kasugoan sa dihang naghatag ang Dios kanila og sugo mahitungod sa usa ka propeta, ug dayon nakita nila si Jesus nga gituman kana, nakaingon unta sila, “Mao kini ang Mesias.” Nganong ingon niana man?

111 Pero kadtong mga anaa niadtong kapanahonan, nga ang ilang mga ngalan nahisulat sa Libro sa Kinabuhi sa Kordero, nga Iyang mga apostoles ug uban pa, nakita nila kini ug naila kini.

112 Nganong wala nakita sa tanang uban pa kanaila? Kita n’yo, nangabuhatan man sila. Dili nila mahimong makita kini. Dili nila makita kini, hangtud karon. Ug dili gyud nila makita kini hangtud nga maipanganak siya sa espirituwal ingon nga nasud, sa usa ka higayon. Kana dili mahimong . . .

113 Ang Pulong dili mahimong mapakyas. Hinumdumi, ang Pulong dili gyud mapakyas. Dili ko igsapayan kung pila pa ka mga sensasyon aduna kamo, ug kung unsa ang magakahitabo, kana Pulong sa gihapon dili gyud mapakyas. Mamatuman gyud kini sa ingon ka eksakto sa pagkasulti sa Dios niini. Kita n’yo? Karon, naamgo nato nga kining mga butanga kinahanglan mahitabo.

114 Ug kana ang rason nga wala nila naila si Jesus sa dihang gipaila Niya sa hingpit ang Iyang Kaugalingon ingon nga Propeta.

115 Bisan ang gamay’ng—makaloolooy’ng tigulang nga Samarianhon nga babayeng atua didto duol sa atabay. Wala pa si Jesus sukad nakaadto sa Samaria; Basta nalang Siya miadto didto, miingon Siya nga gikinahanglan Niyang moadto niadtong lugara, ug miadto Siya mismo didto. Ug atua didto ang makaloolooy’ng babaye. Ug ang babaye, bisan siya anaa sa maong kahimtang, mas siya ang anaa sa mas maayong kahimtang aron dawaton ang Ebanghelyo kay sa niadtong mga relihiyosong mga pari ug ingon-anang mga tawo niadtong adlawa. Gidawat mismo sa maong babaye. Sigurado. Karon, kita n’yo?

116 Apan, walay sapayan sa bug-os nilang pagsalikway, bisan pa niana ang usa sa ilang pinaka-halangdong tawo nagpahayag nga sila kono nasayod mismo nga Siya maoy usa ka Magtutudlo nga gipadala gikan sa Dios.

117 Nagpakig-estorya ako sa usa sa pinakamaayong doktor nga aduna sa habagatang estado, didto sa iyang opisina, dili pa lang dugay. Usa ka maayo kaayong espesyalista didto sa Louisville, usa ka halangdon kaayo nga tawo. Ug ako miingon kaniya, ingon ko, “Doktor, gusto kong mangutana kanimo.”

Miingon siya, “Sige.”

118 Ingon ko, “Namatikdan ko ang inyong pangmedisinang ilhanan, ang sungkod. Aduna kamo og bitin nga nakabalikos sa maong sungkod. Unsa man ang girepresentar niana?”

Miingon siya, “Wala ko kahibalo.”

119 Ug ingon ko, “Nagsimbolo kini og alang niini: simbolo kini sa Balaanong pagpang-ayo, sa diha nga giisa ni Moises ang tumbaga nga bitin didto sa kamingawan, kita n’yo, nga maoy simbolo lamang, usa lamang ka simbolo sa tinuod nga Cristo.”

120 Karon, niining panahona, ang medisina usa ka simbolo sa Balaanong pagpang-ayo. Ug bisan pa nga daghang mga tawo wala nagatoo niini, ang matuod og maayong mga doktor nagatoo mismo niana. Apan ang pipila sa ila dili motoo niana. Pero ang pinaka-simbolo nga ilang ginapaluyohan nagapamatuod mismo sa Gahum sa Makagagahum nga Dios, gusto man nilang tohan kini o dili. Kita n’yo? Husto kana. Kana ang tumbagang bitin nga nagbitay sa usa ka haligi, ingon nga simbolo sa mga doktor.

121 Karon matikdi kining mga Judio. Karon, ang mga himbis sa pagkabuta anaa sa mga mata niining mga tawo. Sila, dili nila malikayan kini; anaa kini kanila, ug gibutang kini sa Dios dinha. Ug ingon niana sila hangtud sa panahon nga gisaad para sa ila, kining moabot mga propeta. Magpadala man kamo og mga misyonaryo, buhaton man ninyo kung unsa man ang gusto ninyo; ang Israel dili gayud makabig hangtud nga moabot sa eksena kining maong mga propeta, ug mahitabo lang kana human sa Pagsakgaw sa IgleSIANG Gentil.

122 Sama ra kini nga ang kapanahonan sa laking-baka dili makadawat sa tawag sa leon, tungod kay giingon na sa Dios diha sa Iyang Pulong nga Espiritu sa laking-baka ang maoy mogula. Ug sa kapanahonan usab sa mga repormador, tawo ang migawas. Kita n’yo? Inyo lang . . .

123 Kana lang ang butang nga inyong . . . ilang madawat. Kana’y . . . Ug, didto karon, buta gyud sila. Kana lang gyud ug wala na. Karon matikdi.

124 Apan moabot ang panahon sa dihang ang mga Gentil matapos na. Aduna kaniadto og usa ka punoan, ug Judio ang mga gamut niini, ug giputol kini; ug gisumbak ang Gentil, “ang ihalas, nga kahoy’ng olibo,” ug nagapamunga na kini. Karon, sa dihang putlon na kanang Gentil nga Pangasaw-onon, kanang maong kahoy’ng Pangasaw-onon nga gihisgotan ko, ug gisakgaw na ngadto sa Presensiya sa Dios; pagapapason sa Dios kining dili-magtootoo nga mga Gentil, sama niining bahin (sa nagakatulog nga mga dalagang-ulay), ug magsumbak pag-usab. Gisaad Niyang pagabuhaton kini.

125 Ug hangtud nianang panahona, kinahanglan nga mahibaloan mo kung asa ka . . . Pero kung kabalo ka kung asa ka paingon, bueno, maayo. Kung wala ka kahibalo, aba, mapandol ka diha sa mangitngit.

126 Karon, dinha kon diin ang mga Judio mangakabig, sulod nianang panahona. Karon, sama sa kapanahonan sa iglesia, ilalum sa gahum sa dinihogan nga saad, madawat nila si Cristo; apan, sa karon, dili pa samtang panahon pa sa mga Gentil. Karon makita nato kung unsa nga matang sa mensahe nga kining duha ka mga propeta, sa Pinadayag ang ika-11 nga kapitulo, igawali. Karon tin-aw kaayo ninyo makita kung unsa eksakto ang ilang pagabuhaton. Tungod kay, ang mga nahabilin, o ang usa ka gatus ug kuwarentay-kuwatro ka libo, nga mga gipililing-daan, magadawat sa Selyo sa Dios.

127 Basahan nato. Karon paminaw og ayo. Karon gusto kong ubanan n'yo ko sa pagbasa, kon mahimo n'yo, tungod kay ipahinungod ko kini pabalik taudtaud, sa ika-7 nga kapitulo, karon, kini maoy tali sa Ikaunom ug Ikapito nga Selyo.

. . . sa human niini—sa human niini (mga Selyo) . . .

128 Pagkabadbad sa Ikaunom nga Selyo, ug mao na kana ang kapanahonan sa Kasakitan. Nasabtan ba kana sa tanan karon? [Nagaingon ang kongregasyon, “Amen.”—Ed.] Pagkatangtang sa Ikaunom nga Selyo, ug magsugod na ang Kasakitan. Human niana, unsa man?

. . . sa human niini nakita ko ang upat ka manolunda nga nanagtindog sa upat ka pamag-ang sa yuta, nga ginapugngan nila ang upat ka hangin sa yuta, nga dili kini maghuyop ibabaw sa yuta, ni sa dagat, ni sa bisan unsa nga kahoy. (Upat ka Anghel!)

Ug nakita ko nga misaka ang usa na usab ka manolunda gikan sa silangan, nga adunay patik sa Dios nga buhi: ug nagasinggit sa hataas nga tingog sa upat ka mga manolunda, nga kanila gihatag ang gahum sa pagdagmal sa dagat, sa yuta . . . sa dagat,

Nga nagaingon, dili ninyo pagdagmali ang yuta, ni ang dagat, ni ang kakahoyan, hangtud nga maselyohan namo ang mga ulipon.

129 Dili ang Pangasaw-onon. “Mga sulugoon.” Dili ang mga anak. “Mga sulugoon.” Ang Israel dugay nang mga sulugoon sa Dios. Ang Iglesia ang maoy mga anak, kita n'yo, pinaagi og espirituwal nga pagkapanganak. Ang Israel mao ang Iyang alagad. Bantayi, sa matag dapit, kanunay ingon niana. Si Abraham Iyang sulugoon. Dili kita mga sulugoon. Mga anak kita, mga anak nga lalake ug mga anak nga babaye. Oo.

. . . sa . . . sa atong Dios diha sa ilang agtang.

130 Karon bantayi.

. . . atong Dios diha sa ilang agtang.

Ug nadungog ko ang kapid-an kanila nga napangselyohan: . . .

131 Karon gusto kong maminaw mo og ayo sa pagbasa niini.

. . . ug usa ka gatus ug kuwarentay-kuwatro ka libo ang napangselyohan gikan sa tanang mga banay sa mga anak ni Israel.

132 Hingpit nga ginganlan Niya sila. Karon, kung aduna ma'y nakalingkod dinhi og usa ka British-Israeli nga nakaila, paminaw kung giunsa niini pagbuntog sa argumento bahin niini, kita n'yo.

Sa banay ni Juda napulog-duha ka libo ang naselyohan. (Gitawag, "ang banay.") Sa banay ni Ruben napulog-duha ka libo ang naselyohan. Sa banay ni Gad . . . napulog-duha ka libo.

133 Tan-awa ang inyong—bantayi ang inyong mga banay karon.

Ug sa banay ni Aser napulog-duha ka libo ang naselyohan . . . sa banay ni Neptali napulog-duha ka libo ang naselyohan . . . sa banay ni—ni Manases . . . napulog-duha ka libo.

Ug sa banay ni Simeon . . . napulog-duha ka libo ang naselyohan. Sa banay ni—ni Levi napulog-duha ka libo ang naselyohan. Sa banay ni Issachar . . . napulog-duha ka libo. (Issachar, siguro ang inyong paglitok niana.) . . . napulog-duha ka libo.

. . . ang sa banay ni Zebulon . . . napulog-duha ka libo. Ug sa banay ni Joseph napulog-duha ka libo ang naselyohan. Sa tanan sa . . . Sa banay ni Benjamin napulog-duha ka libo ang naselyohan.

134 Karon, adunay napulog-duha ka mga banay, dayon dunay napulog-duha gikan sa matag usa ka banay. Napulog-duha imultiplikar sa napulog-duha . . . pila man? [Nagaingon ang kongregasyon, "Usa ka gatus ug kuwarentay-kuwatro ka libo."—Ed] Usa ka gatus ug kuwarentay-kuwatro ka libo. Karon bantayi. Silang, tanan, mga banay sa Israel.

135 Karon bantayi, "Human niini . . ." Karon ania ang usa pa ka pundok. Karon, wala na ang Pangasaw-onon, nahibalo kita niana. Apan matikdi kining pundok nga nagaabot.

Sa human niining mga butanga, ug ania karon, ang usa ka dakung panon, nga dili maisip ni bisan kinsa, gikan sa tanang kanasuran, . . . kabanayan, ug katawohan, ug sinultihan, nga nanagtindog sa atubangan sa trono, ug sa atubangan sa Cordero, nga nanagsul-ob sa mga bisti nga maputi nga hatag-as, ug may mga palwa sa ilang kamot;

Ug nanagsinggit sa hataas nga tingog, nga nagaingon, Ang kaluwasan iya sa atong Dios nga nagalingkod sa trono, ug iya sa Cordero.

Ug ang tanang kanasuran . . . nagaalirong palibot sa trono, ug ang anciano ug ang upat ka mga buhing binuhat, ug unya mihapa sila sa atubangan sa trono, ug gisimba nila ang Dios,

Nga nanag-ingon, Amen: Mga Panalangin, . . . himaya, . . . kaalam, . . . pagpasalamat, . . . kadungganan, . . . kagahum, kalig-onan ipahinungod ngadto sa atong Dios hangtud sa kahangturan. Amen.

Ug ang usa sa mga anciano . . .

136 Karon anaa siya sa atubangan sa mga anciano dinhi. Sa diha nga, nakita nato siya, sa tanang mga Selyo.

Ug mitubag ang usa sa mga anciano, nga nagaingon kanako, Kinsa man kini sila . . .

137 Karon, si Juan, ingon nga usa ka Judio, nakaila gyud siya sa iyang mga kabanay. Nakita na niya sila pinasubay sa tagsatagsa ka banay niini. Husto ba kana? Nailhan niya ug gihinganlan niya ang matag usa niining mga banay.

138 Apan karon, pagkakita niya sa mga niini, medyo naglibog siya. Ug nahibalo ang anciano, busa ang ginaingon niya:

. . . Kinsa man kini sila nga nasul-oban sa mga bisti nga maputi nga hatag-as? ug diin man sila naggikan?

139 Si Juan, nagatubag karon:

Ug ako nag-ingon ngadto kaniya, Sir, nasayod ikaw.

140 Si Juan wala makaila kanila, kita n'yo; tanang mga banay, mga sinultihan, ug mga nasud.

. . . Ug miingon siya nganhi kanako, Kining mga niini—miingon siya nganhi kanako, Kini sila mao ang nanagpakalabang sa dagkung kasakitan, (sa ubang pinulongan, ang dakung Kasakitan), ug gilabhan nila ang ilang mga bisti nga hatag-as, . . . gipaputi diha sa dugo sa Cordero.

Tungod niini anaa sila sa atubangan sa trono sa Dios, ug nagaalagad kaniya sa maadlaw ug sa magabii sulod sa iyang templo: ug sila . . . siya nga naglingkod sa trono magapabilin sa taliwala kanila.

Dili gyud pagagutomon sila, ni pagauhawon man sila; ni pagainitan sila sa adlaw—ni pagainitan sila sa adlaw, ni sa bisan unsa nga kainit.

Kay ang Cordero nga anaa sa taliwala sa trono mao ang ilang magbalantay, ug magatultol kanila ngadto sa mga tuboran sa tubig sa kinabuhi; ug pagapahiran sa Dios . . . ang tanang luha sa ilang mga mata.

141 Karon atong ablihan ang . . . moadto na ta sa Selyo.

Namatikdan ba ninyo, sila'y . . . Una, magsugod kita karon, sa Israel.

142 Ug dayon makita nato ang gihinloan nga iglesia, dili ang Pangasaw-onon; ang gihinloan nga iglesia, pinaagi sa Kasakitan, kita n'yo, kita n'yo, ania nga nagapadulong, daghan kaayong nagmatinuuron nga mga kasingkasing nga nanggula—gikan sa dakung Kasakitan. Dili ang Iglesia; Kay human nang gisakgaw Kini, ang Pangasaw-onon. Ang ang iglesia kini.

143 Karon makita nato, taudtaud pagkahuman niana, si Jesus miingon nga ang Trono ipahimutang na, ug unsa nga ang . . . managtindog sila diha sa paghukom, ang matag usa kanila.

144 Karon, makita nato karon nga kining mga tawo gipangselyohan sa Selyo sa buhing Dios (husto ba kana?), kining mga Judio. Unsa man ang selyo sa buhing Dios?

145 Karon, wala ko'y ginahinganlan og bisan kinsa, magpasakit man og pagbati ni bisan kinsa. Nagaingon lamang ako, kita n'yo. Kabalo ba mo, nga, human ko og basa sa sinulat sa daghang mga eskolar mahitungod niini, nagapahayag sila nga kini kono nga pundok, nga mga gihugasan-sa-dugo, mao kono ang Pangasaw-onon?

146 Kabalo ba mo nga daghang mga eskolar usab ang nagapahayag nga kining usa ka gatus ug kuwarentay-kuwatro ka libo kono mao ang Pangasaw-onon? Unsay usa . . . Kinahanglan aduna gyu'y mohaom dinhi, nga sayup . . . nga husto dinhi, tungod karon aduna gyu'y butang nga sayup.

147 Matikdi, ginaingon sa atong mga igsoong Adventista, nga, “Ang Selyo sa Dios, mao kono ang pagtuman sa adlaw'ng igpapahulay.” Kabalo mo niana. Apan gusto ko og bisan usa ka gamay'ng bahin sa Kasulatan mahitungod niini, aron ipakita nga kanang igpapahulay, o ang pagtuman sa adlaw'ng igpapahulay, mao ang Selyo sa Dios. Kita n'yo? Usa lamang ka tawo ang naghimo-himo niana nga ideya.

148 Apan kung basahon ninyo ang Mga Taga-Efeso 4:30, nagaingon kini, “Ayaw ninyo pagpasub-a ang Balaang Espiritu sa Dios, nga pinaagi niini giselyohan kamo hangtud sa adlaw sa inyong . . . sa inyong pagtubos,” oo, sir, sa dihang ang pagpatigpataliwalang buluhaton tapos na, ug ikaw nakasulod na; Magaabot si Cristo aron tuboson ang mga Panag-iya Niya. Naselyohan ka; dili nga hangtud sa sunod nga rebaybal. Pag naselyohan ka na sa Espiritu Santo, tapos na kini nga buhat, gidawat ka na sa Dios, ug dili ka na mapahilayo gikan niini.

149 Moingon ka, “Bueno, aduna na ako Niini, ug napahilayo ako.” Dili, ikaw—nan wala pa Kini kanimo.

150 Giingon sa Dios nga magapadayon Kini hangtud sa Adlaw sa Katubsanan. Karon, uh-huh, sige makiglalis ka Kaniya, ug

makita mo kung unsay kahulogan niana. “Hangtud sa Adlaw sa inyong Pagtubos.”

¹⁵¹ Matikdi. Ingon nga sila’y mga . . . Maingon nga sila mao ang mga nahabilin tungod sa pagkapili-nang-daan, kini nga mga Judio karon maoy mga nahabilin tungod sa pagkapili-nang-daan. Sa mga adlaw sa unang pagministerio ni Elias ngadto sa mga Judio, kon diin pito ka libo nga mga magtotoo ang gitago sa kamot sa Dios, karon aduna sa niining nahabiling panahon, sa ilang panahon, usa ka gatus ug kuwarentay-kuwatro ka libo tungod nga sila mga gipili-nang-daan. Nga, ang Mensahe sa nianang panahon, ang magatoo nianang Mensahe, mao kanang usa ka gatus ug kuwarentay-kuwatro ka libo.

¹⁵² Karon, moingon mo, “Oh, karon sa makadiyut lamang, igsoon, wala ko mahibalo bahin niining ‘pagpamili-nga-daan’ nga butang. Bueno, wala ko pa mabasa kini dinha.”

¹⁵³ Sige, susihon nato karon kung husto ba kini, o dili. Balikan nato ang Mateo, ug tan-awon dinhi ug hibaloon kung dili ba kita makakita og medyo ingon-nianan dinhi. Nagatoo ko karon nga husto ako. Wala ko man nasulat kini dinhi, apan bag-o lang kini miabot sa akong hunahuna. Kuhaon nato, ang ulahi, ang ika-30 nga bersekulo; kon diin atong gihisgotan kagabii, ang pagtapos sa Ikaunom nga Selyo, sa ika-30 nga bersekulo. Karon atong basahon kana ug tan-awon karon kung asa kita niana ginapaingon, ang ika-31 nga bersekulo. Kita n’yo? “Makita nila ang Anak sa tawo nga nagaabot nga adunay himaya.” Karon ang ika-31 nga bersekulo.

Ug pagasugoon niya ang iyang mga manolunda pinaagi sa makusog nga tingog sa trompeta, ug ilang pagatigumon ang iyang mga pinili gikan sa sugdanan sa upat ka mga hangin, gikan sa usa ka tumoy sa langit ngadto sa usa.

¹⁵⁴ Ang “mga pinili” manggawas. Unsa man kini? Ug ang panahon sa Kasakitan. Pagatawgon sa Dios ang Iyang mga pinili, ug mao kana ang mga Judio naanang panahona, ang mga pinili. Ang Biblia naghisgot bahin niana. Si Pablo naghisgot bahin niana, “Sumala sa ilang pagkapili-nang-daan.” Adunay usa ka gatus ug kuwarentay-kuwatro ka libo sumala sa ilang pagkapili-nang-daan, nga motoo sa maong Mensahe, gikan sa literal nga minilyon ang anaa nianang panahona.

¹⁵⁵ Adunay minilyon sa Palestina, niadtong mga adlaw sa pagpanagna ni Elias, ug pito ka libo ang naluwas gikan sa minilyon.

¹⁵⁶ Karon, “sumala sa ilang pagkapili-nang-daan.” Kon diin, minilyon ka mga Judio ang nagakatigum na sa ilang yutang-natawhan. Nahimo na kining usa ka nasud. Magkaaduna og minilyon ang maatua didto, apan usa ka gatus ug kuwarentay-

kuwatro ka libo lamang nga “mga pinili” ang pagakuhaon. Patalinghugan nila ang Mensahe.

157 Mao ra kini sa gihapon sa IgleSIang Gentil. Adunay Pangasaw-onon, ug Siya mao ang pinili. “Ug siya pagatawgon sumala sa iyang pagkapili-nang-daan.” Matikdi, kining tanan nagatipo gyud sa Iglesia, sa bug-os, ang pinili nga mga magtotoo.

158 Ang uban wala nagatoo. Mahibal-an mo kini. Pag-isulti mo sa usa ka tawo ang Kamatuoran, ug pamatud-an pa kini pinaagi sa Pulong, ug bisan gipanghimatud-an pa gyud; moingon siya, “Dili ako motoo niana.” Bisan imo pang. . .

159 Ayaw na na’g buhata utro. Miingon si Jesus nga ayaw na. Miingon, “Sama ra kini nga ginalabay mo ang mga mutya ngadto sa mga baboy.” Kita n’yo? Miingon, “Pasagdi na lang sila. Pagatalikdan ka lang nila ug yatakan ka pa nila. Biaybiayan ka lang nila. Pagpahilayo lang ug pasagdi sila. ‘Pag ang buta . . .’”

160 Miduol ako sa usa ka tawo, dili pa lang dugay, o, miduol siya sa ako, diay. Dugay na siyang nagapakiglantugi, sa tanan, bisan asa, batok sa Balaanong pagpang-ayo. Ug miduol siya, ug miingon siya, “Dili ako motoo sa imong Balaanong pagpang-ayo.”

161 Miingon ko, “Sa ako, siguro, walay unsa man nga ikaayo, tungod kay wala gyud akò.” Ug siya . . . ingon ko, “Apan ang Dios maoy perpekto.”

Miingon siya, “Walay ingon niana nga butang.”

162 Miingon ko, “Ulahi ka na kaayo sa pagsulti niana, higala. Oo, ikaw—ikaw naghulat na sa hilabihan ka dugay alang niana. Mahimong nakiglantugi ka, pipila ka tuig na ang milabay, apan aduna na’y bag-ong kapanahonan karon. Adunay minilyon ang magapamatuud, kita n’yo.” Ingon ko, “Ikaw—ulahi ka na kaayo karon, higala, aron isulti kana.”

163 Miingon siya, miingon siya, “Bueno, dili ko motoo niini; Bisan unsa pa ang ginabuhat mo.”

Miingon ko, “Siguradong dili gyud. Dili mo mahimo.” Kita n’yo?

164 Miingon siya, “Butahi ko!” Miingon, “Kung aduna ka gyud og Espiritu Santo, sama ni Pablo,” ingon pa, “butahi daw ko.”

165 Ingon ko, “Unsaon nako sa paghimo niana sa dihang buta ka naman daan?” Ingon ko, “Gibutahan ka sa imong amahan sa maong Kamatuoran.” Ingon ko, “Ikaw, buta ka naman daan.”

166 Ug miingon siya, “Dili ako motoo; dili ko igsapayan kung unsa man ang mahimo mong buhaton, unsa man ka daghang ebidensya ang imong mapamatud-an, o unsa nga sama niana. Dili ko sa gihapon motoo niana.”

167 Ingon ko, “Oo. Dili man kini para sa mga dili-magtotoo. Para lamang kini sa mga magtotoo. Mao kana.” Kita n’yo?

168 Unsa man kini? Kita n’yo, mahibaloan mo mismo dayon, nga dili pinili. Ayaw na nang kumbinsihi pa, ayaw na. Mao usab ang gibuhat ni Jesus, miingon Siya, “Pasagdi ninyo sila. Kung buta ang magaagak sa buta, dili ba silang tanan mangahulog sa gahong?”

169 Apan sa dihang miadto Siya sa usa ka luoy’ng bigaon, [Ginapapiti ni Igsoong Branham ang iyang mga tudlo sa makausa—Ed.] miduslit kini og kalayo! Unsa man kini? Usa siya ka pinili nga binhi nga atua ra didto, kita n’yo, nga nakita Kini mismo dayon. Pag-abot Niini kang Pedro, ania mismo ang piniling binhi, kita n’yo, ug nakita nila Kini. “Ug ang tanan nga gikahatag sa Amahan, gihatag” (kaniadto pa) “gikahatag Kanako, magaduol sila. Magaduol sila Kanako.” Oh, grabe! Gusto ko kana! Oo, sir. Matikdi, ang mga magtotoo maoy nagatoo Niini.

170 Ang mga dili-magtotoo dili mahimong motoo Niini. Busa, karon, kung aduna ma’y gustong makiglantugi mahitungod sa binhi sa serpente ug ingon-anang mga butang, ug sulayan mo kining ipakita kanila, dili sila maminaw Niini; biyaan ka. Pasagdi sila. Kita n’yo, ang Dios wala nagapakiglantugi, mao usab ang Iyang mga anak.

171 Matikdi, ang maong usa ka gatus ug kuwarentay-kuwatro ka libo ka mga Judio nga pinili sa Dios dili sila magayukbo sa mapintas nga mananap, sa denominasyonalismo niini, o sa mga rebulto, o unsa man, bisan pa nga ang ilang nasud anaa sa pakigsaad nianang panahona. Ang Israel anaa sa usa ka pakigsaad, apan ania ang usa ka gatus ug kuwarentay-kuwatro ka libo nga dili gayud moapil niana. Sila mao ang mga pinili.

172 Ingon niini sa gihapon ang Iglesiang Gentil karon, usa ka piniling pundok. Dili ninyo sila mapugos sa ingon nianang matang sa butang. Dili sila motoo niini. Dili gyud, sir. Pagmadan-agan sila sa Kahayag, mao na kana. Pagmakita nila ang. . . pagmakita nila kini nga nagakahitabo, dayon makita nila kini nga gipanghimatud-an ug gipamatud-an nga sama niana. Ug pagtan-aw nila dinhi sa Biblia, nakita nga ang Pulong nagpadayon gayud. Bueno, inyo na lang—mas maayo pang undangan na lang ninyo ang pagpakiglantugi kanila, tungod kay nagatoo gyud sila Niini. Kana lang. Kana lang. Bisana nga dili nila Kini maisaysay og ayo, apan nahibalo sila nga naangkon nila Kini. Busa, sa gisulti ko na, daghang mga butang ang dili ko maisaysay, apan ako—nahibalo ako nga tinuud kini bisan pa man. Uh-huh. Sige.

173 Sa niining panahon tali sa Ikaunom ug Ikapitong Selyo, nga gitawag Niya kini nga mga tawo, nga gihisgotan ni Jesus diha sa ika-24 nga kapitulo ug ang ika-31 nga bersekulo sa Mateo,

nga bag-o lang natong nabasa, kita n'yo. Ang mga trumpeta dinhi, ang duha ka mga saksi sa... Sa dihang motingog na ang trumpeta, ang maong trumpeta sa duha ka mga saksi sa kapanahonan sa grasya alang sa mga Judio. Usa ka tingog sa trumpeta, mamatikdan ninyo, usa ka tingog sa trumpeta. Miingon siya nga ipatingog Niya ang trumpeta. Karon matikdi ninyo ang bahin dinhi, sa ika-31.

Ug pagasugoon niya sa unahan ang iyang mga manulonda (dili usa ra, kita n'yo; adunay duha kanila) pinaagi sa makusog nga tingog sa trumpeta, . . .

174 Unsa man kini? Sa dihang ang Dios andam na sa pagsulti, adunay tingog sa trumpeta. Kana sa kanunay ang Iyang Tingog. Nagapanawag kini alang sa pagpakiggubat, kita n'yo. Nagasulti ang Dios. Kining mga manulonda magaabot nga uban ang pagpatingog sa trumpeta.

175 Ug namatikdan ba ninyo, sa Mensahe sa katapusang manulonda, gipatingog ang trumpeta. Sa mensahe sa nahaunang manulonda, gipatingog ang usa ka trumpeta; sa ikaduhang manulonda, gipatingog ang trumpeta, sa dihang gipadala Niya kini. Matikdi, apan sa dihang ang mga Selyo gianunsiyo, kining tanan anaa sa usa ka dakung, Balaang butang, aron tawgon ang usa ka pundok sa mga tawo; adunay usa nga tingog sa trumpeta, ug ang Pito ka mga Selyo naablihan.

176 Matikdi, “Tigumon ang Iyang pinili nga mga Judio gikan sa upat ka mga bahin sa kalangitan.”

177 Gihisgotan Niya ang unom ka mga Selyo, sumala sa nakita nato, apan dili ang Ikapitong Selyo. Wala gayud Siya may gisulti og unsa man dinhi mahitungod sa Ikapitong Selyo, sa bisan asa.

178 Kita n'yo, sa gilayan, sa ika-32 nga bersekulo, mga samingay na, mahitungod sa panahon sa pagtawag sa piniling mga Judio. Karon tan-awa dinhi, kita n'yo.

179 “Ug igapadala Niya ang mga manulonda pinaagi sa trumpeta, ug tigumon ang Pinili gikan sa upat ka kanto sa langit.” Karon nagpasugod Siya . . .

180 Kita n'yo, wala Siya magsulti og unsa man mahitungod sa Ikapitong Selyo dinhi. Kita n'yo? Naghisgot Siya sa Ikaunom nga Selyo; Sa nahauna, Ikaduha, Ikatulo, Ikaupat, Ikalima, ug Ikaunom.

181 Apan matikdi:

Karon magtoon kamo sa samingay gikan sa kahoy nga higuera; Kung ang mga sanga niini manalingsing na, ug mamuklad ang mga dahon, hingbaloan ninyo nga haduol ang ting-adlaw:

Ingon usab kamo, kung hikit-an ninyo kining tanang mga butanga, hisayran ninyo nga haduol na siya, anaa na sa pultahan.

182 Kanang katapusan, ang maong pangutana nga gipangutana nila Kaniya, “Ug unsa man ang ilhanan sa katapusan sa kalibutan?”

183 “Pag-makita ninyo nga kining mga Judio. . . Sa dihang makita ninyo nga nagakatuman kining uban pang mga butang, kabalo na mo kung unsa ang magakahitabo. Karon, sa dihang makita ninyo nga kining mga Judio. . .” Paghisgotan mismo mga Judio! Karon bantayi. Unsa nga pundok Siya nagapakigsulti, sa mga Gentil ba? Sa mga Judio! Mga Judio! Kita n’yo?

184 Karon miingon Siya, “Pagadumtan kamo sa tanang mga nasud tungod sa Akong Ngalan,” ug uban pa, mga ingon niana.

185 Karon, “Sa dihang,” miingon Siya, “pagmakita ninyo kining mga Judio nga magsugod na og panalingsing didto,” sa dihang ang Israel magasugod na sa pagpamalik, sa iyang nasud. Pag-atua na siya didto, (andam na ang Iglesia alang sa Pagsakgaw), adunay tulo ug tunga na lamang ka tuig ang nahabilin ug katapusan sa daang kalibutan, ug mopaingon kini ngadto sa dakung kagubot, ug diha mosulod ang Milenyum, padulong sa bag-ong—bag-ong kalibutan. Ingon pa, “Anaa na sa pultahan!” Karon, ang usa ka libo ka tuig sa yuta usa lamang ka adlaw alang sa Dios. Ug ang tulo ka tuig ug tunga, unsa ra ma’y katumbas niana? Ingon ra ka daghang mga segundo, diha sa oras sa Dios. Mao kana ang hinungdan nga miingon Siya, “Anaa na kini sa pultahan.”

Sa pagkatinuod magaingon ako kaninyo, nga, Dili pa pagapapason kining kaliwatana, pagahanawon, kining maong mga tawo, hangtud nga kining tanang mga butanga mga. . .

186 Unsa, unsa man kono ang dili agahanawon uban niini? Gipaningkamotan na nila nga pamasyon ang mga Judio, papason sa kalibutan, sukad niadto pang panahon. Dili gyud nila mahimo.

187 Apan matikdi. Ang pinaka henerasyon sa mga Judio nga makakita sa maong pagpamalik, pabalik sa Palestina, makita sa niining henerasyon kining mga butanga nga mahitabo. Ug sa milabay nga duha ka tuig, nahimo na siyang hingpit nga usa ka nasud, nga aduna na’y kaugalingong niyang salapi ug unsa pa. Atua na siya.

188 Karon asa na kita, higala? Ang mga Selyo ug ang tanan naablihan na; karon nasabtan na nato kining ania sa taliwala niini. Mao na kini. Nakita n’yo na kung asa na kita karon? [Nagaingon ang kongregasyon, “Amen.”—Ed.]

189 Nanghinaut ako nga nakuha ninyo Kini. Wala lang ako’y edukasyon. Pero nahibalo ako kung unsa ang akong ginasulti, tingali dili ko lang maisaysay—maisaysay Kini, aron nga masabtan ninyo. Apan nanghinaut ako nga kuhaon sa Dios ang maong mga Pulong nga nagkasambog-sambog, ug ipresentar

kini kaninyo sa husto, kita n'yo, ug ipasabot kaninyo kung unsa Kini. Tungod kay, kini, anaa na kita sa pultahan. Ania na kita sa maong panahon. Karon matikdi.

¹⁹⁰ Kita n'yo, halos ania na kita karon, nga pabalik na Siya ngadto sa mga Judio, ug ania na sa—sa katapusang panahon. Nagsulti Siya sa kung unsa ang mahitabo. Nahibalo kita niana bisan karon. . . Nahibalo kita, nasayod gyud kita, nga nagkatibulaag mismo ang maong mga banay. Dugay na silang ingon niana, sulod na sa baynte-singko ka gatus ka tuig. Gipropesiya na nga sila nga magkatibulaag sa upat ka mga hangin. Nahibalo ba kamo niana? Nahibalo kita niana.

¹⁹¹ Siyempre, dili na kita kinahanglan nga mobalik ug kuhaon, hisgotan pa kana, tungod kay aduna pa ako og importanteng butang dinhi nga gusto kong makita ninyo, sa dili ka pa kapoyan, ug ako kapoyon man gud pag-ayo.

¹⁹² Matikdi. Nahibalo kita, nga ang tanang banay, bisan sa kronolohiya, o unsa man ang tawag ninyo niini, o hiyolohiya, o mga posisyon sa maong mga banay, dili na masubay. Nagkatibulaag na man gud sila, ngadto sa bisan asa.

¹⁹³ Ang mga Judio, nagakatigum na didto sa Jerusalem, nga wala. . . Wala gani sila makahibalo kung unsang banay sila. Wala na sila og unsa man nga pang-banay nga bandera o unsa man. Ang nahibaloan lang nila, sa pagkakaran, nga sila mga Judio. Gipropesiya na nga mamahimong ingon niana sila, sa tibuok kalibutan. Karon, gipangsunog kaniadto ang ilang mga libro. Mao nga wala na gyud sila makahibalo.

Moingon mo, “Sa unsang banay ka sakop?”

“Wala ko kahibalo.”

“Sa unsa ka nga banay?”

“Wala ko kahibalo.”

¹⁹⁴ Ang usa unta gikan kang Benjamin, ang usa unta gikan *niini*, ug ang usa gikan *niana*. Wala na sila mahibalo kung asa sila gikan. Ang ilang mga libro nangawala na, tungod sa mga gubat, ug tungod nga baynte-singko na ka gatus ka tuig. Ang butang lang nga ilang nahibaloan, sila'y mga Judio. Mao lang kana. Busa, nahibalo sila nga sila nahibalik na sa ilang kaugalingong nasud. Sila bisan pa man. . . Matikdi, bisan wala sila mahibalo kung unsa sila nga banay, apan nahibalo ang Dios.

¹⁹⁵ Gusto ko kaayo kana! Kabalo mo, giingon Niya pa nga bisan. . . “Ang matag buhok sa inyong ulo naihap na.” Hum! Matikdi, wala gyu'y mawala sa Iya. “Pagabanhawon Ko kini sa kaulahiing adlaw.”

¹⁹⁶ Bisan og nawala kanila ang ilang—ilang—ilang mga bandera sa banay, ug kang *kinsa* sila nga banay, ug kung sila ba sa *niini* o sa *niana*; wala sila kahibalo kung gikan ba sila kang Benjamin,

o gikan ba sila kang Reuben, o—o kang Isacar, o kung asa sila gikan. Apan, bisan pa man, ginatawag sila sa Dios dinhi.

¹⁹⁷ Karon matikdi, sa Pinadayag 7, basahon nato kini. “Dose ka libo” sa matag banay, nga pinili, gikan sa tanan niini. Adunay dose ka libo gikan sa matag banay, nga pinili, ug gisulat sila dinhi sa husto nga pagkahan-ay. Oh, grabe! Unsa man sila? Gihan-ay pinasubay sa ilang banay. Sa karon, dili na sila ingon niana, apan mamaingon niana ra sila. Maanaa ra sila sa pang-banay nga pagkahan-ay. Unsa man kadtong maanaa sa pang-banay nga pagkahan-ay? Dili ang ordinaryong Judio, dili. Kondili kadtong mga pinili, ang usa ka gatus ug kuwarenta’y-kuwatro ka libo, sila ang maoy mapahimutang sa pang-banay nga pagkahan-ay. Oh, grabe!

¹⁹⁸ Daw sa unsa ko ka gustong ipakita kini kaninyo! Dili na nato hisgotan kana. Apan mao kana kaeksakto kung unsa ang gikinahanglan sa Iglesia, uh-huh, hustong pagkahan-ay

¹⁹⁹ Karon gusto kong matikdan ninyo og ayo ug magbasa uban kanako, sa makadiyut lang. Karon ania ang usa ka butang nga tingali wala ninyo gayud namatikdi diha sa—sa maong pang-banay nga pagtawag. Nagsulti ako kaninyo, kaganina lang, nga basahon ang Pinadayag 7. Basaha uban kanako, ug bantayi ang maong mga banay. Diha sa Pinadayag 7, wala na si Dan ug Ephraim ug wala maihap uban kanila. Namatikdan ba ninyo kana? Si Joseph ug Levi ang gipuli sa ilang posisyon. Namatikdan ba ninyo kana? Wala na dinha si Dan ug Ephraim. Wala na, sir. Apan, si Joseph ug Levi ang gipuli sa puwesto ni—ni—ni Dan ug Ephraim.

²⁰⁰ Ngano man? Sila . . . Ang kanunay’ng-makahinumdum nga Dios makahinumdum sa matag saad sa Iyang Pulong. Oh, gusto kong magwali mahitungod niana. Kita n’yo? Walay unsa mang butang nga ginakalimtan ang Dios, bisan nga kini daw sa ingon niana.

²⁰¹ Sama sa gisulti Niya kang Moises. Nagdugay ang Israel didto sa, “upat ka gatus ka tuig.” Apan kinahanglan man nga mahiadto gyud sila didto. Gisulti na Niya kang Abraham nga, “Ang iyang kaliwat mamahimong mga dumuloong sa usa ka langyaw’ng yuta sulod sa upat ka gatus ka tuig, dayon Iyang pagulaon sila pinaagi sa usa ka gamhanang kamot.” Dayon human niana gisulti Niya kang Moises, “Nahinumdum Ako sa Akong saad, ug mikanaug Ako aron tumanon ang Akong gisulti.”

²⁰² Ang Dios wala nagakalimot. Wala Siya nagakalimot sa Iyang mga tunglo, ni sa Iyang mga panalangin. Apan, ang matag saad nga Iyang gihimo, nagapabilin Siyang matinud-anon niini.

²⁰³ Ania kon nganong wala sila giapil, karon, kung inyong himatikdan. Karon basaha. Gusto kong basahon ninyo uban kanako karon. Moadto sa Deuteronomio, ang ikabaynte- . . . sa

ika-29 nga bersekulo dinha, o sa ika-29 nga kapitulo, diay. Adunay usa ka hinungdan kon nganong kining mga banay wala dinha. Ang tanan butang aduna gyuy hinungdan kon nganong naingon-niini. Deuteronomio, gusto natong kuhaon ang—ang ika-29 nga kapitulo sa Deuteronomio. Karon, tabangan kita sa Ginoo, nga kita makasabot karon. Karon gusto natong magsugod sa Deuteronomio, ang ika-29 nga kapitulo, sa ika-16 nga bersekulo. Karon paminaw. Nagapakigsulti si Moises.

(Kay nanghibalo kamo kung unsa ang pagpuyo nato sa yuta sa Egipto; ug kung unsa ang giagian nato sa taliwala sa mga nasud nga atong giagian;

Ug inyong nakita ang ilang mga kahugawan, ug ang ilang mga larawan, kahoy...bato, salapi...bulawan nga anaa uban kanila:)

204 Ang matag usa man gud didto nagdala og usa ka gamay'ng butang o unsa man, usa ka gamay'ng rebulto ni Santa Cecilia. Kabalo na mo, usa ka butang nga ingon niana, kita n'yo. "Tingali kung ingon niana..." Paminaw.

Tingali unya sa taliwala ninyo adunay usa ka lalake, ... babaye, o usa ka panimalay, o usa ka banay, kinsang kasingkasing motalikod niining adlawa gikan sa GINOO nga atong Dios, aron sa pag-adto sa pag-alagad sa mga dios niadtong mga nasud; tingali magkaaduna sa inyong taliwala og usa ka gamot nga nagapamunga og makahilo ug ajenjo;

Ug mahitabo, nga sa makadungog siya sa mga pulong niini nga panunglo, nga siya—nga siya sa iyang kaugalingon magapanalangin sa iyang kaugalingon sulod sa iyang kasingkasing, ug moingon, ako... makabaton og pakigdait, bisan ako nagalakaw sa katig-a sa kaugalingon kong kasingkasing, ...

205 Kita n'yo, moingon ang mga tawo, "Oh, ginapanalanginan niya ang iyang kaugalingon." Kabalo na mo, mobuhat og usa ka gamay'ng krus o unsa man, sama sa ginabuhat nila karon, nakita n'yo; mao ra nga butang, kita n'yo. Ug makita ninyo kini nga usa ka paganhong kinaiya, kita n'yo, susama kini sa mga pagano.

...siya nagapanalangin sa iyang kaugalingon sa kaugalingon niyang kasingkasing, ...kaugalingon niyang katig-a sa kaugalingon niyang hunahuna, aron maghuboghubog sa pagtagbaw sa kauhaw:

206 "Magpahubog ta, dili bitaw na makapadaut; basta gasimba ka lang, okey na."

Dayon ang GINOO dili magapasaylo kaniya, hinonoa ang kapungot sa GINOO...iyang abugho magautbo batok sa maong tawo, ug ang tanan nga mga tunglo nga gisulat niini nga basahon ("Ayaw gayud pagtaktak og

usa ka Pulong gikan Niini, o pagdugangi Kini,” kita n’yo.) *magatungtong sa ibabaw niya, ug pagapalaon sa GINO ang iyang . . . pagapalaon ang iyang ngalan gikan sa ilalum sa langit.*

207 Kana samtang ania pa siya dinhi sa yuta, kita n’yo, “ilalum sa langit.”

Ug pagapinigon siya ni Jehova ngadto sa dautan gikan sa tanang mga banay sa Israel, sumala sa tanang tunglo sa tugon nga nahisulat sa niining basahon sa kasugoan:

208 Busa, “Kung kinsa man ang mag-alagad sa diosdios, o magtipig og usa ka diosdios kaniya, ug panalanginan ang iyang kaugalingon sa kaugalingon niyang imahinasyon sa iyang hunahuna, ug mag-alagad sa mga diosdios,” Miingon ang Dios, “lalaki man, babaye, pamilia, o usa man ka banay, ang iyang ngalan hingpit nga pagapalaon, gikan sa taliwala sa mga tawo.” Karon, husto ba kana? [Nagaingon ang kongregasyon, “Amen.”—Ed.] Pagkatinuod gayud!

209 Ang pagsimba sa diosdios nagbuhat og mao ra nga butang sa iglesia, mga tuig na ang milabay, ug mao sa gihapon karon. Ug namatikdan ko . . . Bantayi kung giunsa sa anticristo pagpaningkamot sa pagbuhat nga batok. Pila ba ang nakahibalo nga ang yawa ginaawat-awat ug ginasundog-sundog ang—ang mga balaan sa Dios?

210 Unsa ang—unsa man ang sala? Mao ang hustong buhat nga gituis. Unsa man ang bakak? Ang kamatuoran nga gituis lang. Unsa man ang pagpanapaw? Maoy hustong buhat, legal nga buhat, nga gibuhat sa sayup. Kita n’yo?

211 Karon, sa pagpaningkamot nga buhaton kini, “papason ang ngalan,” namatikdan ba ninyo diha sa kapanahonan sa iglesia, ang mao rang mapintas nga mananap nga nagapasimba sa mga tawo ngadto sa mga larawan sa mga patay na nga tawo, ug sa uban pa, nangingkamot nga papason ang Ngalan ni Ginoong Jesus Cristo, ug gipuli ang mga titulo sama sa Amahan, Anak, ug Espiritu Santo. Mao ra nga butang, nga nagauban ang tunglo sa luyo niini, sama niana.

212 Gibuhat mismo kana ni Dan ug Ephraim, ilalum sa usa ka tigpakaaron-ingnon nga hari sa Israel, usa ka impostor, si Jeroboam. Karon, matikdi, sa Unang Mga Hari ang ika-12 nga kapitulo. Nahibalo ako nga kita . . . Kini, alang kanako, kini—kini—nagahatag kini og usa ka hulagway nga atong mabasihan, nga mahimo natong makita. Unang Mga Hari, gusto kong moadto sa ika-12 nga kapitulo, ika-25 ngadto sa ika-30 nga bersekulo.

Unya si Jeroboam . . . ang Sichem didto sa kabungtoran sa Ephraim, ug mipuyo didto; ug siya mibiya gikan didto . . . ug gitukod ang Penuel.

Ug karon si Jeroboam miingon sa . . . iyang kasingkasing, (tan-awa, ang kagahi sa iyang kasingkasing) Karon ang gingharian mahibalik na sa balay ni David:

213 Nahadlok siya kaniadto, nakita n'yo, tungod kay basin unya mobiya ang mga tawo.

Kung kining katawhan mangadto sa . . . paghalad og mga halad sa balay sa GINOO didto sa Jerusalem, unya ang kasingkasing niining katawhan basin mobalik pag-usab ngadto sa ginoo, ngadto kang Roboam nga hari sa Juda, ug sila mopatay kanako, ug mopauli . . . ngadto kang Roboam—Roboam nga hari sa Juda.

Tungod niini ang hari nakigsabot-sabot, ug naghimo sa duha ka nating vaca nga bulawan, ug siya miingon kanila, Halayo ra kaninyo ang pagtungas ngadto sa Jerusalem: tan-awa ang inyong mga dios, Oh Israel, nga nagdala kaninyo . . . pagawas gikan sa yuta sa Egipto.

Ug iyang gibutang ang usa didto sa Bethel, ug ang laing usa iyang gibutang didto sa Dan.

Ug kining butanga nahimong usa ka sala: kay ang katawhan ming-adto aron sa pagsimba sa atubangan sa usa, bisan pa ngadto sa Dan.

214 Kita n'yo, ang Epraim sa Bethel, ug Dan, ug gibutangan sila og mga diosdios. Ug sila nangadto aron sa pagsimba niini.

215 Ug ania kita, nga gapaingon na sa kapanahonan sa Milenyum, halos, ug sa gihapon nahinumdoman sa Dios kana nga sala. Wala gyud sila giapil didto. Hey! Himaya! [Gipakpak ni Igsoong Branham sa makausa ang iyang mga kamot—Ed.] Kung unsa ka sigurado nga ginahinumdom Niya ang matag saad Niyang maayo, ginahinumdom Niya ang matag saad Niyang makapadaut, usab. Timan-i gyud, sa dihang . . .

216 Mao kana ang hinungdan nga nagatoo ako, mga higala, kanunay kong naningkamot nga magpabilin gayud sa Pulong, bisan unsa pa ka katalagsaon Kini.

217 Kita n'yo, karon, wala nila kana gihunahuna kaniadto. Wala sila naghunahuna niana. Nagdahum nila nga, “Bueno, nakalusot man gani sila.” Sige.

218 Apan ania sila sa niining umalabot na nga kapanahonan sa Milenyum, nga ang ilang mga ngalan ug mga banay “gipangpanas” gikan dinha, tungod kay nagsimba man sila sa mga diosdios, nga gitunglo sa Dios.

219 Di ba gisulti man Niya nga “pagadumtan” Niya ang mga Nicolaita ug kanang si Jezabel? Pahilayo mo gikan niini. Di ba gisulti man Niya nga pagapatyon Niya ang mga anak nga babaye ni Jezabel pinaagi og “kamatayon,” nga usa ka Eternal nga pagkahimulag gikan sa Iyang Presensya? Ayaw

gyud pagsalig niini, ayaw gayud. Pahilayo mo gikan niini. Busa, ginahinumdam gayud sa Dios. Matikdi.

²²⁰ Apan namatikdan ba ninyo dinha, nga kini gyu'y "pagapanason"? Ngano man? Ilalum sa Langit walay Halad niadtong panahona nga makahatag kaniya sa Balaang Espiritu, aron nga makita niya unta kining mga butanga. Apan gibuhat niya kini kaniadto, bisan pa man, sa kaugalingon niyang hinakog nga panghunahuna.

²²¹ Apan, si Ezekiel, basi sa iyang panan-awon, diha sa Milenyum, nakita niya sila pag-usab diha sa hingpit nga kahan-ayan. Ezequiel, kung gusto ninyong basahon kini. Puede n'yong isulat kini, ug basahon na lang unya, aron makadaginot sa oras. Ezequiel 48:1 ngadto sa 7, basahon usab ang 23 ngadto sa 29. Nakita ni Ezequiel ang maong mga banay nga eksakto gayud sa pagkahan-ay niini. Sige.

²²² Ug, usab, diha sa Pinadayag 14, nakita sila pag-usab ni Juan diha sa pangbanay nga kahan-ayan, husto kana, ang matag banay sa ilang hustong puwesto. Unsa ma'y nahitabo?

²²³ Nadumdoman n'yo, ang ingon sa Dios, "Sa silong sa langit, nga ang iyang ngalan pagapapason gikan sa maong mga banay." Samtang siya anaa sa silong langit, dili siya apil. Ug kining usa ka gatus ug kuwarantay-kuwatro ka libo nga ania pa dinhi mao ang giilang mga banay, sa gihapon. Husto. Apan, nakita n'yo, gibutahan sila. Aduna lamang sila og mga halad nga mga torobaka ug mga kanding. Kita n'yo? Karon matikdi, gipanas Niya sila, "sa silong sa langit."

²²⁴ Apan ang Gentil, sa mga adlaw sa Balaang Espiritu, pagbatokan niya Kana; ang inyong ngalan bug-os nga pagapanason gikan sa Basahon sa Kinabuhi, "ug dili na magkaaduna pa og kapasayloan, sa niining panahona o sa kapanahonan nga palaabuton." Husto ba kana? Busa anaa kita nianang kahimtanga.

²²⁵ Ang Israel, ilalum sa paghalad og mga kanding, karnero, sila—aduna sila og ilang dapit. Samtang sila anaa dinhi sa yuta, kadto nga mga banay wala maapil. Dili gayud kini mahilakip. Karon, ang tanan. . . Sa dihang tawagon na Niya sila, didtong lugara, ang usa ka gatus ug kuwarantay-kuwatro ka libo, dili sila apil. Husto kana. Dili man lang gani sila apil sa pag-ihap. Ug si Joseph ug Levi maoy gipuli sa lugar ni Dan ug ni Ephraim. Karon mahimo ninyong tan-awon kana. Klaro mismo, sa atubangan ninyo, kita n'yo. Ug ania usab ang gisaad sa Dios, kaniadto pa, gatusan ug gatusan ka mga tuig sa wala pa kana. [Ginadukdok ni Igsoong Branham ang ibabaw sa pulpito sa makadaghang mga higayon—Ed.]

²²⁶ Karon, unsa ma'y nahitabo? Gihinloan sila sa panahon sa makalilisang nga kapanahonan sa Kasakitan.

227 Karon, kung pagalimpyohan sa Dios kana—kanang dalagang ulay, nga usa ka maayong babaye, apan wala lang siya makadawat og lana alang sa iyang lampara, ug pagalimpyohan Niya siya pinaagi sa pagkalinutos nianang panahona. Igapahimutang Niya usab silang mga banay dinha mismo, alang sa mao rang katuyoan, ug pagalimpyohan sila atol sa maong panahon sa Kasakitan. Tungod kay, kini maoy usa ka—usa ka pagpanglimpyo. Paghukom kini. Apan, nakita n’yo, sila, pagkahuman sa . . . Ug, tan-awa dinhi, ania ang usa ka gatus ug kuwarentay-kuwatro ka libo nga nagaabot, human nga gilimpyo ang Israel. Ug ania usab ang nangatulog nga dalagang ulay, nga nagaabot, ingon nga gilimpyohan na, ug nanagsul-ob na og puti nga mga bisti. Kita n’yo? Pagkahingpit! Pagkaanindot gayud niini!

228 Sama lamang ni Jacob, sa panahon sa kalisdanan, kita n’yo. Sila . . . Si Jacob, sa panahon sa kalisdanan. Nakahimo siya og sayup. Apan miagi siya sa panahon sa pagpalimpyo tungod kay nakabuhat man siya og sayup sa iyang igsoon, nga si Esau. Kita n’yo? Nanglimbong siya, aron makuha ang pagkapanganay ni Esau. Apan miagi siya ngadto sa pagpalimpyo sa wala pa giilisan ang iyang ngalan gikan sa Jacob ngadto sa Israel, nga usa ka matang sa sugo sa Dios, nga nagatipo niining adlaw.

229 Karon, mopadulong kita karon sa ika-8 nga bersekulo sa . . . o ang unang bersekulo, ang buot ko ipasabot, sa ika-8 nga kapitulo; sa Pinadayag 8:1.

230 Nahibalo ko nga gipangkapoy na kamo. Apan, karon, paningkamot lang nga maminaw sulod na lang sa pila ka minuto karon. Ug, tabangan kita sa Dios sa Langit, ang akong pag-ampo.

231 Kinahanglan natong hinumdoman nga kining Ikapitong Selyo mao ang katapusan sa panahon, sa tanang butang. Husto kana. Ang mga butang nga nahisulat diha sa Basahon nga selyado sa Pito-ka-Selyo, nga giselyohan, mahitungod sa plano sa katubsanang gikan sa wala pa ang pagkatukod sa kalibutan, ang matag tipik niini gitapus na niini. Mao kini ang katapusan; mao kini ang katapusan sa nagalimbasog nga kalibutan. Mao kini ang katapusan sa nagalimbasog nga kinaiyahan. Mao kini ang katapusan sa tanan-tanan. Dinha, ang katapusan sa mga Trumpeta. Mao kini ang katapusan sa mga Panaksan. Mao kini ang katapusan sa kalibutan. Kini mao ang . . . Mao kini usab ang katapusan sa panahon.

232 Mawala na ang panahon. Ingon niana ang sulti sa Biblia. Mateo, sa ika-7 nga kapitulo . . . ang pasabot ko diay sa, Pinadayag, ang ika-7 nga kapi . . . ika-10 nga kapitulo ug ang . . . ug 1 hangtud sa ika-7 nga bersekulo. Mohunong na ang panahon. Ang ingon sa manulonda, “Ang panahon mawala na,” sa diha

nga, sa mga adlaw nga magakahitabo kining grabeng mga butang.

²³³ Ang tanan patapus na, nianang panahona, ang katapusan sa maong—sa maong... sa katapusan niining Ikapitong Selyo. Matikdi. Kini ang katapusan sa kapanahonan sa iglesia. Kini ang—ang katapusan sa Ikapitong Selyo. Kini ang katapusan sa mga Trumpeta. Kini ang katapusan sa mga Panaksan, ug bisan pa gani kini ang katapusan aron mosulod na ang Milenyum. Mao kana ang anaa sa Ikapitong Selyo.

²³⁴ Sama ra kini sa pagpalupad og rocket ngadto sa kawanangan. Ug pagbuskad nianang rocket *dinhi*, ug molupad kini sa itaas ug dayon mobuto pag-usab. Pabuthon niini ang lima ka bitoon. Ang usa nianang mga bitoon mobuto ug pabuthon ang lima na usab ka mga bitoon sugod didto; ug dayon ang matag usa sa maong mga bitoon mobuto ug pabuthon ang lima na usab ka mga bitoon gikan didto. Kita n'yo, sunod-sunod nga ginahanaw.

²³⁵ Mao kana, kung unsa, ang Ikapitong Selyo. Ginatapos mismo niini ang panahon alang sa kalibutan. Ginatapos niini ang panahon alang *niini*. Ginatapos niini ang panahon alang *niana*. Ginatapos niini ang panahon alang *niini*. Ginatapos niini ang panahon. Ang tanan-tanan nagakatapos diha nianang Ikapitong Selyo.

²³⁶ Karon, unsaon Niya sa pagbuhat niini? Mao kana ang wala nato mahibaloi. Dili ba? Wala nato mahibaloi.

²³⁷ Mao na kini ang panahon para sa tanan niining mga butang, ug ang pagsulod na sa Milenyum.

²³⁸ Himatikdi, ang pag-abli sa niining Selyo maoy pinakakulbahinam gayud, nga, bisan ang Langit mihilum tungod Niini, “dihay kahilum, sulod sa tunga sa oras.” Karon, dili ba pagkakulbahinam Niini! Unsa man Kini? Dihay kahilum, sa Kalangitan. Wala gyu'y ni usa ka butang ang milihok, sulod sa tunga sa oras.

²³⁹ Karon, tingali dili dugay ang tunga sa oras kung kamo adunay paglingaw-lingaw. Apan, sa kakulbahinam tali sa kamatayon ug Kinabuhi, mora kini og usa ka Milenyum. Makyaw kaayo!

Wala gayud Kini gisulti ni Jesus. Wala ni usa man lang mahitungod niini.

²⁴⁰ Dili gani puede si Juan mosulat mahitungod Niini. Dili, gidid-an siya sa pagsulat *dinhi*. [Gitapik ni Igsoong Branham ang iyang Biblia sa makaduhang higayon—Ed.] Kita n'yo, aduna gyu'y...aduna gyu'y...Wala Niya gisulat Kini, kondili ang kahilum lang.

241 Ug ang upat ug baynte ka mga anciano nga atua sa atubangan sa Dios, Didto, nga nanagtugtog sa ilang mga alpa; gihunong nila ang pagtugtog sa ilang mga alpa.

Giundang usab sa mga Manulonda ang ilang pagkanta, didto sa Langit.

242 Hunahunaa! Ang balaang mga Querubin ug mga Serapin, nga nakita ni Isaias sulod sa templo, nga adunay unom ka pares sa . . . o tulo ka paresan sa mga pako. Tulo . . . Duha sa iyang nawong, ug duha sa iyang mga tiil, ug nagalupad-lupad. Ug sa adlaw ug gabii, didto kini, sa atubangan sa Dios, nagakanta og, “Balaan, balaan, balaan, ang Ginoong Dios nga Makagagahum-sa-tanan!” Ug pagmosulod na gani sila, o mosulod na sa templo, nagakauyog ang mga haligi sa templo, tungod sa ilang—ilang presensya.

243 Ug kining balaang mga Serapin mihilum. Ang mga anghel mihunong sa pagkanta. Uh-huh. Whew! Nga nagalupad-lupad unta diha sa Presensya sa Dios, nga nanagkanta, “Balaan, balaan, balaan,” Nanggihunong sila. Wala na’y mga pagkanta sa Anghel. Wala na’y mga pagdalayeg. Walay—wala na’y mga panerbisyo sa altar. Wala, wala na. Kahilum na lang; adunay kahilum, grabe nga kahilum didto sa Langit, sulod sa tunga sa oras.

244 Ang tibuk panon sa Langit naghilum sulod sa niining tunga sa oras, sa dihang ang Ikapitong-Selyo nga tinago sa Libro sa Katubsanan giablihan. Hunahunaa n’yo kini. Apan, naabli Kini. Giablihan Kini sa Cordero. Kabalo ba mo kung unsa? Nangahibulong sila nga may pagtahod tungod Niini, sa pagtoo ko. Wala sila mahibalo; Pero atua Kini mismo! Nanggihunong gyud sila.

245 Ngano man? Unsa man Kini? Karon, walay usa kanato ang nahibalo. Apan, akong—pagasultihan ko kamo, sa akong—akong kapadayagan mahitungod Niini.

246 Ug, karon, layo ra kanako nga mamahimong usa ka panatiko. Kung ako man panatiko, wala ko nasayod niana, kita n’yo. Ako . . . Dili ako dali madala sa binuang nga mga buhat ug tinumotumo nga mga butang.

247 Nakasulti ako og pipila ka mga butang, nga tingali daw sa talagsaon kaayo para sa ubang mga tawo. Apan pagmoabot ang Dios, nga ginapaluyohan Kini, ug ginapamatud-an Kini ug nagasulti nga Kini ang Kamatuoran, nan mao kana ang Pulong sa Dios. Kita n’yo? Medyo talagsaon lang, tungod sa ingon nianang paagi. Kita n’yo?

248 Ug karon, sa ingon ka siguradong nga nagatindog ako sa entablado karong gabhiona, aduna ako og kapadayagan nga gipadayag. Kini anaa sa tulo-ka-pilong pamaagi. Nga igasulti ko kaninyo, pinaagi sa tabang sa Dios, ang matag usa ka pilo Niini. Ug dayon inyong . . . Moadto kita niana, una. Ania ang

kapadayagan, aron masugdan na kung unsa ang gusto kong isulti kaninyo, kung unsa Kini. Ang nahitabo, mao nga . . .Kadtong Pito ka mga Dalugdog nga nadungog ni Juan nga nagdalugdog, ug gidid-an siya sa pagsulat; mao kana ang tinago, nga anaa sa luyo niadtong Pito ka nagsunodsunod nga Pagdalugdog. [Nagapanuktok si Igsoong Branham sa pulpito sa daghang mga higayon—Ed.]

²⁴⁹ Karon, ngano man? Pamatud-an nato kini. Kon ngano? Mao kini ang sekreto nga walay usa ang nahibalo. Gidid-an si Juan sa pagsulat mahitungod Niini, bisan—bisan sa pagsulat og usa ra ka simbolo mahitungod Niini. Ngano man? Mao kini ang hinungdan kon nganong walay bisan unsa man nga paglihok—unsa man nga paglihok didto sa Langit: tingali unya mabutyag ang maong sekreto. Nakita ba ninyo kini karon? [Nagaingon ang kongregasyon, “Amen.”—Ed.]

²⁵⁰ Kung mahinungdanon gyud Kini kaayo, kinahanglan Kini nga ilakip, tungod kay kinahanglan nga matuman Kini. Apan sa dihang ang Pito ka mga Dalugdog. . .

²⁵¹ Karon matikdi. Sa dihang ang pito ka mga Manulonda miabot aron ipatingog ang ilang mga Trumpeta, adunay usa ka dalugdog. [Ginadukdok ni Igsoong Branham ang ibabaw sa pulpito sa makausa—Ed.] Sa dihang nagtapok ang Israel, adunay usa ka trumpeta. “Sa dihang matapos na ang panahon,” ang katapusang trumpeta, aduna usab og usa ka dalugdog.

²⁵² Apan ania ang Pito ka nagsunodsunod nga mga Dalugdog, diha sa usa ra ka laray: usa, duha, tulo, upat, lima, unom, pito, kanang hingpit nga numero. Pito ka mga Dalugdog diha sa usa ra ka laray, ang mitingog, dili . . .basta mitingog na lang nga—nga usa, duha, tulo, upat, lima, unom, pito, sunodsunod. [Ginadukdok ni Igsoong Branham ang ibabaw sa pulpito sa pito ka higayon—Ed.] Dayon, dili mahimo sa mga Langit nga isulat Kini. Dili makahibalo ang mga Langit mahitungod Niini, bisan ang tanang uban pa, tungod kay wala man lang og unsa man nga timailhan. Usa kini ka malinaw’ng oras. Importante gyud kayo Kini, hangtud, nga Kini gitago gikan sa mga Manulonda.

²⁵³ Karon, ngano man? Kay kung mahibal-an man gud Kini ni Satanas, makahimo siya og dakung kadaot. Aduna gyu’y usa ka butang nga wala niya mahibaloi. Karon, mahimo niyang hubadhubaron ang unsa mang butang nga gusto niya, ug sundogsundogon ang unsa mang matang sa gasa, (Hinaut nga nakat-onan ninyo), apan dili niya mahibaloan Kini. Wala man gani Kini gisulat diha sa Pulong. Usa Kini ka bug-os nga sekreto.

²⁵⁴ Ang mga Manulonda, ang tanan, nagpakahilum. Pagmobuhat sila og usa ra ka paglihok, tingali mobutyag kini og usa ka butang, busa hilum lamang sila, nga gihunong bisan ang pagtugtog sa alpa. Gihunong ang tanan-tanan.

255 Pito, ang numero sa Dios sa kahingpitan. Pito [Ginadukdok ni Igsoong Branham ang ibabaw sa pulpito sa pito ka higayon—Ed.] ka dire-diretso mismo. Pito ka mga Dalugdog ang sunod-sunod nga mitingog, nga mora og aduna sila’y gina-espiling nga kung unsang butang. Matikdi, nianang higayona, sugdan na unta ni Juan nga isulat Kini. Miingon siya, “Ayaw Kini isulat.”

256 Wala gyud maghisgot si Jesus mahitungod Niini. Dili Kini puede isulat ni Juan. Wala gyu’y hibangkaagan ang mga manulonda bahin Niini. Unsa ba gyud Kini? Mao Kini ang butang nga, gisulti ni Jesus, “Bisan ang mga Manulonda sa Langit wala gyud hingsayran” og unsa man bahin Niini. Kita n’yo? Kita n’yo? Siya wala mahibalo Niini, Siya Mismo. Miingon, “Bugtong ang Dios” lamang ang nakahibalo Niini.

257 Apan gisulti Niya kanato, sa dihang atong “masugdan nga makita kining mga ilhanan nga nagakatuman na.” Karon aduna ba’y inyong nasabtan? [Nagaingon ang kongregasyon, “Amen.”—Ed.] Maayo. Matikdi, atong “sa diha nga ato nang makita kini nga mga ilhanan nga nagakahitabo na.” Kita n’yo?

Pagmahibal-an Kini ni Satanas . . .

258 Kung adunay usa ka butang kamo nga gustong mahitabo . . . Karon kinahanglan toohan n’yo ang akong pulong alang niini. Pag aduna ko’y butang nga ginaplanong buhaton, nahibalo ko nga mas maayo pa nga dili ko isulti kang bisan kinsa ang mahitungod niini. Dili nga basin isulti kini nianang tawhana, kondili tungod nga madungog unya kini ni Satanas. Kita n’yo? Dili niya makuha kini, sulod sa akong kasingkasing, samtang nga gisaradohan kini sa Dios pinaagi sa Balaang Espiritu, mao nga kini tali kanako lamang ug sa Dios. Kita n’yo? Wala gyud siya’y mahibaloan og unsa man bahin niini hangtud nga isulti mo kini, dayon madungog niya kini. Ug nasulayan ko nang . . . Isulti sa mga tawo nga duna ko’y buhaton og *ingon niini-ingon niana* nga butang, ug makita mo na lang ang yawa nga ginahimo niya ang tanan aron lang nga pugngan ka, diha sa imong dalan, kita n’yo, aron unhan ako didto. Apan kung nakuha ko ang kapadayagan gikan sa Dios, ug dili lang magsulti og unsa man bahin niini, nan lahi gyud kini.

259 Hinumdomi, paningkamotan gyud ni Satanas nga magsundog-sundog. Paningkamotan niyang sundogon ang tanan butang nga pagabuhaton sa Iglesia. Gipaningkamotan gyud niya nga buhaton kini. Namatikdan nato kini, pinaagi sa anticristo.

260 Apan mao kini ang usa ka butang nga dili niya masundog. Dili mahimong magkaaduna og mga pagpanundog niini, kita n’yo, tungod kay wala man siya may nahibaloan Niini. Wala siya’y paagi aron mahisayran Kini. Kini ang Ikatulong Pagbira.

Wala gayud siya’y hingsayran og unsa man bahin Niini. Kita n’yo? Dili niya masabtan Kini.

261 Apan adunay usa ka sekreto ilalum Niana! [Ginadukdok ni Igsoong Branham ang pulpito sa makausa—Ed.] Himaya sa Dios sa Kahitas-an! Ang akong panghunahuna dili na gyud mamahimong pareho sa gihapon nga sama kaniadto, sa tibuok nahabilin kong kinabuhi, sa dihang nakita ko. Karon, wala ko mahibalo kung unsa. . . Nahibalo ko kung unsa ang sunod nga lakang, apan wala ko mahibalo kung unsay, kung unsaon paghubad niana. Dili na kini magdugay. Nasulat ko dinhi, sa dihang nahitabo kini, kung makita ninyo dinhi, “Hunong. Ayaw nang ipadayon nga lagpas pa kay sa niining mismo dinhi.” Dili ko hilig nga mamahimong panatiko. Ginasulti ko lang ang Kamatuoran.

262 Apan nahinumduman n’yo ba ang mahitungod sa gamay’ng sapatos, nga kanunay kong gipaningkamotan nga isaysay kung unsa nga ang kalag anaa ra tapad sa *ingon niini-ug-ingon niana*, ug sa kinasulurang konsensya, ug tanan nianang matang sa butang? Nga, maoy nagpatungha og usa ka dakung pundok sa mga pagpang-sundog-sundog nga nagsugod human niana. Kung unsa nga kinahanglan nilang kuhaon ang kamot, ug gunitan ang mga tawo, ug magkaaduna og pagkurog-kurog? Ang tanang tawo aduna na’y pagkurogkurog sa ilang mga kamot.

263 Apan nahinumdom ba kamo, sa dihang gidala Niya ako didto sa itaas, ug miingon, “Kini mao kanang Ikatulong Pagbira, ug wala ni usa ang makahibalo Niini.” Nahinumdom ba ninyo kana? [Nagaingon ang kongregasyon, “Amen.”—Ed.] Dili gayud mapakyas ang mga panan-awon. Sila’y hingpit gayud nga Kamatuoran.

264 Karon matikdi. Nahinumdoman n’yo ba ang panan-awon mahitungod niadtong konstelasyon? Charlie, akong. . . Ania ka na.

265 Adunay butang nga nagakahitabo, nagsulti na ako kanimo, niining semanaha, nga ikaw. . . Kini anaa kanunay sa imong palibot, apan nahunahuna ko kung namatikdan mo kaha kini.

266 Nahinumduman n’yo ba ang konstelasyon, ang panan-awon bahin sa mga Manulonda, sa dihang minggikan ako dinhi aron moadto sa Arizona? [Nagaingon ang kongregasyon, “Amen.”—Ed.] Nahinumdoman n’yo ba ang *Unsang Oras Na Ba Karon, Mga Sir?* [“Amen.”] Nahinumduman n’yo ba kana? Matikdi, aduna lamang usa ka kusog nga pagtingog sa dalugdog, ug mipakita ang pito ka mga Manulonda. Husto ba kana? [“Amen.”] Usa ka pagdalugdog sa dalugdog, mitungha dayon ang pito ka mga Manulonda.

Ug nakita ko ang Cordero sa dihang iyang gibukhad ang unang selyo, ug nadungog ko, ang maong tingog nga

daw usa ka *dalugdog*, ug *ang usa sa upat ka mga buhing-binuhat* nag-ingon, *Umari ka ug tuman-aw*.

267 Matikdi, usa ka dalugdog, Pito ka mga Mensahe nga dugay nang selyado ug dili mapadayag hangtud sa kaulahi-ang adlaw, sa niining kapanahonan. Nakita n'yo ba kung unsa ang buut kong ipasabot? [Nagaingon ang kongregasyon, "Amen."—Ed.]

268 Karon, namatikdan ba ninyo ang mysteryosong bahin niining semanaha? Ingon niana Kini. Ingon niana kung unsa Kini kaniadto pa. Dili kini tawo, usa—usa ka tawo. Kini ang mga Manulonda sa Ginoo. Matikdi.

269 Adunay mga saksi, tulo sila, nga naglingkod dinhi, nga usa na ka semana ang milabay, medyo lagpas pa sa usa ka semana ang milabay, atua ako sa itaas, didto sa kabukiran, halos duol na sa Mexico, nga kauban ang duha ka mga igsoon nga naglingkod dinhi karon. Sa pagpunit ko og mga amorseko o tunokong-sagbot, gikan sa akong karsones; ug dunay usa ka pagbuto, nga halos, og, palumpag nga giuyog ang kabukiran. Karon, husto kana. Wala ko kini gisulti sa akong mga kaigsoonan, apan may namatikdan silang lahi.

270 Ug miingon ang Ginoo kanako, "Karon pagpangandam na. Adto ka sa silangan. Ania ang interpretasyon sa maong pananawon." Kita n'yo? Karon, aron ipahibalo sa inyo, wala madakop ni Igsoong Sothmann ang mananap nga iyang gipangayam. Gipaningkamotan namong makuha kini alang kaniya. Ug miingon ang Ginoo, "Karon, niining gabhiona, ingon nga usa ka ilhanan alang kanimo, dili niya kini mahimo. Kinahanglan nga ipahanungod mo ang imong kaugalingon niining orasa alang sa pagduaw niining mga Manulonda." Ug nabati ko nga mora og wala na ako sa akong kaugalingon, nahinumduman ninyo.

271 Ug atua ako sa kasadpan. Ang maong mga Manulonda nagapaingon sa sidlakan. Ug sa ilang pag-agi, ila akong gisabnit, (nahinumduman ba ninyo kana?) padulong sa sidlakan. [Nagaingon ang kongregasyon, "Amen."—Ed.]

272 Ug si Igsoong Fred, nga ania karong gabhiona, maoy usa ka saksi, ug si Igsoong Norman. Sa diha nga nangadto kami, halos nakumbinsi ko kining tawhana nga magpabilin ug buhaton ang iyang pagpangayam. Husto ba kana, Igsoong Sothmann? [Nagaingon si Igsoong Fred Sothmann, "Amen."—Ed.] Oo, kana, mao kana siya. Nakumbinsi ko; apan, bisan pa niana, miingon ang Ginoo, "Dili na niya buhaton kana." Wala gyud ko'y gisulti; nagpadayon ra mi.

273 May sa Kung Unsa, nga nagalingkod duol sa tolda, niadtong adlaw nga... Nahinumdoman mo ba, Igsoong Sothman. Ug ako, sa dihadiha nga nasulti ko ang pipila ka mga butang, nga gibutang ko ikaw ug si Igsoong Norman... Asa man si Igsoong Norman? Atua diay sa luyo. Ug sila akong gipapanumpa, nga dili nila isulti kung unsa man ang nahitabo. Husto ba

kana? [Nagaingon ang maong mga igsoon, “Amen. Mao kana ang kamatuoran.”—Ed.] Dili ba nga mitalikod ako ug milakaw palayo gikan niadtong tolda, nga *ingon niana*? Husto ba kana? [“Husto kana.”]

²⁷⁴ Tungod kay, mao gyud kini kung unsa kini kaniadto, eksaktong mao gyud kini, ug nasayod mismo nga dili ko magsulti niini hangtud mahitabo kini, tan-awon kung masabtan ba sa mga tawo kini.

²⁷⁵ Ug namatikdan ba ninyo? “Kanang usa ka Manulonda,” ingon ko, “nga didto, usa ka di-kasagrang Manulonda.” Mas nakatutok siya kanako kay sa uban pa kanila. Nahinumdom n’yo ba kana? [Nagaingon ang kongregasyon, “Amen.”] Anaa sila sa usa ka konstelasyon; tulo sa matag kilid, ug usa sa ibabaw. Ug ang usa mismo sa tupad ko, kung ihapon mo gikan sa wala ngadto sa tuo, mao ang ikapitong Manulonda. Mas hayag siya, mas mao kadtong gitan-aw ko kay sa uban Kanila. Nahinumdom ba mo? Miingon ko, “Nakabugdo ang Iyang dughan, sama *niana*, ug nagalupad pasidllakan” (nahinumdoman n’yo) “sama niana.” Miingon ko, “Gialsa nila ako; gibayaw ako pataas.” Nahinumdom n’yo ba kana? [“Amen.”]

²⁷⁶ Ania Kini, ang usa nga adunay Ikapitong Selyo, ang butang nga gikahibudngan ko sa tibuok kong kinabuhi. Amen! Ang uban niingon mga Selyo mahinungdanon gayud alang kanako, siyempre, apan, oh, wala lang ninyo mahibalo kung unsa Kini ka mahinungdanon gayud, usa ka higayon diha sa kinabuhi! [Ginadukdok ni Igsoong Branham ang ibabaw sa pulpito sa daghang mga higayon—Ed.]

²⁷⁷ Nag-ampo ako, nagtuaw ako ngadto sa Dios. Ako—ako—ako. . . Pagkahuman niadtong panagtigum sa Phoenix. . . Kinsa man sa mga tawong, uban kanako didto, nahibalo niini. Nagpabilin ako didto sa kabukiran.

²⁷⁸ Usa ka buntag, mibangon ako ug mitungas didto sa Sabino Canyon, niadtong dagko, lubaklubak, hatag-as nga mga kabukiran. Ug mitungas ako didto. Ug adunay usa ka gamay’ng agi-sa-tiil, pagkasugod mo paingon, pasaka ngadto sa Lemmon Mountain, nga kinahanglan mong lakwon og traynta-ka-milya, paduol na halos didto sa ibabaw nga may traynta-ka-piye nga niyebe. Busa, misaka ako sa bukid, sa sayo kaayo sa dili pa maghayag, gisubay kadtong gamay’ng agi-sa-tiil, nagakaligid paubos ang mga bato nga matunoban ko. Nabati kong gipangunahan ko nga moliko sa *niining* usa ka dalan. Ug miliso ako, ug misaka sa itaas ngadto sa pipila ka dagkung, mahait-hait nga mga bato, oh, grabe, nga ginatus ka piye ang kahabugon.

²⁷⁹ Ug miluhod ako sa taliwala niadtong mga bato. Gipatong ko *kining* Biblia, ug gipatong kining libro. . . *kining* gamay’ng sulatanan. [Gipakita ni Igsoong Branham ang iyang Biblia

ug sulatanan—Ed.] Miingon ko, “Ginoong Dios, unsa man ang kahulogan sa niining panan-awon? Ako—ako’y—ako’y...” Miingon ko, “Ginoo, kini... Nagkahulogan ba kini sa akong kamatayon?”

²⁸⁰ Mahinumdoman n’yo, gisulti ko sa inyo, “Nahunahuna ko nga tingali nangahulogan kini sa akong kamatayon, tungod kay adunay usa ka butang nga mibuto hangtud nga gitay-og ako niini sa hilabihan.” Nahinumdoman n’yo ba kini. Pila kaninyo ang nakahibalo niini, ang nakadungog niini? [Nagaingon ang kongregasyon, “Amen.”—Ed.] Aba, sigurado, kita n’yo, kamong tanan. Ug nahunahuna ko nga nagakahulogan kini sa akong kamatayon.

²⁸¹ Ug dayon sulod sa lawak, ingon ko, “Maoy... Unsa—unsa—unsa kaha kini, Ginoo? Unsa—unsa ang kahulogan niini? Nangahulogan ba kini nga mamatay na ako? Kon ingon-ana man, o sige, dili ko mosulti sa akong pamilya. Papadayona lang ako, kita n’yo, kung tapos na ba gyud ang akong trabaho.” Ug ingon ko...

²⁸² Karon, unsa man kadto? Apan nagpadala Siya og saksi pabalik, nahinumdoman n’yo ba nga nagsulti ako kaninyo, nga dili ingon niana diay. Usa diay kadto ka pagpadayon pa sa akong buluhaton. Oh, oh, oh! Nakuha ba ninyo kini? [Nagaingon ang kongregasyon, “Amen.”—Ed.] Kita n’yo? Ug sa paglingkod ko didto ibabaw sa Sabino Canyon...

²⁸³ Nahibalo niini ang Langitnong Amahan. Sa ingon ka sigurado sama nga makita ninyo kana nga mahitabo, kadtong mga Manulonda mikanaug mismo ug gipamatud-an ang matag Mensahe nga mao gayud. Kung ingon-ana, mahibaloan ninyo kung Kini ba nagagikan gayud sa Dios, o dili. Gisulti-nangdaan kini, kaninyo, tungod sa usa ka panan-awon. Dili ko kadto masulti kaninyo hangtud sa paghuman sa mga panerbisyo, tungod kay gidid-an man ako.

²⁸⁴ Didto sa Sabino Canyon, sa paglingkod ko didto niadtong buntaga, gibayaw ko ang akong mga kamot. Ug ang akong... Gilupad sa hangin ang daan kong itum nga kalo. Sa dihang... Nagtindog ako didto, nga gipataas ang akong mga kamot, nagaampo. Miingon ko, “Ginoong Dios, unsay ipasabot niini? Wala ko makasabot niini, Ginoo. Unsa man ang buhaton ko? Kung kini na ang panahon sa akong Pagpauli, kuhaa na lang ako dinhi, kon diin dili na nila ako makita. Dili ko gusto nga adunay mohilak, kung mobiya na ako. Ako—gusto kong hunahunaon lang sa pamilya ko nga naglakaw lang ako. Ug dili na nila ako makaplagan. Itago ako sa kung asa man. Kung mobiya na ako palayo, aba, tugoti akong mobiya na. Pagmakita ni Joseph ang akong Biblia nga napatong didto, sa umaabot nga adlaw, ug tugoti siya nga magamit niya Kini. Kita n’yo, kung kinahanglan na gyud kong mobiya, tugoti akong mobiya, Ginoo.” Ug ang

akong mga kamot nakabayaw. Ug, sa kalit lang, usa ka butang ang miabot sa akong kamot.

285 Wala ko mahibalo. Dili ko masulti. Kung nakatulog ba ako? Wala ko mahibalo. O kung nahiadto ba ako sa usa ka pananawon? Wala ko mahibalo. Kung usa ba kaha kadto ka pananawon? Dili ko masulti kaninyo. Ang butang lamang nga masulti ko maoy kung unsa ang akong. . . Mao rang butang sama kanila nga mga Manulonda!

286 Ug miabot kini sa akong kamot. Ug gitan-aw ko, ug usa kini ka espada. Ug aduna kini og mga perlas nga pulohan, maanindot kaayo; ug aduna kini og pang-sagang, nga bulawan. Ug ang sulab niini mora og chrome, mora'g pilak, mas sinaw lang kaayo. Ug pagkahait kayo sa sulab, oh, grabe! Ug nahunahuna ko, "Pagkamaanindot kaayo niana nga butang!" Haum nga haum pa gyud sa akong kamot! Nahunahuna ko, "Grabe kana ka maanindot. Apan," ingon ko, "hala, nahadlok pa na man ako sa mga butang nga sama niana, sa espada." Nahunahuna ko, "Unsa ma'y buhaton ko niana?"

287 Ug dayon sa kalit lang usa ka Tingog ang midahunog didto, nga nagpauyog sa mga bato. Miingon, "Ang Espada kana sa Hari!" Ug dayon migawas na ako gikan niadto.

288 "Ang Espada sa Hari." Karon, kung miingon lang Kini, "Usa ka espada sa hari. . ." Apan ang ingon Niini, "Ang Espada sa Hari." Ug adunay usa lamang ka "ang Hari," ug mao kana ang Dios. Ug aduna Siya og usa ra ka Espada, mao kana ang Iyang Pulong, nga akong gikinabuhi. Mao nga, tabangi ako, Dios; ingon nga nagatindog sa Iyang balaang pulpito dinhi, uban niining balaang Pulong nga napahimutang dinhi! Ang Pulong Kini! Amen! Oh, grabe nga adlaw ang atong gikapuy-an! Pagkaanindot nga butang! Nakita ba ninyo ang maong misteryo ug sekreto? Ang Ikatulo. . .

289 Sa pagtindog ko didto sa dihang mibiya kanako kini, may sa kung unsang Butang ang miabot kanako ug miingon, "Ayaw kahadlok." Karon, wala ko madungog ang tingog. Mora og sa sulod kanako, ang nagsulti. Kinahanglan isulti ko lamang sa inyo ang kamatuoran, sa ingon kaeksakto kung unsay nahitabo. May sa kung unsa ang miabot, ug miingon, "Ayaw kahadlok. Mao kini ang kanang Ikatulong Pagbira."

290 Ikatulong Pagbira! Nahinumdoman n'yo ba Kini? [Nagaingon ang kongregasyon, "Amen."—Ed.] Siya miingon, "Nagkaaduna ka og daghan na kaayong mga manunundog niini, sa kung unsa ang gipaningkamotan mong isaysay. Apan," miingon, "ayaw gyud isaysay, Kini." Nahinumdoman ba ninyo kini? Pila ba ang nakahinumdom pa nianang pananawon? ["Amen."] Aba, nakahinumdom gyud ang tanan. Nateyp mismo kini, ug bisan asa. Kana mga unom na ka tuig ang milabay, pito ka tuig na ang milabay. Pito na ka tuig ang milabay. Miingon,

“Ayaw sulayi nga isaysay Kana.” Miingon, “Mao kini ang Ikatulong Pagbira, apan makigkita Ako kanimo didto.” Husto ba kana? [“Amen.”] Ang ingon Niya, “Ayaw gyud sulayi. . .”

²⁹¹ Nagtindog ako nga may gigunitan nga usa—usa ka sapatos sa bata, sa dihang gisultihan Niya ako. Miingon, “Karon buhata ang imong Unang Pagbira. Ug sa pagbira mo, ang isda mosunod sa paon.” Ingon pa, “Dayon bantayi ang Ikaduhang Pagbira,” miingon, “tungod kay Kini mamahimong usa ra ka gamay’ng isda.” Ang gisulti Niya, “Dayon ang Ikatulong Pagbira mao na ang mokuha niana.”

²⁹² Ug silang tanan nga mga ministro mipalibot kanako, miingon, “Igsoong Branham, nahibalo kami nga mabuhat mo kana! Alleluyah! Igsoong Branham!” Dinha ako kanunay mapugos, sa grupo sa mga magwawali. Kita n’yo? Mahal ko ang mga tawo. Gusto nilang ipasabot mo ang tanang butang, *niini, niana*.

²⁹³ Ug miingon ko, “Bueno, uh, uh, uh,” ingon ko, “Wala ko mahibalo.” Ingon ko, “Nasabtan ko ang pagpangisda. Karon,” Ingon ko, “karon, unang butang nga buhaton n’yo. . . Ania ang pamaagi sa pagbuhat niini. Pagmakita n’yo na ang mga isda sa palibot; kinahanglan mong sintakon ang paon.” Bueno, mao kana ang eksaktong mga taktika sa pagpangisda. Busa ang ingon ko, “Sintakon ang paon. Karon, nakita n’yo, sa dihang gisintak ko ang paon, sa unang higayon, karon ang isda nangabingwit niini.” Apan sila mga gagmay pa. Ug mga sama niana ang ilang nangakuha.

²⁹⁴ Busa dayon ako—miingon ko, “Dayon inyong—ibutang ninyo. . .” Ug gisintak ko kini, sa baybayon. Ug nakakuha ako og isda, apan mora lang kadto og panit sa isda nga nakaputos sa paon, kadto’y. . . gamay kaayo.

²⁹⁵ Ug dayon sa diha nga nagatindog ako didto, ug Adunay miingon, “Gisulti Ko na sa imo nga dili mo buhaton kana!”

²⁹⁶ Nagsugod ko sa paghilak. Ang tibuok lambo nagkasambod-sambod kanako, sama *niini*. Ug ako. . .nagtindog didto, nagahilak, nga ang akong ulo nagduko nga sama *niana*. Ingon ko, “Dios! Oh, ako’y. . .Pasayloa ako! Ako—usa ako ka burong nga tawo. Ginoo, ayaw. . .Pasayloa ako!” Ug ako—nakasambod kanako kining lambo.

²⁹⁷ Ug, ang anaa sa akong kamot, usa ka gamay’ng sapatos sa bata, nga mga ingon *niana* ka taas. Ug gigunitan ang liston, mga hapit sa akong tudlo ang kabagaon, mga tunga sa pulgada, tingali. Ug gamay ang suksokan sa liston niining sapatos nga halos sukod ra sa usa ka. . .mas gamay pa kay sa usa—usa ka dise-sais nga bahin, siguro, sa usa ka pulgada, ang suksokan sa liston niining sapatos. Ug gisulayan ko gyud sa pagliston kining gamay’ng sapatos, gamit kining sobra ka daku nga usa ka pulgadang-liston. Huh!

298 Usa ka Tingog ang miabot, miingon, “Dili mo mahimong tudloan ang Pentecostal nga mga bata og supernatural nga mga butang.” Miingon, “Karon, pasagdi sila!”

299 Ug dayon sa kalit lang gialsa Niya ako pataas. Gibayaw Niya ako, ug gipalingkod ako sa usa ka hataas nga lugar, kon diin adunay panagtigum nga ginapahigayon. Daw sama sa usa ka tolda o usa ka katedral, nga matang. Ug nagtan-aw ako, ug mora og may usa ka gamay’ng kahon, sama sa, gamay’ng lawak sa may kilid. Ug nakita ko kanang Kahayag nga nagapakigsulti sa ngadto usa ka tawo, sa ibabaw nako, kanang Kahayag nga inyong makita dinha sa litrato. Nagtuyok-tuyok Kini palayo gikan sa kanako, sama *niana*, ug miadto sa ibabaw nianang tolda. Ug miingon, “Tagbuon ta ka didto.” Ug miingon, “Kini maoy mamahimong ang Ikatulong Pagbira, ug dili mo isulti Kini sa kang bisan kinsa.”

Ug sa Sabino Canyon, ang gisulti Niya, “Kini mao ang Ikatulong Pagbira.”

300 Ug adunay tulo ka dagkung mga butang nga kauban Niini. Ug ang usa napadayag karong adlaw, o, kagahapon; ang usa pa napadayag karong adlaw; ug adunay usa pa nga dili ko mahubad, tungod kay anaa kini sa usa ka di-maila nga pinulongan. Apan didto ako mismo nagatindog ug nagsud-ong mismo diretso Niini. Ug kini mao ang Ikatulong Pagbira nga magaabot. [Ginadukdok ni Igsoong Branham ang ibabaw sa pulpito sa makatulo ka higayon—Ed.] Ug ang Balaang Espiritu sa Dios. . . Oh, grabe!

Mao kana ang hinungdan nga hilum ang tibuok Langit.

301 Karon, ako—mas maayo pa nga mohunong na ako mismo dinhi, kita n’yo. Ako lang—nabati ko lang nga ginapahunong na ako, dili na magsulti og unsa pa bahin Niini. Kita n’yo?

302 Busa, timan-i gayud, ang Ikapitong Selyo, ang hinungdan nga Kana wala ablihi. [Ginadukdok ni Igsoong Branham ang ibabaw sa pulpito sa makaunom ka higayon—Ed.] Kita n’yo, ang hinungdan kon nganong wala Niini ipadayag Kini, walay usa ang angay’ng mahibalo bahin Niini.

303 Ug gusto kong mahibaloan ninyo, nga sa dili ko pa nahibaloan ang unsa mang Pulong bahin Niini, miabot na kanang panan-awon pipila ka tuig ang milabay. Nahinumdoman n’yo ba kana? [Nagaingon ang kongregasyon, “Amen.”—Ed.] Ug ania na Kini, sama sa usa pa niini, nga mitakdo gayud sa Pulong sa mismong eksaktong puwesto Niini. [Ginadukdok ni Igsoong Branham ang ibabaw sa pulpito sa makaduha.] Ug nahibalo ang Dios sa akong kasingkasing, nga wala ko gayud nahunahuna ni usa ka higayon ang ingon nianang butang sama Niana, ug ania na Kini. Mamahimong ulahi na kini kay sa atong gihunahuna. Uh-huh. Oh, grabe!

³⁰⁴ Nagapakita kana nga Kini gikan gyud sa Dios, tungod kay, tan-awa, eksakto Kining mitakdo gayud sa mga saad sa Dios, sa katapusan sa—sa Mensahe. Namatikdan n'yo. Matikdi karon, Mensahe alang sa kaulahi-ang-kapanahonan, kini nga Selyo. Pagkahuman sa tanan, Iyang—Iyang gipadayag ang tanang unom ka Selyo, apan wala Siya'y bisan unsa man nga gisulti bahin sa Ikapito. Ug ang pangkaulahi-ang—kapanahonang Selyo, sa dihang magsugod Kini, mamahimo Kining bug-os nga tinago, sumala sa Biblia, sa dili pa mahibaloan Kini. Ug hinumdumi, Pinadayag 10: 1-7. 1 hangtud 7, kapitulo 10: 1 hangtud 7, “Sa katapusan sa Mensahe sa ikapitong manulonda, ang tanang mga tinago sa Dios mahibaloan na.” Ania na kita sa kaulahi-ang panahon, ang pag-abli sa Ikapitong Selyo.

³⁰⁵ Karon, giunsa ko man sa paghibalo? Niadtong usa ka adlaw, sa miaging Dominggo, usa na ka semana ang milabay karon, sa dihang nagwali ko og “Magmapainubsanon! Magmapainubsanon! Hinumdumi, ang Diyos nagapakitigayon diha sa gagmay'ng mga butang.” Wala ko maamgo kung mahitungod ba gyud sa unsa kadto. Ug karon nakita ko na kini. Sa mapainubsanon gyud kadto nga paagi! Mahunahuna n'yo nga ang usa ka butang nga sama niana igapadayag ngadto sa Vatican o... Apan nagaabot Kini nga sama mismo ni Juan Bautista. Nagaabot Kini nga sama mismo sa pagkatawo sa atong Ginoo, diha sa pasungan. Himaya sa Dios! Busa hinaut nga tabangan ako, hapit na gyud ang oras! Amen! Ania na kita. Oh, grabe!

³⁰⁶ Karon nakita n'yo ba kini, ang Kamatuoran sa panan-awon nga iya sa Dios, gidala ako sa pito ka mga Manulonda gikan sa kasadpan? Nagsumikad sila gikan sa kasadpan, paingon sa sidlakan, nga dala dinhi kining Mensahe karong gabhiona. [Ginadukdok ni Igsoong Branham ang ibabaw sa pulpito sa makaduha—Ed.] Oh, grabe!

³⁰⁷ Karon, ang Tingog sa nianang kusog nga dalugdog, ug ang misyon nga gihatud dinhi, napadayag na, nga Kini... ug napamatud-an nga Kini iya sa Dios. Hunahunaa gayud. Wala ko mahibalo sa niining mga Selyo, ug sila napadayag niining semanaha. Aduna ba'y tawo nga nakahunahuna niana, mahitungod niadtong pito ka mga Manulonda ingon nga mao Kining, ingon nga mao ang moabot nga Mensahe, silang mga Manulonda nga magadala kanako pabalik dinhi alang Niana? Kita n'yo?

³⁰⁸ Hinumdumi, ang ikapitong Mensahero maoy... Ang maong pito ka mga Mensahero maoy... Ang Usa kanila nga namatikdan ko gyud, ang ikapitong Manulonda, kini Siya ang mas may epekto kanako kay sa uban kanila. Karon, kita n'yo, nagatindog sila nga ingon *niini*. Karon, gusto lamang nato nga mamatikdan ninyo. Ug nagatindog ako *dinhi* kaniadto, ug gitana-aw ko kadto ubang... .

309 Kita n'yo, usa, ang unang grupo, gagmay'ng mga langgam, nga nagkadaut-daut ang mga balhibo. Nahinumdoman n'yo ba sila? Ug nanglupad silang tanan padulong sa sidlakan. Ug ang ikaduhang grupo, mas hayag, mas dagku nga mga langgam, daw sama sa mga salampati, patalinis ang mga pako. Nanglupad sila pasidlakan. Unang Pagbira, Ikaduhang Pagbira, dayon ang sunod mao na'y mga Manulonda. Ug samtang. . .

310 Nagatindog ako mismo didto, ug nahitabo kining pagbuto. Ug nagatan-aw ako sa *niining* direksyon, paingon sa kasadpan, ug miabot sila ug ila akong gidala paitaas, Didto. Mipaitaas ko nga halos wala ko nahibaloan. Ug ang usa Kanila, nga miabot, Mao ang medyo talagsaon kaayo para kanako, ang Maoy anaa sa akong. . . Anaa sa akong wala, pagsulod ko sa konstelasyon. Apan kung ihapon n'yo gikan sa wala paingon sa tuo, mao kadto ang ikapitong Manulonda, kita n'yo, gikan sa wala pa-tuo. Karon, hinumdomi, ang pito ka mga Mensahero.

311 Nahinumdoman n'yo ba ang piramide sa puting Bato, sa damgo ni Junior Jackson nga ako na kadtong gihubad kaninyo? [Nagaingon ang kongregasyon, "Amen."—Ed.] Kita n'yo? Himatikdi, nianang gabhiona nga ako mibiya, ug ako. . . Adunay unom ka mga damgo nga miabot, ug ang matag usa niini direktang sa mao ra nga butang. Dayon nagsugod ang panan-awon, ug gipadala ako ngadto sa kasadpan. Ug, si Junior, nagatan-aw siya kaniadto samtang. . . Matikdi. Tan-awa kung unsa ka hingpit!

312 Karon, ako—nagalaum ako ug nagasalig nga kamong mga tawo nasayod gyud nga naningkamot lang ako nga ipahinungod kini nga grasya kang Jesus Cristo, Kinsa mao ang Gigikanan Niining tanan. Ug ang bugtong hinungdan usab nga wala ninyo ako nadungog nga naghigot og ingon niini kaniadto, sa inyong kinabuhi, apan nagasingabot na kining taknaa. Kita n'yo? Kita n'yo? Matikdan.

313 Karon aron mahimong sigurado kini, alang kaninyo, nga kini mapatuhop gyud kini. Nangandam na pud ako aron biyaan kamo pag-usab. Wala pa ko makahibalo kung asa ako moadto. Kinahanglan kong iwali ang Ebanghelyo sa ubang mga lugar. Apan karon, kana'y. . .

314 Tingali moingon kamo, "Nadungog ko na ang tanan nianang matang sa panatisismo." Wala ako mahibalo kung unsa; dili ko mahimong hukman ang kinsa pang ubang tawo.

315 Manubag lamang ako sa Dios alang sa kung unsay akong. . . alang—alang sa akong kaugalingon. Apan nagkaaduna ba ni usa ka higayon nga nagsulti ko sa inyo og unsa mang butang diha sa Ngalan sa Ginoo, nga dili husto, sa tanan niining mga tuig? [Nagaingon ang kongregasyon, "Wala."—Ed.] Walay si bisan kinsa ang makasulti, tungod kay kanunay kong ginasulti kini sa paagi lamang nga Iyang gisulti kini.

316 Karon tugoti lamang ako nga ipakita kaninyo nga kini eksaktong tinuod gyud, ug pamatud-an kini.

317 Karon hinumdomi, “Kung adunay usa ka espirituhanon o usa ka propeta, Ako nga Ginoo magapakigsulti kaniya diha sa mga panan-awon, ug ipaila kaniya pinaagi sa mga damgo.” Ang paghubad mismo og mga damgo, ingon niana. Si Joseph, makahimo siya sa paghubad og mga damgo, ug makasulti ug—ug makakita og mga panan-awon. Tinuod kana? [Nagaingon ang kongregasyon, “Amen.”—Ed.]

318 Karon himatikdi kini. Nga, karon, sa dihang nahitabo kini, nagatindog si Junior didto sa hawan nga adunay usa—usa ka dakung piramide, sama niana. Ug adunay nakasulat sa mga bato, ug ginapadayag ko Kana ngadto sa mga tawo. Tinuod ba kana, Junior? [Nagaingon si Igsoong Junior Jackson, “Husto kana.”—Ed.] Mga usa ka tuig sa wala pa kini nahitabo.

319 Ug matikdi ang sunod nga butang karon. Nagkuha ako og usa ka puthaw’ng barita ug giputol Kini, ug sa sulod Niini maoy puting Bato nga walay nakasulat. Ug, niadtong panahona, pabiya na ako padulong sa kasadpan. Ug gisultihan ko silang tanan, ingon ko, “Ayaw pag-adto sa kasadpan. Magpabilin mo dinhi ug magpaabot Niini hangtud ako makabalik.” Miadto sa kasadpan, alang sa maong pagbuto; mibalik dayon sa sidlakan, nga ginahubad na sa Balaang Espiritu nga kining wala-nasulat nga Pulong. Karon, kung kana dili ang mao mismong Dios nga Makagagahum-sa-tanan, nan gusto kong hibalong n’yo kung unsa kini.

320 Para ba diay sa unsa nga gipaningkamotan kong isulti kini, mga higala? Maoy aron ipakita kaninyo nga ania na kita sa katapusang panahon. Karon, kung ang uban niini hingpit gyud nagakatakdo sa Pulong, busa Kini ingon niana pud ka hingpit nga nagakatakdo sa Pulong! Ania na kita karon. Ania na kita sa katapusan, mga higala.

321 Sa dili madugay kini mamahimo nang “human na ang panahon.” Minilyon ang mawad-an sa ilang kinabuhi. Minilyon sa mga, nagatoo karon nga sila luwas, amahimong mga kumpay na lang alang sa panahon sa atomika. Nagapuyo kita sa katapusang takna. Tungod sa grasya sa Makagagahum-sa-tanan nga Dios, tungod sa Iyang tabang ngadto sa Iyang katawhan, sila nagapaabot sa hapit na kaayo nga pagpakita ni Cristo! “Unsa kadugay, Igsoong Branham?” Tingali baynte ka tuig; tingali singkwenta ka tuig; tingali usa ka gatus ka tuig. Wala ko mahibalo. Ug tingali sa buntag; tingali karong gabhiona. Wala ko mahibalo. Ug pag-adunay moingon nga nahibal-an nila, sayup sila. Kita n’yo? Wala nila hibala-i. Ang Dios, lamang, ang nahibalo.

322 Karon himatikdi. Busa hinaut nga tabangan ako, sa Dios, isulti ko ang Kamatuoran, nga ang mga Niini espirituwal nga

ginatugkad alang kanako, ginatugkad sa Balaang Espiritu. Ug, sa matag usa Niini, gipaila ang mismong dapit Niini sa Bibliya.

³²³ Karon, kung unsa kining dakung tinago nga nakapailalum niining Selyo, wala ko mahibalo. Wala gyud ko mahibalo niini. Dili ko kini mahimong sabot-saboton lang. Dili ko Kini masulti, kung unsa mismo Kini—kung unsa gyud ang gisulti Niini, apan ang nahibaloan ko nga Kini mao kadtong Pito ka mga Dalugdog nga sunod-sunod nga midahunog, midalugdog og pito ka higayon. Ug Kini napadayag ngadto sa usa ka butang nga akong nakita. Dayon, sa dihang nakita ko Kana, nangita ko og kahubaran. Paspas nga miagi kini didto, ug dili ko Kadto masabtan. Husto gyud kana. Kita n'yo? Dili pa gyud oras para Niini.

³²⁴ Apan, nagasulod Kini nianang pagbiyo mismo, kita n'yo. Nagakahaduol na nga nagakaduol kini. Busa, ang butang nga kinahanglan ninyong buhaton maoy timan-an n'yo nga nagasulti ako sa inyo diha sa Ngalan sa Ginoo. Pagpangandam, tungod kay wala kamo mahibalo kung unsang oras ang usa ka butang mamahitabo.

³²⁵ Karon, sa dihang marekord na kana sa teyp, nga ginarekord na Kini karon, tingali magadala kana sa napulo ka libo sa akong mga higala palayo gikan kanako. Tungod kay, ingnon nila, nga, “Ginapamugos ni Igsoong Branham nga ibutang ang iyang kaugalingon, ug himoon ang iyang kaugalingon, nga usa—usa ka alagad o usa ka propeta, o ingon niana, sa atubangan sa Dios.” Sultihan ko kamo, akong mga igsoon, usa ka sayup kana.

³²⁶ Gisulti ko lamang kaninyo kung unsa ang nakita ko ug kung unsay gisulti sa ako. Ug karon inyong—buhata ninyo ang unsa man nga gusto ninyo. Wala ko mahibalo kung kinsa ang mahimong...kung unsay magakahitabo. Wala ko mahibalo. Ang nahibaloan ko lang nga kanang Pito ka mga Dalugdog maoy nagkupot nianang misteryo. Hilom gyud ang Langit. Nasabtan ba sa tanan? [Nagaingon ang kongregasyon, “Amen.”—Ed.] Mahimong panahon na, mahimong mao na kini ang oras karon, nga kining halangdong tawo nga ginapaabot nato nga motungha sa esena motungha na.

³²⁷ Tingali kini nga ministerio, nga gipaningkamotan kong dalhon ang mga tawo pabalik sa Pulong, maoy nagpahimutang sa pundasyon; ug kung napahimutang na kini, biyaan ko kamo, nga dili na magabalik. Dili mahimo nga dungan kaming duha nga ania dinhi. Kita n'yo? Kung magdungan man, kinahanglan nga siya ang ituboy; ako magakunhod. Wala ko mahibalo.

³²⁸ Apan gihatagan ako og pribilihiyo, sa Dios, aron tan-awon ug makita kung unsa Kini, kita n'yo, makita sa ingon niana nga pagkapadayag. Karon, mao kana ang Kamatuoran.

³²⁹ Ug sigurado ko nga namatikdan ninyo ang mga butang nga nagakahitabo niining semanaha. Sigurado ko nga namatikdan

ninyo ang nahitabo sa gamay'ng batang lalaking Collins nga naghigda na lang didto, naghimalatyon na, sa miaging gabii; kadtong gamay'ng, batang babaye usab nga adunay leukemia.

³³⁰ Umaabot na ang Ginghamarian sa Dios. Ug mas nagakasigurado Kini ug nagakasigurado, sukad kaniadto. Karon, dili unta kana magpabalaka sa mga tawo. Gikan sa pagpamatarung, hangtud sa pagpabalaan, hangtud sa bautismo sa Espiritu Santo, ug dayon *dinhi, dinhi*. Kita n'yo? Nagakahaduol nga nagakahaduol kita sa Dios, sa tanang panahon.

³³¹ Dili ba ninyo makita, mga ministrong Methodist, kung unsa nga ang mensahe ninyo mahitungod sa pagkabalaan mas labaw pa kay sa kadtong giwali ni Luther?

³³² Kamong mga Pentecostal, dili ba ninyo makita nga ang mensahe ninyo mahitungod sa bautismo mas labaw pa kay sa kadtong giwali sa mga Methodist? Kabalo mo kung unsa ang buut kong ipasabot?

³³³ Oh, nagkaaduna na kita og daghang mga butang nga nanggawas! Ug husto kana. Ug kung aduna ma'y sayup nga nagapasipala, ug mga tawo nga nagasulti og butang nga bakak mismo ug dili ang Kamatuoran, dili ko gusto kana.

³³⁴ Apan ako—mahal ko ang lig-ong Kamatuoran, bisan pa kung unsa Kini ka mapakgangan sa *niining* dalanon o *nianang* dalanon. Kung Kini Kamatuoran, ipakita mismo Kini sa Dios ingon nga Kamatuoran. Kung dili Niya buhaton kana, usa sa niining mga adlaw nga dili magdugay, ang akong panan-awon makaplagan nga dili diay husto. Karon makita ninyo kung asa ko mismo ginapahimutang ang akong kaugalingon.

³³⁵ “Kanus-a kini mahitabo, Igsoong Branham?” Dili ko masulti sa inyo. Wala ko mahibalo.

³³⁶ Apan, usa sa niining mga adlaw, kung dili na kita magkita pag-usab niining kalibutan, magkita kita sa pikas didto sa—sa Lingkuranan sa Paghukom ni Cristo. Ug mahikaplagan ninyo, nga, sa nianang kwarto, nagaabot ang kapadayagan gikan sa Dios, sama lamang sa tanang uban pa, nga Sila... Usa sa misteryo nianang maong Selyo, ang hinungdan nga wala gyud Kini gipadayag, ang Pito ka mga Dalugdog Kadto nga mitingog sa Ilang mga tingog. Ug ania Kini, sa wala'y sayup. Tungod kay, wala'y nanghibalo sa unsa man bahin Niini. Wala gani Kini nasulat. Busa, ania na kita sa katapusang panahon. Ania na kita dinhi. Nagapasalamat ako sa Dios tungod sa Iyang Pulong.

³³⁷ Ginapasalamatan ko Siya tungod kang Jesus Cristo. Tungod kay, kung wala Siya gipadala alang sa—sa pagpasig-uli sa atong mga sala, kitang tanan maanaa gayud diha sa usa ka dakung lapuk sa kasal-anan, nga wala'y paglaum. Apan, pinaagi sa Iyang grasya, gihinloan sa Iyang—Iyang Dugo ang tanang kasal-anan. Sama lang sa usa ka tulo sa tinta diha sa usa ka balde

nga Clorox, dili na nimo makita pag-usab ang maong tinta. Sa dihang ang atong mga kasal-an maisugid, gibutang kini diha sa Dugo ni Jesus Cristo; dili na gayud kini mahibaloan pa pag-usab. Gikalimtan na sa Diyos kini; ni wala man lamang kadto nabuhat. Ug hangtud nga ang Halad anaa pa didto ingon nga usa ka pagbayad-sa-sala para kanato, nan kana lang gyud. Mao na kana, kita n'yo. Kita—dili na kita makasasala. Mga Cristohanon na kita, tungod sa grasya sa Dios. Hinumdumi, sa atong mga kaugalingon mahimong ingon kita ka dautan sama kaniadto. Apan, kita n'yo, nagpakita kanato ang grasya sa Diyos, ug mao kana ang nagpahimo kanato kung unsa kita sa karon, mga Cristohanong igsoong lalaki ug igsoong babaye.

³³⁸ Grabe kaayo kini nga semana para kanako. Gikapoy gyud ko. Gikapoyan ang akong hunahuna. Tungod kay ako—aduna ako . . . og pinakamaayo nga gibuhat. Ug adunay di-kasagarang butang ang nagakahitabo, matag adlaw. Matingala gyud ko; pagsulod ko sa lawak, ug pipila pa lang ka minuto nga anaa sa sulod, ug duna ko'y nakitang Butang nga bug-os gyud nagpabag-o kanako.

³³⁹ Ug, ania, moadto ako ug kuhaon ang mga sinulat-pahinumdom. Gikuha ko ang mga libro ni Dr. Smith, Uriah Smith, ug, oh, tanang sinulat sa—sa mga manunulat ug tanan na, ug nagbasa, gibasa ang ilang mga libro. Ingon ko, “Karon *ania* ang Ikaunom nga Selyo. *Ania* ang Ikaupat nga Selyo. Karon unsa na man ang gisulti niining tawo?” Ang ingon niya, ‘Bueno, Kadto mao *kini, kana, o uban pa.*’” Kung basahon ko usab dinhi ug tanawon kung unsa ang ginasulti sa usa na usab ka tawo. Moingon siya nga Kadto maoy *ingon niini-ug-ingon niana*. Ug kini medyo akong . . . Dili ko gyud mapuslan. Kita n'yo?

³⁴⁰ Dayon nahunahuna ko, “Bueno, unsa ba gyud Kini, Ginoo?” Ug makadiyut ako nga molakaw pabalikbalik. Moluhod ug mag-ampo. Mobalik ug kuhaon ang Biblia; molingkod, mobasa. Maglakaw pabalik-balik.

³⁴¹ Dayon, sa kalit, sa nagpuyo na lang ko ug naghilum, ania Kini nga naabli na lamang nga ingon niana. Dayon gipudyot ko sa gilayon ang igsusulat, ug gisulat Kini nga sama niana, unsa man ang makita ko ug ginabuhat. Ginatan-aw Kini, nga ingon niana, hangtud sa nasulat ko Kini.

³⁴² Dayon ubuson ko, ang nahabilin nga adlaw, ug tun-an ug subayon Kini, ug tan-awon kung nagakatakdo ba gyud Kini sa tibuok Kasulatan. Dayon, “Sulayi ang tanang mga butang.” Kita n'yo? Nakuha ko Kini dinhi.

³⁴³ Ug nahunahuna ko, “Karon, daghang mga tawo ang adunay mga panan-awon. Daghan ang dugay nang may mga kapadayagan.” Pero kung sukwahi kini sa Pulong, biyai kini; husto kana, biyai kini.

³⁴⁴ Karon, karon, dayon gitun-an ko Kini og sama *niini*, gisusi kini sa ingon *niining* paagi. Gisulat ko ang gamay'ng mga butang dinhi. Nahunahuna ko, “Bueno, karon, malipay gyud ang kongregasyon nga madungog kini, tungod kay nagatukma kini *dinhi* ug nagakatukma *dinhi*. Karon, tan-awon nato, kung unsa ang ginaingon niini *dinhi*? Oo. Ug, oo, ania kini, mismo *dinhi*.” Kita n’yo?

³⁴⁵ Ug gisusi ko Kini sa tibuok Biblia, ug nagkatakdo mismo, sa tibuok nga semana. Anaa na Kini, sa mga teyp. Ginadapit kamo para niini. Ug gibuhat ko kini kutob sa akong nahibaloan, ubos sa Cristohanong pagpakigfellowship, sa grasya sa Dios, alang sa tanang mga tawo, pinaagi ni Jesus Cristo. Gibuhat ko ang pinaka maayo nga nahibaloan ko kung unsaon.

³⁴⁶ Nahimong usa kamo sa pinaka maayong mga magtutuoan. Wala na’y uban pa nga ingon ka mapatalinghugon nga mananambong. Ala una pa lang ang takna sa adlaw ania na kamo, hangtud sa alas singko, sa matag higayon nga ablihan nila ang iglesia ug pasudlon ang . . . nga pasudlon na ang mga tawo. Nanagtindog kamo sa katugnaw; nanaglingkod kamo sa niyebe; gibuhat ninyo ang tanan na; nanagsandig na lang sa mga pader, hangtud manghawoy na lang ang inyong mga tiil. Makita ko ang mga kalalaken-an, nga nanagpungko. Ginahatag ang ilang mga lingkoranan sa mga kababayen-an, ug ang uban pa manindog, ug sama niana, para ang uban makalingkod. Nahunahuna ko, “Ginoo, ang tibuok mismong . . .”

³⁴⁷ Usa gyud kini ka misteryosong semana. Ang maong tibuok butang di-kasagaran gayud, kung unsa nga, ang mga tawong nangabot, makita mo nga silang nanagtindog didto sa gawas, diha sa mga bintana, sa mga pultahan, mga anaa sa likod, bisan diin, nagapaminaw gayud. Ug ingon nga mao ang mamumulong, layo ra kaayo ko sa usa ka mamumulong. Ako—aduna ko og ingon niana lang nga kaalam, aron mahibaloan nga ako dili, dili gayud usa ka mamumulong. Apan ngano man nga ang mga tawo manglingkod mismo ug maminaw nga sama niana? Nganong buhaton man nila kini? Wala sila moanhi aron madungog ang usa ka tawo nga sama kanako. Apan nanganhi sila tungod kay aduna gyu’y Butang diha niini, nga ginapaduol ang mga tawo. Husto kana. Kita n’yo? Aduna gyu’y Butang diha niini, nga maoy nagapadani kanila.

³⁴⁸ Sa dihang ang akong asawa nagtindog dinhi sa entablado ug nagkanta, sa diha nga ako nagsugod pa lang:

Gikan pa sila sa Sidlakan ug Kasadpan,
 Gikan pa sila halayong dapit,
 Aron magkumbira uban sa Hari, aron
 molingkod ingon nga Iyang bisita;
 Pagkabulahan gyud niining mga
 magpapanaw!

Nga nakita ang Iyang balaang dagway
 Nga nagasidlak diha sa Balaanong Kahayag;
 Mga gipanalanginang umalambit sa Iyang
 grasya,
 Ingon nga mga mutya diha sa Iyang korona nga
 nagasidlak.

349 Hinaut nga kanunay ninyong timan-an kana sa inyong hunahuna, “Ang mamahimong mutya diha sa Korona ni Jesus Cristo.” Giingon ni Pablo sa Iglesia, “Kamo mao—kamo mao ang mga alahas, o, mga mutya sa Iyang Korona.” Gusto nato nga mamahimong mga mutya sa Korona ni Jesus Cristo.

350 Dili nato gusto, wala kita sukad magbutang og tawo diha niini. Kalimtan ninyo ang unsa mang butang bahin kanako. Igsoon lang ninyo ako, usa ka makasasala nga naluwas tungod sa grasya, dili gani angayan mabuhi. Mao kana ang eksaktong kamatuoran. Wala ko kana ginasulti aron nga magpaubos; mga kamatuoran kana. Wala gyu’y unsa mang butang kanako, wala ni usa ka maayong butang, man lang.

351 Apan gitugotan sa grasya sa Diyos ang akong luoy’ng, nagakahanap na nga mga mata nga matan-aw ang luyo sa tabil sa panahon ug makita kadtong mga butang nga atua didto, ug ako mibalik.

352 Sa dihang bata pa ako kaniadto, gihigugma ko ang mga tawo. Gusto ko kanunay nga aduna man lang maghigugma ug makig-istorya kanako. Wala gyu’y ni usa nga gustong mobuhat niini, tungod sa reputasyon sa akong pamilya. Walay usa nga gustong magpakigsulti kanako.

353 Apan sa dihang gihimo ko ang pagsurender ngadto sa Dios, dayon . . . Ang among kaliwat, gigikanan, ingon nga Irish, nahunahuna ko, “Siguro . . . Tanan man gud sila mga Katoliko, ug tingali mao na gyud Kini.” Miadto ako *didto*, ug Siya’y anaa sa ingon niining dalan. Ug pag-adto ko usab didto sa iglesiang First Baptist, ug Siya’y anaa sa lahi na usab nga dalan.

Miingon ko, “Ginoo, siguradong aduna gyu’y usa ka matuod nga dalan.”

Ug Adunay miingon, “Kini mao ang Pulong.”

Nanggunit ako nianang Pulong. Tan-awa n’yo na lang ang matag panan-awon, bisan asa.

354 Sa adlaw nga gipahiluna ko ang ulohang-bato kaniadto, ug gipahimutang kana dinha, gisulat ko dinha kung unsay gipakita Niya kanako niadtong buntaga sa usa ka panan-awon. “Magmakugi sa panahon, sa dili panahon; mangsaway ka nga may pagkamapailubon ug sa Magtudlo. Kay moabot ang panahon nga dili na sila molahutay sa maayong Pagtulonan; kondili uyon sa ilang kailibgon magatigum sa ilang mga kaugalingon, og mga magtutudlo, nga may mga dalunggan nga

gikatlan; ug managpamiya gikan sa Kamatuoran, paingon sa mga sugilanon lamang.” Ug nakita ko kanang duha ka kahoy, abay kanako, nga ginabuhat kana mismong parehong butang. Husto kana. Ug ania na kita. Ug tinuod kana. Ug, karon, kamo dili . . .

³⁵⁵ Hinumdumi. Tugoti akong magpahamatngon pag-usab. Ayaw pag-ingon og, “Salamat,” kang bisan kinsa, man. Ayaw pag-ingon, ayaw hunahunaa nga, ang ministro o kinsa man, nga tawo; nga aduna og unsa man nga maayong butang kaniya. Tungod kay, wala gyud. Dili ko igsapayan kung kinsa man siya. Wala gyud og unsa mang butang nga maayo sa kang bisan kinsa nga tawo. Husto kana.

³⁵⁶ Kung aduna ma’y dinhi og usa ka hugpong sa mga trumpeta, ug ang usa niini kinahanglan magpatugtog og musika, tawo ang gikinahanglan . . . Kini nga mga trumpeta dili mismo makapagtugtog. Tawo ang maoy makapatugtog sa trumpeta, nga maoy nasayod kung unsa ang iyang igatugtog, siya ang nagapatugtog sa trumpeta. Wala’y kalabotan niini ang trumpeta. Nagagikan ang maong tugtog sa usa ka kaalam nga anaa sa luyo niini. Husto kana. Busa, mao ra ang tanang trumpeta.

³⁵⁷ Ang tanan tawo pareho ra. Ang tanang mga Cristohanon pareho ra. Wala’y tawong mas labaw kanatong tanan. Dili kita mas nakalabaw nga mga lalaki, dili kita mas nakalabaw nga mga babaye. Managsoong mga lalaki ug mga babaye kitang tanan, tanan pareho ra, pare-pareho ra kitang matang tanan. Dili kita “mas labaw.” Walay tawo ang makahimo sa usa pa nga mamahimong mas labaw, wala ni usa ka butang man lang, nga mapahigayon kana. Wala, sir. Apan kitang tanan mga tawong binuhat lamang.

³⁵⁸ Ayaw sulaying interpretahon ang mga butang. Ayaw sulaying magbuhat og unsa pa mang butang gawas ang pagkinabuhi lamang sa duol nga kinabuhi, nga nagahatag og pagdalayeg ug pasidungog ngadto kang Jesus Cristo. Nakasabot ba niana ang tanan karon? [Nagaingon ang kongregasyon, “Amen.”—Ed.] Ug dayon nahigugma Kaniya uban sa bug-os ninyong kasingkasing. Ginabuhat ba ninyo kana? [“Amen.”]

I love Him, (Ug buhaton ko!), I love Him
Because He first loved me
And purchased my salvation
On Calvary’s tree.

³⁵⁹ Dalaygon ang Dios! Nasabtan ba gyud og ayo sa tanan? [Nagaingon ang kongregasyon, “Amen.”—Ed.] Nagatoo ba ang tanan? [“Amen.”] Nadumdoman n’yo ba niadtong una akong nagsugod, “Kinsa ba ang mitoo sa among pamahayag? Kang kinsa ba napadayag ang bukton sa Ginoo?” Gipadayag ba Niya nganha kaninyo, ang Iyang pagkamaloloy-on, ang Iyang

pagkamaayo? [“Amen.”] Amen. Timan-i lang, higugmaa Siya sa tibuok ninyong kasingkasing.

³⁶⁰ Mopauli na ako. Mobalik ra ako dinhi pag-usab, kon kabubut-on sa Ginoo, sa mga una sa Hunyo.

³⁶¹ Tingali, kung ibutang kini sa Ginoo sa akong kasingkasing, tingali sa ubang adlaw niining unang ting-init, mga Hunyo o kanus-a man, tingali sa unang ting-dagdag, kung magdugay pa ang Ginoo, gusto kong mobalik ug maggahin og dugang pa nga pito ka gabii, alang sa Pito ka katapusang mga Trumpeta. Gusto ba ninyo kana? Gusto ba ninyo kini? [Nagaingon ang kongregasyon, “Amen.”—Ed.] Mag-ampo ba kamo alang kanako, nga tabangan ako sa Dios? [“Amen.”] Sige.

³⁶² Hangtud magkitaay kita pag-usab, hinumdumi kining maayong karaang kanta:

I love Him, I love Him
Because He first loved me
And purchased my salvation
On Calvary's tree.

³⁶³ Karon gusto kong iduko ninyo ang inyong ulo. Gusto kong mag-ampo alang kaninyo. Sa dili pa tapuson sa pastor, gusto kong mag-ampo alang kaninyo.

³⁶⁴ Langitnon namong Amahan, hinaut unta ang mga tawo, Ginoo, nakasabot. Nga, nakasigurado ako nga adunay pipila nga wala gyud. Apan, Amahan, hinaut unta nga sila—mahibaloan nila ang maong katuyoan. Ug hinaut unta nga masabtan nila, Amahan, nga—nga kini mao ang Imong grasya nganha kanila nga kining mga butanga napadayag. Ug gusto kong magpasalamat Kanimo, Ginoo, tungod sa pagkahibalo niining mga butanga nga gipadayag Nimo kanamo.

³⁶⁵ Ug ginapangamuyo ko alang sa tanan nga ania dinhi, ang tanan nga nagtambong niining mga panagtigum. Kung aduna may pipila nga wala nagatoo, hinaut unta, Ginoo, mamahimo silang magtotoo.

³⁶⁶ Nagapangamuyo ako alang sa tanan nga magapaminaw sa maong mga Mensahe pinaagi sa teyp. Ug kung Kini moabot, nga Kini moabot man gyud, sa walay pagduhaduha, ngadto sa mga panimalay ug mga lugar sa daghang mga dili-magtotoo nga dili-mouyon niini; apan, Amahan, nagapangamuyo ako alang sa matag usa, nga sa dili pa sila magsulti og unsa man nga mapasipalaong pulong, nga unta manggilingkod unà sila ug susihon ang mga Kasulatan kung unsa gyud ang giingon, ug dayon magsulti sa Imo nga sila mga sinsero mismo ug gustong mahibaloan kung kini maoy Kamatuoran, o dili. Ug nangamuyo ako alang kanila, Amahan.

³⁶⁷ Ug nagaampo ako alang sa niining mga nanagtindog sa kilid niining mga bungbong, sa mga nanagtindog sa gawas, sa mga

nanggilingkod sa ilang mga sakyanan, alang sa gagmay'ng mga bata, ug alang sa tanan nga ania sa sulod. Ug sa tanan mismo kanila, Ginoo, nagapangamuyo ako alang kanila.

³⁶⁸ Ug nagapangamuyo ako nga ang akong mga pag-ampo pagadunggon, nga panalanginan Mo sila. Una, Ginoo, hatagi ang matag usa og Kinabuhing Walay Katapusan. Nagapangamuyo ako nga wala ni usa kanila ang malaglag, wala gyud ni usa.

³⁶⁹ Ug karon, Amahan, wala kami mahibalo kung kanus-a mahitabo kining dakung panghitabo. Apan sa dihang makita na namo kining mga ilhanan nga nagapadayag na, ug mga panghitabo subay sa Kasulatan, ginapainit niini ang among mga kasingkasing sa dili masukod. Ug nagapangamuyo ako, Amahang Dios, nga tabangan Mo kami.

³⁷⁰ Nagapangamuyo ako nga tabangan Mo ang among minahal nga pastor, si Igsoong Neville. Himoa siya, Ginoo, nga puno sa grasya ug puno sa gahum, ug adunay pagpanabot, nga mahimo niyang dalhon kining tinigum nga Pagkaon ug pakan-on ang mga karnero sa Dios.

³⁷¹ Ginoo, nagaampo ako nga padayon Mong ipahilayo ang mga sakit gikan kanamo. Hinaut nga kini mamahitabo, nga sa dihang ang mga tawo magkasakit, nga mahinumdoman nila ang kanunay ug may-kasarang-sa-tanan nga Dugo ni Ginoong Jesus nga nakapahamutang didto ibabaw sa halaran, aron maghimo og panghimayad. Ug nagaampo ako nga mamaayo sila sa gilayon.

³⁷² Ug nagaampo ako nga padayon Mong ipahilayo ang gahum ni Satanas gikan kanila, nga maoy nagapaluya kanila, o nagapaningkamot nga itukmod sila nga mangahimong mga kulto. O, ipahilayo gayud ang tanang mga gahum sa kaaway, Ginoo. Balaana kami pinaagi sa Imong Pulong. Itugot kini, Ginoo.

³⁷³ Dayon, Ginoo, ginaampo ko nga tabangan Mo ako. Ako—ako—nagsugod na akong matigulang, Ginoo. Nahibalo ako nga ang akong mga adlaw dili na mahimong modaghan pa. Ug ginaampo ko nga tabangan Mo ako, tugotan akong magmatinuuron, Ginoo, ug magmatinud-anon ug sinsero, aron mahimo kong dalhon ang Mensahe hangtud ngadto sa gisugo Mo kanako nga dalhon. Ug sa dihang moabot na ang panahon nga kinahanglan ko nang magpahulay, ug molugsong na ngadto sa Suba, ug ang mga balud magsugod nang mangabot, Oh Dios, hinaut nga mahimo ko pang ipasa kining karaang Espada ngadto sa kang kinsa man nga mamahimong matinud-anon Niini, Ginoo, ug pagadalhon ang maong Kamatuoran. Itugot kini, Ginoo. Ug, hangtud nianang adlaw, tabangi ako nga magmalig-on ug himsog, ug magmaisogon.

³⁷⁴ Tabangi ang akong iglesia. Panalangini kaming tanan, Ginoo. Kami nga Imo man. Mabati namo karon nga ang Imong Espiritu anaa sa among taliwala. Nagatoo kami nga

pagatubagon Mo ang among mga pag-ampo. Tungod kay, ginatugyan namo ang among kaugalingon nganha Kanimo, kauban ang Imong Pulong, alang sa pagpangalagad sa tanang nahabilin pang mga adlaw namo dinhi sa yuta, sa Ngalan sa Anak sa Dios, si Jesus Cristo, ang among hinigugmang Manluluwas, alang sa Iyang kahimayaan. Amen.

I... (Panalanginan kamo sa Dios!)... I love
Him, (sa bug-os kong kasingkasing),
Because He first loved me

³⁷⁵ Panalanginan ka sa Dios, Igsoong Neville...? ... Pagpabilin gayud sa imo mismong pagpangitungdanan...?...

GIPADAYON ANG IKAPITONG SELYO

³⁷⁶ [Bag-ohay mo lamang nahuman ang pagpaminaw sa orihinal nga *Ikapitong Selyo* maingon nga giwali kini kaniadto diha sa kinatibuk-an niini niadtong Dominggo sa gabii, Marso ika-24, 1963 didto sa Branham Tabernacle sa Jeffersonville, Indiana. Dili unta gusto ni Igsoong Branham nga ipagawas kining orihinal nga rekording. Pagkasunod nga adlaw'ng, Lunes, Marso ika-25, 1963, miadto si Igsoong Branham sa lawak sa motel nga giistaran ni Igsoong Sothmann ug Igsoong James Maguire nga maoy mga nagdumala niadtong panahona sa pagpanghimo og mga teyp. Gisultihan ni Igsoong Branham kining mga igsoong lalaki, "Dili ko gustong ipang-apod-apod kini nga mensahe nga ingon niana kini." Pagkahuman niya pagpaminaw mismo sa maong teyp, gisugo niya kining mga igsoon nga ipahunong ang maong teyp diha sa usa ka bahin, ug sugod nianang bahina (sugod sa parapo numero 261) nagrekord siya og bag-ong bahin nga naglangkob og kapin kun kulang baynte minutos ang gidugayon (nga mao ang parapo 377-415). Kining bag-ong bahin sa recording maoy gipuli sa orihinal (nga parapo 261-375). Kini nga rekording mao ang bugtong gipagawas nga bersiyon sa "Ikapitong Selyo" hangtud sa 1966. Pagkahuman nga gikuha na si Igsoong Branham sa eksena, ang hunta sa William Branham Evangelistic Association nagkahiusa sa pag-uyon nga ipagawas ang teyp nga orihinal nga girekord didto sa Tabernacle. Sukad niadtong panahona, ang parehong mga bersiyon puede na nga ipang-apod-apod. Giapil na namo karon ang kining dugang nga mensahe ni Igsoong Branham diha sa usa ra ka teyp, uban ang orihinal nga "Ikapitong Selyo." Ang sunod nga tingog nga inyong madungog mao si Igsoong Branham sulod sa lawak sa motel didto niadtong Lunes, Marso ika-25, 1963—Ed.]

³⁷⁷ Mamahimo kining usa ka maayong butang nga wala siya'y nahibaloan og unsa mang butang bahin Niini. Tungod kay, kung nahibaloan niya, nan pagasundogon niya Kana. Mao kana ang iyang mga pamaagi sa pagbuhat sa mga butang.

378 Busa, mao nga, gihimo Kini sa Dios nga tinago ngadto sa tibuok kalibutan, bisan pa sa Langit, nga wala gyu'y paagi nga masabtan Kini, gawas kung ipadayag Kini sa Dios, Siya mismo.

379 Karon gusto kong himatikdan ninyo, karong gabhiona, nga sa Ikaunom nga Selyo, adunay—adunay ka tulo-ka-pilo nga katuyoan ang Ikaunom nga Selyo.

Adunay tulo-ka-pilo nga katuyoan ang mga mangangabayo.

380 Kanunay'ng adunay tulo-ka-pilo nga katuyoan sa tanan niining mga butang. Nga nagadala kanato balik ngadto sa tulo. Ug ang numerong pito, pag-usab, kita n'yo, Pito ka mga Selyo, Pito ka mga Panaksan, ug uban pa. Karon, diha sa mga numerong tulo ug pito, maoy numero sa Dios diha sa Iyang matematika sa pagpadayag sa Iyang Pulong.

381 Karon namatikdan n'yo, sama diha sa—sa—sa mga mangangabayo, karon, adunay tulo ka mga kabayo ang migula. Puti ang usa kanila, ang usa usab pula, ang usa na usab itum. Ug dayon, sa ikaupat nga kabayo, aba, gipangsagol-sagol ang tanan niining mga kolor. Kita n'yo, usa ka tulo-ka-pilo nga katuyoan.

382 Karon, mao usab ang gibuhath sa Dios. Mao usab ang gibuhath sa Dios sa dihang gipadala Niya ang Iyang leon, nga mao ang Iyang Pulong, aron pakigbatokan ang anticristo.

383 Dayon makita nato nga gipadala Niya ang baka niadtong panahon sa—sa panahon sa kasakitan, ang hinalad nga mananap. Ug sa niining panahon sa kasakitan, mao lang gyud kadto nga mahimo sa mga tawo, ang magpangabudlay mismo, magpaulipon, ug ihalad ang ilang kaugalingon ingon nga usa ka halad.

384 Dayon makita nato, sa sunod nga kapanahonan, nga mao ang kapanahonan sa mga repormador, gipadala sa Dios ang kaalam sa tawo, usa ka itsurang-tawo nga ulo nga Buhing-binuhath, nga mao ang gahum nga anaa sa maong mga repormador.

385 Karon namatikdan ba ninyo? Sa matag... Dili ikatingala nga ang mga tawo sa niining panahon nagkinabuhi pa sa gihapon sa mga salin-salin, nga mora og anaa pa gihapon sa kaniadtong kapanahonan sa mga repormador, tungod kay nakita lamang nila kini sa—sa pang-simbahan nga paagi sa pagtan-aw niini. Nakita nila kini diha sa paagi nga gikatudlo kini sa mga seminaryo. Pamaagi kana sa Dios para sa kaniadtong panahon, apan lagpas na kita niana.

386 Karon anaa na kita sa kapanahonan sa agila, sa kapadayagan nga gipadayag, ang tibuok butang. Karon itandi kini sa ika-10 nga kapitulo sa Pinadayag, bersekulo 1 hangtud sa 7. Ug makita nato dinhi sa niining Pinadayag, ang Pinadayag dinhi, 10: 1 hangtud sa 7, nga, "Sa mga adlaw sa pagtingog

sa Mensahe sa ikapitong manulonda, maoy aron humanon ang tanang mga misteryo sa Dios.”

³⁸⁷ Karon makita nato, usab, sa niini, nga ang Ikaunom nga Selyo, karon ingon nga abli na, alang kini sa tulo-ka-pilo nga katuyoan. Karon, ania ang maong mga katuyoan.

³⁸⁸ Ang unang butang, mao, nga ang nagakatulog nga mga dalagang ulay kinahanglan nga moagi sa panahon sa Kasakitan aron nga maputli. Kinahanglan siyang mahinloan gikan sa iyang mga sala sa dili-pagtoo ug pagsalikway sa Mensahe. Kini, pagabuhaton diha sa panahon sa Kasakitan. Makita nato sila dinhi sa Pinadayag 7, tali sa ika-6 ug ika-7 nga kapitulo dinhi, nga siya gihinloan gayud, ug gikahatagan siya og iyang mga bisti. Karon, dili siya ang Pangasaw-onon. Kondilil kini mao ang iglesia, ang putli nga mga tawo nga—nga—nga wala nagkaaduna og kahigayonan, tingali, aron dawaton ang Mensahe, o sa tungod sa unsa mang paagi nga nangabutahan sila sa niining mini nga mga propeta. Ug sila—wala sila nagkaaduna og kahigayonan, apan bisan pa man sinsero sila sulod sa ilang kasingkasing. Ug nahibalo ang Dios sa ilang kasingkasing. Ug dinhi gihinloan sila, nianang panahona.

³⁸⁹ Namatikdan ninyo kini, usa na usab ka panahon sa paghinlo, alang sa Israel, pagnatigum na sila. Kana ang ikaduha pilo. Pagahinloan sa Dios ang Israel diha sa panahon sa Kasakitan. Gikan sa minilyon nga matigum didto, magkaadunay pinili nga usa ka gatus ug kuwarentay-kuwatro ka libo, ug pagahinloan sila, usab. Ginahinloan gayud sa Dios ang Israel.

³⁹⁰ Himatikdi, ang tibuok kalibutan nga kinahanglan pagahinloan. Magakahitabo mismo nga ang bulan, mga bitoon, ug ang tibuok kinaiyahan, pagahinloan. Makita n’yo na kung unsa kini? Pagabag-ohon sa kalibutan ang iyang kaugalingon, pagahinloan, sa pagpangandam alang sa Milenyum. Hapit na magaabot ang Milenyum. Ug, kita n’yo, ang tanang butang nga aduna og unsa man nga kahugawan diha niini kinahanglan pagahinloan sa panahon sa Ikaunom nga Selyo.

³⁹¹ Karon, karon, namatikdan ba ninyo? Sa pag-abli niining Ikapitong Selyo, anaa usab kini sa tulo-ka-pilo nga ministeryo. Kining usa, akong. . . magahisgot ug naghisgot na, nga kini mao ang ministeryo sa Pito ka mga Dalugdog. Ang Pito ka mga Dalugdog sa Langit ang magpadayag sa niining ministeryo. Mahitabo kini sa Pag-abot na ni Cristo mismo, tungod kay giingon ni Cristo nga wala ni usa ang mahibalo kung kanus-a Siya mobalik.

³⁹² Nakita ba ninyo, sa dihang gipangutana kana sa mga Judio? Hibalo-i. . . Kung atong itandi ang Kasulatan dinhi sa Mateo 24, sa Unom nga Selyo, ang ika-pito nga Selyo wala gihisgotan. Tungod kay, kita n’yo, si Cristo nag-ingon, “Ang Dios ra Mismo ang nahibalo; bisan ang mga Manulonda wala gani nahibalo.”

Dili ikatingala, nga wala kana gisulat. Nakita n'yo, nanghilum sila; walay bisan unsa man ang nahitabo nianang higayona. Wala mahibal-an kini sa mga Anghel. Walay usa ang nahibalo kung kanus-a Siya moabot.

³⁹³ Apan magkaaduna og—magkaaduna og—Pito ka nga mga Tingog, sa niining mga Dalugdog, nga magapadayag sa dakung kapadayagan nianang panahona. Busa, nagatoo ako, sa ato nga . . . Kung wala kita nahibalo Niini, ug kung atong . . . Dili gyud kini mahibaloan hangtud nianang panahona. Apan igapadayag gyud kini sa nianang adlaw, sa oras nga kinahanglan kini mapadayag. Busa, ang butang nga angay natong buhaton mao ang magmatinahuron sa atubangan sa Dios, ug alagaran Siya, ug buhaton ang tanan nga nahibaloan natong pagabuhaton, ug magkinabuhi og maayo nga, kinabuhing Cristohanon. Dinhi, karon, makita nato nga ang Ikaunom nga Selyo giablihan na alang kanato; makita nato Kini. Ug nahibaloan nato nga kining Ikapitong Selyo dili gayud maablihan ngadto sa publiko hangtud nga moabot ang maong oras.

³⁹⁴ Karon, may sa kung unsang hinungdan nga gitugotan sa Dios nga modalugdog kining Pito ka Tingog. Tungod kay, Kini kinahanglan moabot, kita n'yo. Tungod kay ang . . . Makita nato nga si Cristo, ang Cordero, gikuha ang—ang Basahon sa Iyang kamot, ug Iyang giablihan kanang Ikapitong Selyo. Apan, nakita n'yo, usa kini ka tinago nga nalilong. Wala ni usa ang nahibalo Niini. Apan, Kini—Kini, tukma mismo sa kung unsa ang gisulti Niya, “Wala ni usa ang makahibalo sa Iyang Pag-abot.” Dili usab nila mahibaloan ang mahitungod sa niining tinago nga Pito-ka-Dalugdog. Busa, makita ninyo, magkauban kini nga konektado.

³⁹⁵ Sa ingon ka daku, aduna kita'y pagpanabot bahin Niini, sa karon, tungod kay ang uban Niini napadayag na; apan ang kini wala pa napadayag. Apan sa paglingkod kay didto sulod kuwarto, ug nadungog ko kini . . . o, wala ko madungog, diay, kondili nakita ko Kini nga naabli sa niining Pito ka mga Dalugdog. Karon, hangtud ra sa ingon niana ang maabot nato, dinha ra mismo.

³⁹⁶ Ug karon nagasalig ako nga ang matag usa kaninyo mag-mangalagad sa Dios ug buhaton ra kung unsay husto. Ug higugmaon Siya, sa tibuok ninyong kinabuhi, ug alagaran Siya. Ug Dios na ang bahala sa tanang uban pa.

³⁹⁷ Karon, aduna kita, sa pagkompleto dinhi karon, pinaagi sa grasya sa Dios, ang tanang mga tinago mahitungod sa selyadong unom ka mga Selyo, ug nasabtan nato ug nahibaloan dinhi nga ang Ikapitong Selyo dili mahimong ipahibalo ngadto sa publiko.

³⁹⁸ Karon, ang Iyang Pag-abot, sa oras sa Iyang Pag-abot, sa pagguba na sa kalibutan, kabalo na mo. Miingon Siya dinha, “Unsa man ang ilhanan nga moabot na ang katapusan sa

kalibutan?” Sa Mateo 24, dinha kon diin ila Siyang gipangutana nianang pangutana. Gitubag Niya kana. Gihisgotan Niya ang mahitungod sa Israel nga pagatipunon na ingon nga usa ka nasud, diha sa ika-31 nga bersekulo, sa Mateo 24:31. Apan niadtong higayona gihisgotan Niya kana diha sa mga sambingay, kita n’yo. Dayon makita ninyo ang. . . “Tun-i ninyo ang sambingay mahitungod sa kahoy’ng higuera. Sa dihang makita ninyo nga manalingsing na kini, aba, hingbaloan ninyo nga haduol na ang tingpamulak. Ug dayon sa dihang makita ninyo kini nga nagakahitabo na, nan hingbaloan ninyo nga ang panahon haduol na.” Kita n’yo, ang Israel nagakatigum na didto sa iya mismong yutang-natawhan. Apan, mamatikdan ninyo, Iyang gilaktawan ang kapadayagan bahin niining Ikapitong Selyo.

³⁹⁹ Ug dinhi, sa dihang ang Ikapitong Selyo, sa dihang Iyang giablihan Kini, Iyang gilaktawan Kini pag-usab, kita n’yo. Busa makita nato nga Kini usa ka hingpit nga tinago, busa dili pa oras aron mapadayag ang maong tinago. Busa, hangtud pa lang kita dinhi, ug ang uban pa Niini mapadayag ra sa panahon mismo nga si Jesus magpakita na sa kalibutan pag-usab, alang sa Iyang Pangasaw-onon, o unsa man ang mahitabo nianang panahona. Karon, hangtud nianang panahona, mag-ampo lang kitang tanan, magkinabuhing maayo, matarung, nga Cristohanong pagkinabuhi, nanagpaabot alang sa Iyang Pag-abot.

⁴⁰⁰ Ug karon kung kining teyp mahitabo man nga mahiadto sa kamot sa pipila ka mga tawo sa kon asa man, ayaw gayud pagsulay nga maghimo og unsa mang matang sa ismo gikan niini. Ang bugtong butang nga angay ninyong pagabuhaton, magpadayon lamang kamo sa pag-alagad sa Dios. Tungod kay, kining daku nga tinago pagkadaku kaayo nga bisan si Juan wala gani gitugotan sa Dios nga isulat Kini. Nagdalugdog Kini, apan Siya . . . sa pagkahibalo niana, nagsaad kanato nga pagaablihan ra Kini. Apan, sa niining panahona, wala pa Kini maabli.

⁴⁰¹ Ug karon mapasalamaton kaayo kita sa Dios sa kung unsay Iyang gipakita kanato. Naglingkod ako didto sulod sa lawak sa walo ka mga adlaw. Ug ang Mensahe nga bag-ohay ko lang gisaysay kaninyo, daghan sa inyo dinhi ang nakasabot. Ug gisaad ko nga adunay butang nga nagakahitabo, sa espirituwal, sa tanan niining panahon, nga sigurado gyud ako nga wala ninyo makita kini. Ug ania na kung unsa kini; kini mao ang hingpit nga pagpanghimatuud ngadto niining interpretasyon sa mga Kasulatan nga gipadala sa Dios.

⁴⁰² Tungod kay, sa wala pa nato gihisgotan Kini, ug sa mibiya ako aron moadto sa kasadpan, gipakita kanako sa Ginoo ang usa ka panan-awon usa ka adlaw, mga alas diyas, sa buntag. Ug mianhi ako ug gisaysay kini dinhi, nga nakita ko kini; wala ako mahibalo kung unsa kadto. Usa kadto ka konstelasyon sa pito ka

mga Manulonda. Mahinumdoman nato kana. Makuha ninyo kini diha sa teyp, nga gitawag og, *Unsa Na Kaha Kini Nga Panahon, Sir?* Bueno, karon, eksaktong mao kana kung unsa ang inyong nakita karon. Ang pito ka mga Manulonda. . . Atua ako niadto sa kasadpan.

⁴⁰³ Nahinumdoman ninyo, ang gagmay'ng mga mensahero; mipaingon sila sa sidlakan. Ang ikaduhang mga mensahero, ang mga salampati, ang medyo mas daku nga mga langgam, nangadto sila sa sidlakan. Ug dayon milantaw ako. . . Nakauban ko sila, tibuok niadtong panahon. Kadto mao ang Una ug Ikaduhang Pagbira.

⁴⁰⁴ Karon, miabot ang Ikatulo nga nagagikan sa kasadpan, paduol nga nagahaguros, sa hilabihan kakusog, ug gisakmit Nila ako paitaas. Ang pabalik na kadto sa sidlakan, uban ang tinago mahitungod niining Pito ka mga Selyo. Pareho gyud kini sa giingon sa—sa damgo ni Junior Jackson, nga gitugotan ako sa Ginoo nga hubaron alang kaniya didto, “Sa sulod nianang piramide, adunay usa ka puting Bato nga walay sulat.” Mao kana ang hinungdan nga kinahanglan kong moadto kasadpan, aron makipag-konektar sa Mensahe sa maong mga Manulonda, aron mobalik dinhi ug ipahayag Kini ngadto sa iglesia. Hinumdomi, giingon ko, “Ang sunod nga mga butang nga mahitabo mamaania dinhi sa iglesia.” Eksakto gyud kana.

⁴⁰⁵ Ang usa pa ka butang, gusto kong himatikdan ninyo kung unsa ang nahitabo. Ug kung nagapaminaw kamo sa maong teyp, sa *Unsa Na Kaha Kini Nga Panahon, Sir?*, Mamatikdan ninyo nga ang usa niadtong Manulonda lahi gyud para kanako. Ang uban Kanila daw sa ordinaryo lamang. Apan kining Manulonda usa ka lahi gyud nga Manulonda. Siya anaa sa akong wala, diha sa konstelasyon nga porma sa usa ka piramide.

⁴⁰⁶ Ug, hinumdomi, atua kadto sa piramide, kon diin didto ang misteriosong puting Bato nga walay sulat. Ug gidala ako sa mga Manulonda ngadto nianang Ilang piramide, nga ang mga tinago sa Dios napadayag lamang Kanila. Ug, karon, Sila ang mga Mensahero nga miabot aron hubaron kanang piramide, o kanang Mensahe mahitungod sa sikreto niining mga Pito ka mga Selyo nga nakapahimutang sulod mismo sa maong piramide.

⁴⁰⁷ Karon, ang Manulonda, nga anaa sa akong wala, sa tinuud mao ang katapusan, o ang ikapitong Manulonda, kung pagaihapon nato Sila gikan sa wala ngadto sa tuo. Tungod kay, Siya anaa sa akong wala; nakasud-ong ako sa Iya, paingon sa kasadpan, Siya usab nga nagaatubang sa sidlakan, anaa sa wala nga kilid. Busa, mao kana ang katapusang Mensahe sa manulonda, pinakatalagsaon gyud. Hinumdomi kung giunsa ko sa pagsulti nga Iyang, nakalingi ang Iyang ulo; ug ang Iyang dagku, mahait nga mga pako; ug kung giunsa Niya sa paglupad padulong diretso kanako. Karon, kana ang Ikapitong Selyo.

Kini sa gihapon usa ka talagsaon nga butang. Ug kita . . . Wala kita mahibalo kung unsa gyud Kini, sa karon, tungod kay wala gipahanugotan nga maablihan Kini.

408 Apan karon, ang matag usa kaninyo sa panagtigum nakamatikod niana, pagkahalangdon nga panagtigum ang nahitabo! Ang tanan mora og anaa . . . anaa na mismo sa tumoy sa ilang mga lingkoranan. Ug ang tanan ania na nanagtindog sa palibot, sa ala-una, alas dos pa lang sa hapon, naghulat na para sa pag-abli sa mga pultahan, ug para makapaglingkod dinhi sa unahan. Nanagtindog sa nga nakasandig sa mga bungbong; gipamikogan na ang mga ka lutahan, ug tanan na.

409 Unsa man kini? Ang Balaang Espiritu Kini nga ginasugo dinhi kining mga Mensahero, ug Sila ang nagapadayag Niini ngari kanato. Ug dayon himatikdi kung unsa nga nagakatakdo mismo Kini sa Pulong, sa ingon kaeksakto.

410 Ug dayon aron maipahibalo kaninyong tanan nga kini ang Kamatuoran, gisulti na Niya kini daan mga—mga duha na ka bulan karon, o sobra pa, nga wala pa kini mahitabo. Nga, sa pag-adto ko didto sa kasadpan, wala ko’y nahibaloan Niini; sa pagbalik ko dinhi dala na ang interpretasyon maingon sa pagkahatag Niya Niini. Karon hinumdomi, diha sa panan-awon, wala Siya nagsulti sa ako ni usa ka butang sa maong panan-awon sa dihang gidala Niya ako paitaas. Nahadlok ako, nahadlok ako nga mamatay, ang mapatay diha sa usa ka pagbusikad. Nakita n’yo, dili Nila mabuhat kini.

411 Ang interpretasyon miabot mismo sa dihang gikinahanglan ko Kini, didto kini sulod sa lawak, ug gihatag ko Kini sama mismo sa pagkahatag Niya Niini.

412 Karon, nakita n’yo, mga higala, wala gayud nagakapakyas ang mga panan-awon. Kanunay silang hingpit. Eksaktong matuod gyud sila.

413 Karon, ang panan-awon, dugang ang Pulong, dugang ang kasaysayan, dugang ang mga kapanahonan sa iglesya, ug tanan na, nagakatakdo gyud tanan. Busa, masulti ko gayud, nga, sa labing maayo kong panabot, ug sumala mismo sa Pulong sa Dios, ug sa panan-awon, ug sa kapadayagan, ang interpretasyon niini maoy MAO KINI ANG GINAINGON SA GINOO.

414 Karon, hinaut nga panalanginan kamong tanan sa Ginoo, ang matag usa, sa ingon kahamugaway gayud, samtang magatindog kita karon ug magakanta niining maanindot og dugay na nga kanta sa iglesia. Panalanginan kamo sa Dios, ang tanan. Amen.

415 [Gidugang ni Brother Branham ang sunod nga upat ka linya, nga gikuha gikan sa parapo 374-375 sa iyang Mensahe kagabii, Marso 24, 1963—Ed.]

I... (Panalangin kamo sa Dios!)... I love
Him, (sa tibuok kong kasingkasing),
Because He first loved me.

Panalangin ka sa Dios, Igsoong Neville...?... Pagpabilin
lang gayud sa pagpangatungdanan...?...



ANG IKAPITONG SELYO CEB63-0324E
(The Seventh Seal)

SERYE SA KAPADAYAGAN SA PITO KA MGA SELYO

Kining Mensahe ni Igsoong William Marrion Branham, unang giwali sa Ingles niadtong Dominggo sa gabii, Marso 24, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apod-apod sa Voice of God Recordings.

CEBUANO

©2019 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org